


九真

一百二十一

示大典

卷三千一百四十一  
之三千一百四十二



纂修官蕭發出第三千七百四十一卷內

京口省橋信 元一統志卷一百一十五古今通

畢西庭集卷一百一十五

劉忠肅公集卷一百一十五之夜志 畢西庭集 柳文恭公集

共書九種計十條

乾隆三十八年十一月二十五日發寫 謄錄

永樂大典卷之三十一百四十一 九真

陳

陳安石

宋史列傳陳安石字子堅以蔭鎖廳及第嘉祐中為夔峽轉運判官民畜蠱毒殺人捕誅其魁并得良藥圖由是遇

毒者得不死提點陝西刑獄攝帥鄜延能用謀者敵動靜輒先聞嘗救邊部戒嚴既而數萬騎奄至無所獲而去璽書嘉之歷使京西河東淮南京東知蘇州邠州河中府戶部副使韓絳鎮太原議行鹽法與監司多不合加安石集賢殿修撰為河東轉運使議始定謂其僚曰興事當有漸急則擾乃出益付民而畀之券使隨所得貿易鬻畢而歸券盜販為減進天章閣待制官軍西征時遣縣令佐督餉安石謂文吏畏怯武人邀功乃但取敢行者申約束以防衆潰曰事不豫警俟其犯而誅之是罔民也王中正帥東師而西報安石持四十日糧而師駐白草平彌月安石深念曰吾頓兵益久而秦甲未至儻不足於食將以之軍興罪我即擅發民再餉乃以聞李舜舉劾其專詔置獄於潞安石自麟州會逮俄而他路餽糧多不繼

神宗察其無罪赦之尚書省初建召為戶部侍郎嘗與右曹李定同奏事帝目留之曰卿豈非在淮南日不肯保李定持服者乎對曰詔問臣臣不敢不以實奏帝曰以實事君朕所與也進吏部侍郎選人將改京官須次久臨當引對率困於刑寺審問或沮以微文則一跌不復安石請罷再問以絕曩弊遂為後法出知永興軍鄧襄陳鄭州河陽至龍圖閣直學士紹聖元年卒年八十一

### 陳郭

建安志陳郭字彥聖建陽人嘉祐中擢進士第調廬州司法參軍再授歙州推官知蘇州崑山縣歲饑屬邑希部使者旨不敢

蠲賦公曰歲歉而賦不蠲則流轉溝壑何以字民卒蠲之後為司農丞未嘗謁政府遷太府丞請外除閩漕元符中以元祐黨謫廢後復官朝奉大夫卒郭性剛亮歷官五十年帑無贏貲退無居廬舊吏以郭貧饋金數百兩竟不受士大夫以是稱之

### 陳知和

宋晁无咎濟北集朝請大夫政仕陳君墓誌銘陳氏諱

府王建有異志翔屢沮之廢居閩州之西水益昶以蜀歸曾祖諱省華始來自蜀為祥人仕本朝為左諫議大夫有能聲贈太師尚書令兼中書令

秦國公秦公生三子皆儒學擢高第位將相勲勞於國樞密使尚書石僕射同中書門下平章事贈太師尚書令兼中書令英國公謚文忠諱堯叟君祖也英公生尚書都官郎中贈金紫光祿大夫諱師古光祿生君光祿前夫人賈氏永年縣君後夫人潘氏安福縣君而君寧國縣太君賀氏出也光祿當任子以與其族人而君從祖太尉康肅公方觀察宿州任君石班殿直及長知書歎曰吾家世如是吾父教我以學何如而吾可用此進耶乃上書願易所得官從左選仁宗嘉其意且以其文忠後從之初調河陽節度推官事四守梁適李淑張觀蘇紳皆當顯人其趣操不必同而君介然若一四人者皆賢之再調寧國軍節度使推官竄卒諉耕民剝里中卒殺人民從旁止之傷而免守欲并論民死君爭之力守怒而入君立廡下不去守悟為讞諸朝民果不死遭安福憂免喪擢衛尉丞知硤石縣事縣當陝衝辛苦於役作偽印帖隱民間前令比獲以要賞君一日執六人且嘗度關法應死既不忍以要賞見其廷然誠苦於役者為移文所從來無他過取偽印帖焚之還其役戍兵道縣中群情犯法邏者執于庭數百人諫縣門且奪之吏趣閉門君徐出坐堂上命開門衆莫敢入因陽叱邏者鮮縱之既行密疏其名河南府皆正其罪改簽書彰德軍節度判官事

未行。遭寧國憂免喪。遷大理丞。知緋氏縣事。英宗即位。遷右贊善大夫。昭陵采石聚兵。緋氏城中萬人倉無儲粟。而輸者未至。君度不可。俟報乃下令借富人停粟。約與之息。匿者沒官。令出而辦。比輸者至。則兵仰食。縣者十五日矣。事已。旁縣吏皆遷。而君不自言。賞亦不及。遷殿中丞。又遷國子博士。通判果州事。神宗即位。遷尚書虞部員外郎。賜五品服。還朝。用薦監左藏庫不訖。通判趙州事。遷比部員外郎。曾孝寬察訪河北。奏君偕行。朝廷方議省郡縣寬力役。吏希旨爭言可省。而乾寧保定順安三軍在議中。俾君往視。還言沿邊城犬牙相制。以利守禦。而便轉輸。此祖宗深意。不可改。朝廷然之。為不廢三軍中人程昉建言。徙漳河洛州。使者以君權知洛州。董其事。漳河役大。昉欺朝廷以易集。務減人徒。以故怨之。百餘人燒民廬為暴。君盡捕得。誅其始謀者八人。事且畢。會新守至。君還趙州。昉以君為暴其短。乃歸力新守。而君亦不辨也。丞相王公安石雅知君可用。使人諭君。歛故難治。而朝廷方行法。欲以倚君。君不得辭。擢知歙州事。遷駕部員外郎。自以不能當執政意。至則求閑局。差管勾嵩山崇福官。民上書願留者以千數。房州地僻。守屢以賊敗。又擢知房州事。郡阻山城。西有谿所從來。高望之洶洶在城上。舊有堤圯不治。餘三十年。君議增築。不欲調民。

乃以術招竄卒廩之。蓋以州兵凡用工萬。高其舊丈二尺而廣如之。人初以為煩。會明年溪大漲。得堤而定。人乃服君。秦課京西第一。遷虞部郎中。擢知泗州事。郡當水衝。屬霖潦。君度准汲洩。滿必大下。因預為守城備。水至浸城且壞。吏倉卒不知所為。而君規畫素定。語吏如此。城既無虞。而民賴以活。萬計。璽詔獎諭。擢提點廣南東路刑獄事。改朝奉大夫。番禺南粵都。會守俸月七萬。守方對詔獄。君攝州事。竟八月。得錢六十萬。君不取。曰。我豈緣人。不幸而自裕邪。宴賓客為徹樂。其忠厚如此。遷朝散大夫。盜起梅州。去治所更四郡。君以為道驛而往。恐後。乃自南雄州絕山倍道。崎嶇茆竹間。蒙霧得疾。幾殆。後良愈。因求上印。綬時方六十一。即去位。遷朝請大夫。賜三品服。勲上柱國。為人清慎。退約。不干權貴。善與人交。自以無怨惡於人。明白立斷。所至民愛之。善楷隸。喜為詩。既謝事。作燕譽堂於第之西北隅。蓋以訓詞名之。日從賓客飲酒談笑。其間以疾卒。壽六十四。元祐二年五月丁巳也。夫人鄭氏安居縣君。男曰适。寧鄉縣尉。逾鄭州司戶。適臨河主簿。女長適朝散郎潘行。次適通直郎王鎮。次適道州錄事楚冲。次適宣德郎周昕。幼在室。孫男女七人。諸孤以君卒之明年七月壬申葬於河南府密縣義臺鄉之武泰岡。來求銘。銘曰。任可以藉其世。而公不賴。

之進可以遇合。而公不競之。時未可以去也。而公去之。事取其先。得取其後。名處其薄。功處其厚。造物者報其天。不報其人。其人不亡。在其後子孫。

## 陳升之

宋史列傳陳升之。字暘升。建州建陽人。舉進士。歷知封州。漢陽軍。入為監察御史。右司諫。改起居舍人。知諫院。時俗

好藏去交親尺牘。有訟則轉相告言。有司據以推詰。升之謂此告訐之習也。請禁止之。又言三館為搢紳華途。近者用人益輕。遂為貴游進取之階。請嚴其選。詔自今臣僚乞子孫恩者。毋得除館閣著作佐郎。王瓘遇殿帥郭承裕於道。訶怒不下馬。執送府。升之言京官不宜為節度使。下馬。因劾承裕驕恣。解其任。張堯佐緣後官親。為三司使。尋為宣徽使。內侍王守忠領兩鎮留後。求升正班。御史張昇補郡。久不召。彭思永論事。令窮問所從來。唐介擊宰相斥嶺南。升之皆極諫。遷侍御史知雜事。凡任言責五年。所上數十百事。然持論不堅。以故不盡施用。擢天章閣待制。河北都轉運使。知瀛州。真定府。加龍圖閣直學士。復知諫院。上言天下州縣治否。朝廷不能周知。悉付之轉運使。今選用不精。又無考課。非闕滯罷懦。則陵肆刻薄。所以疾苦愁歎。壅於上聞。必欲垂意元元。且從此始。乃詔翰林學士承旨孫抃權御史中丞。張昇與升之同領磨勘轉運使。及提點刑獄功務。升之

初為諫官。時嘗請抑絕內降詔。許有司執奏勿下。至是申言之。詔委三省。初正其罪。仍揭於朝堂。文彥博乞罷相。升之慮樞密使賈昌朝復用。疏論其邪。昌朝卒罷去。遷樞密直學士。知開封府。歲餘拜樞密副使。於是諫官御史唐介。范師道。呂誨。趙抃。王陶。文章論升之陰結宦者。故得大用。仁宗以示升之。升之丐去。帝謂輔臣曰。朕選用執政。豈容內臣預議耶。乃兩罷之。以升之為資政殿學士。知定州。徙太原府。治平二年。復拜樞密副使。神宗立。以母老請郡。為觀文殿學士。知越州。熙寧元年。徙許中道。改大名府。過闕留知樞密院。故事樞密使與知院事不並置。時文彥博。呂公著既為使。帝以升之三輔政。欲稍異其禮。故特命之。明年同制置三司條例司。與王安石共事。數月。拜中書門下平章事。集賢殿大學士。升之既相。遂請免條例司。其說以為宰相無所不統。所領職事。豈可稱司。安石曰。古之六卿。即今之執政。有司馬。司徒。司空。各名一職。何害於理。升之曰。若制置百司。條例則可。但今制置三司一官。則不可。由是忤安石。稱疾歸卧。逾十旬。帝數數諭乃出。會母喪去位。終制。詔為樞密。足疾不能立朝。七年冬祀。又不能相禮。拜鎮江軍節度使。同平章事。判揚州。封秀國公。卒年六十九。贈太保。中書令。謚曰成肅。升之深狡多數。善傳會以取富貴。王安石用事。患正論

盈庭引升之自助。升之心知其不可而竭力為之用。安石德之。故使先已為相。甫得志。即求解。條例司。又時為小異。陽若不與之同者。世以是譏之。謂之荃相。升之初名旭。避神宗嫌名改焉。史論載王珪傳後。東都事畧升之為人深沉。始為小吏。與王安石相遇淮南。安石深器之。升之在樞府。安石亦執政。多變更舊制。引升之共事。升之心知其非而竭力贊助之。以故先安石為相。既拜。乃言制置三司條例司。難以僉書。臣待罪宰相。無所不統。所領職事。豈可稱司。安石曰。司者臣道也。人臣固可稱。升之曰。今之有司。皆領一職之名。非執政之所宜稱。安石曰。古之六卿。即今之執政。有司。馬。司徒。司空。各名一職。何害於理。三公無官。以六卿為官。周公以三公為冢宰。蓋其他三公。或為司馬。或為司徒。或為司空。古之三公。猶今三師。古之六卿。猶今兩府也。宰相雖無所不統。然亦不過如古冢宰而已。冢宰掌邦治。至於邦教。邦政。邦禮。邦刑。邦事。則雖冢宰亦有所分掌矣。升之曰。若制置百司條例則可。但令制置三司一官條例則不可。神宗謂安石曰。卿獨領可乎。安石請用韓絳。乃聽升之免條例司。以母喪去位。終制。拜同平章事。樞密使。契丹遣蕭禧來議河東地界。理屈。卧都亭驛。不敢歸。升之曰。致饗授館。有常禮。過期曲留。宜即裁抑。禧慙沮乃行。以足疾求罷。拜鎮江。

軍節度使。同平章事。判揚州。封秀國公。請老。以故官致仕。卒年六十九。贈太保。中書令。謚曰成肅。初。升之母竇娘。至季秋為彌月。父儼善推策。得九日吉。而升之以是日生。故名從九。從日。字升之。至神宗立。乃以字為名云。京口耆舊傳。陳升之本建人。國史有傳。墓在縣之五州山。二子閱。閔。皆以父任。閱終宣義郎。無子。閔終大理評事。子憬。以祖恩授承務郎。亦早卒。以從姪鎮為嗣。終宿州符離知縣。三世並祔葬五州。升之自建來居。從子豫及禧。實與俱來。豫以升之廢。終中奉大夫。四子。杻。桶。最知名。杻知信州。劾秦檜。妻黨王仲山。坐廢。檜死。起知楚州。將漕淮南。終知衢州。桶為韓世忠軍叅謀。九世忠出師。桶皆在行。積功為右文殿脩撰。數文閣待制。卒。三子。官皆至陞朝。禧之弟出繼升之後。即鎮也。再傳而絕。命他族人為繼。又再傳而絕。今繼升之後者。禧之曾孫應岍之子真。元一統志。陳升之本名旭。自升之避國諱。以字行。改字賜叔。博學多能。第進士。初嘉祐末。為諫官。劾賈昌朝不可輔政。頗有聲稱。宋熙寧中。以王安石薦。拜相。時同郡吳充亦拜相。神宗問司馬光。近相陳升之。外議云何。光曰。今已宣麻。播告。臣雖言之無益耳。神宗曰。試言之。光曰。閩人狡。楚人險。今用三相。皆閩人。二參皆楚人。必將援引鄉黨。充塞朝廷。天下風俗。何必更得淳厚。上曰。升之有才智。

光曰固然。但恐不能臨大節而不可奪耳。鎮江志陳丞相升之。自建來。從子禧。豫實與俱。以升之奏補。禧終負外郎。管當在京儀鸞司。子琳。選調。豫中奉大夫。四子。机。桶。最知名。机知信州。楚州。淮南。漕。知衢州。桶。敷文閣待制。三子皆陞朝。禧之弟。繼升之後。即鎮也。今繼升之後者。禧之元孫。箕。詳見耆舊傳。鎮亦陞朝。子耆。從政郎。禧之孫。雅言。嘉言。嘉言之子。應。岬。三舉于鄉。箕。應。岬之子也。增添。又陳升之。字。賜。叔。建安人。居丹徒。位至丞相。封秀國公。升之本由進士及第。然以其非茲郡所舉。故畧而不載。至其子孫。由此鄉舉而登第者。則書之。後皆倣此。閱。升之子。宣義。即無子。閱。閱弟。大理評事。蚤卒。禧升之從姪。員外郎。管當在京儀鸞司。孫。應。岬。見科舉類。豫。禧弟。中奉大夫。鎮亦禧之弟。升之命為後。終宿州符離知州。憬。升之孫。閱。子。承。務。即蚤卒。耆。鎮子。從政郎。琳。禧子。迪。功。郎。机。豫。子。知信州。楚州。淮南。漕。知衢州。桶。机弟。敷文閣侍制。岬。桶。孫。朝。散。郎。知英州。明。岬弟。朝。奉。郎。通判和州。岬。明弟。通直郎。知江陰縣。輿。地。紀。勝。陳升之。字。賜。叔。建陽人。博學多能。景祐擢進士甲科。既而在言路。以直道自任。多所彈擊。仁宗擢樞密副使。神宗即位。拜相。後居于潤。薨。葬于潤。子。孫。因家焉。姓。氏。遙。華。陳升之。字。賜。叔。登科為太學博士。揚州芍藥花開。

四。朶。太守韓琦。通判王珪。幕僚王安石。三人宴。欠一人。守命吏有客。即通。既而報陳太博。謁。召與宴。四花方有屬。後四公俱拜相。升之。元豐年。平章。事。判揚州。封秀國公。年六十九。卒。謚成肅公。其先建州人。惟楊志。王安石。送陳升之序。今世所謂良大夫者。有之矣。皆曰。是宜任大臣之事者。作而。任大臣之事。則上下一失望。何哉。人之材。有大小。而志有遠近也。彼其任。者小而責之近。則照照乎仁。而有餘於仁矣。子子然。義而有餘於義矣。人。見其仁。義有餘也。則曰。是其任者小。而責之近。大任將有大此者。然上下。歎之云。爾然後作。而任大臣之事。大臣之事。宜有大此者焉。然則照照然。而已矣。子子然而已矣。故上下一失望。豈惟失望哉。後日誠有堪大臣之。事。其名實。然於上。上必懲前日之所。歎。而逆疑焉。暴於下。下必懲前日。之所。歎。而逆疑焉。上下交疑。誠有堪大臣之事者。而莫之或任。幸欲任。則。左右小人。得引前日之所。歎。懲之矣。噫。聖人謂知人難。君子惡名之溢於。實。為難。則奈何。亦精之而已矣。惡之則奈何。亦充之而已矣。知難而不。精之。惡之而不能充之。其亦殆哉。予在揚州。朝之人。過焉者。多堪大臣之。事。可信而望者。陳升之而已矣。今去官於宿州。予不知復幾何時。乃一見。之也。予知升之作。而任大臣之事。固有時矣。照照然。仁而已矣。子子然。義。



而已矣。非予所以望於升之也。

**陳造**

宋晁景迂集故贈承議郎陳公墓誌銘。丞相文忠陳公長子師古尚書都官郎中。知七郡。有政績。生子知章。大理評事。幼有大

才。日誦萬餘言。落筆數千字。在須臾間。嘗行役。下馬道傍。讀古碑二千餘言。歸覆之。一字不謬。謝希深手書啓事上尊府。廷評隨衆目在傍。明恢乃携啓本去。廷評取紙平空細字。馬一通如初。夏英公雅重其詩文。數來問典故。及奇字。卒年二十有四。娶殿中丞賈守文之女。叅知政事之孫。生子造。字公甫。其生四月而孤。曾祖母邠國大夫人宋尚無恙。深憐撫之。仁宗待邠國以異禮。出入廣內。稱呼如家人。既薨。上震悼之。乃特錄孤曾孫以太廟齋郎。既冠。調黔州司戶叅軍。尋罷去。復司戶戎州。兼錄叅司法叅軍。不以門地自慢。遇事如老於為吏者。國朝自丞相賈公。樞密副使吳公。慶曆八年。上編勅二十卷。後逮公之出仕。幾二十年。不復設官編勅。其下郡國者。雖稀簡。而必具啓請申明。若奏可。本末。馮成大軸。非若其後一事一印。紙日沓至。雖數紙不厭也。以故勅令壓架。彌棟塵垢。莫可觸。壤鼠糜爛。不能文字。吏幸以輕重出入為利。况在戎州遠徼。公視而笑曰。乃今可為矣。白郡守武侯曰。無斧斤則失鑿枘。願以編勅後所降。依門次第之。上奉朝廷之命。下絕吏為民姦。幸甚。於是未半年。書成。居數年。是謂嘉祐七年。丞相韓公上編勅三十卷。頒之以勸公之私書。其異同者兩條。餘如同。繩墨尺寸出也。戎人楊三尊者。黠鷲自異。喜生事漁獵。其酋長亦憚畏之。公一見嫉之。曰。豺虺也。留之。異日必貽患於人。無幾何。三尊被輕繫。公乃發其前後殺人死罪數十。立以法誅之。戎塞悅伏。以公為神明。而戎漢賴公以寧居者數十年。州將一旦率官屬登城樓。語非所宜言者。為人告之。一郡官悉就逮。公初未嘗從之樓上。乃領州事久之。益得盡其才。賈夫人感疾。公悅。江下三峽。謁殿中丞單驥。其勞萬里。夫人疾愈。去為揚州。節度推官王君玉侍郎知揚州。以聲譽老成。自高。待公忘年。每與論新唐書。抵牾而不吏之也。韓丞相玉汝以負外郎。年甫三十餘。來知州事。風稜人不敢喘息。晨坐得鹽賊。付獄。日未午。督按具甚急。公乃故遲之。心知其非真盜也。韓公怒。取囚由大書。杖脊二十下。未幾真盜得。而韓公為公慚焉。自是韓公之威少霽。而多與公議事。有江都宰者。地寒而賢。後太守朱大監以私意欲罪去之。公率郡官廷辯曰。江都宰無罪。且才之。公在揚州四年。晚權江都。時散青苗錢之初也。公視可與者與之。不以殷最為已事。卒無一

人妄請者。而刑戮賴之以省。非它縣比。用三司使舉監廣利門。初罷使臣為門官。而新城門設水扉。創格令條禁甚密。所謂三司使者。一時風力人也。多從公之建明。至今人賴之以不可。調宿州觀察推官。未行。王丞相荆公用以便糶河北。丁賈夫人憂。免喪。惘然嘆曰。吾少舉進士而卒不得一第。每更一官。歸當改秩。而舉將之格必虧。其尚龜倪於斯世者。吾母待養也。今既不得終養。則吾何用祿為。乃屏居陽翟湖上。菜飯不肉者十年。日誦佛經。宴坐。間則往來嵩少窮山水之娛。且嘗得法於天衣之門人法清。既感疾。彌年不問醫。卒年四十有六。元豐五年二月一日也。娶阮氏。自有志銘。子五人。長恬。海內知名士也。起處士。今為奉議郎。遇郊恩。贈公承議郎。次繹。思。近。思。惟愷。四人皆早卒。女三人。婿曰文。林。即吳僧張文定公諸孫。彥之。鞠待制之曾孫。正彥。孫男三人。昌邦。昌諤。昌喬。女二人。長適邯鄲李榛。一幼。公骨相甚偉。能與人交。而不忘規過。葬兩叔父。及其舅氏。嫁孤女數人。皆盡力。其才識文藝。不減其父。而不自多也。恬以建中靖國元年五月二十四日。葬公于新鄭。世墓之次不及銘。後十有一年。因附阮夫人。乃得銘於恬之友嵩山晁說之。銘曰。昭陵之時。無窮士。何夫子之傑才。駿識早聲聞。而辱下僚兮。勅令刺於私室。而虺戎誅以獨見。乃未老而

澗濱。藜藿與嵩山高兮。相門之初。必復其難去斯世。而有覺者。以超超兮。有祖有父之風烈。而有子以景燦。則吾之幽篆昭昭兮。

## 陳睦

蘇州府志陳睦字子雝。祖絳。福州莆田人。舉賢良方正。官至石司諫。徙家蘇州。兄侗。章衡榜進士。知汝州。富弼辟為從事。召除

館閣校勘。歷衛尉少卿。元豐中。知陝湖宣三州。睦嘉祐六年進士第二。治平中。詔舉館閣才學之士。睦與劉攽。李常寧。李清臣輩。首被選擇。拜監察御史。熙寧中。提舉兩浙常平。以丞相魯公亮薦。遷提點刑獄。坐是免官。元豐間。高麗數遣使航海修貢。朝廷以其恭順。選使諭旨。激以忠義。初命林希希力辭之。更以命睦。睦即日就道。上喜。語輔臣曰。林希無親。堅辭不往。睦親在。乃不憚行。假起居舍人直昭文館。特贈仙華金帶。自春銜命。涉冬而還。奏言本朝故事。惟寶文閣直學士以上職。乃服金帶。今願上所賜。上特旨令服之。仍真拜所假官職。又賜金錢於令式外。以示寵錫。其後錢勰。楊景略。援例欲服金帶。上弗之許。尋直龍圖閣。知潭州。改寶文閣待制。知廣州。于彥文。字經仲。建炎二年。以龍圖閣待制知江州。視事方十日。會盜張遇犯城。彥文極力固守。遇乃引去。明年為沿江措置使。遇躡法從。彥文第彥武。字緯叔。為提舉官。古今事通。陳睦提點某路刑獄。時某民有妾夏沉

香澆衣井旁。其嫡子墮井死。妻訟以沉香擠之。三易獄不合。睦怒。劫掠而殺沉香。他日睦還京。久亡所授。聞廟師邢生頗從仙人游。密問以將來。邢拒之。而語所親曰。如沉香何。睦為震汗累日。梅執禮送吳。廷提刑序。

## 陳某

宋李直講集鉛山縣尉陳君墓銘并序。君諱某。字某。與子同郡。實建昌南城人。曾祖某。祖某。為郡著姓。父某。尤善士。有二子。君

其仲也。君幼而開爽。多智慮。以兄官學。膝下少人。廼顯治生。若親之意。其先子豁達而好義。自放于詩酒間。罕視家事。而財用所出。近得以賙親。故遠得以及羈旅。為有識所貴者。繫君之力。是賴既孤。而母老伯氏從王事。溫清益謹。而田里益脩。彼士千里之外。而無反顧之憂者。抑君使然。免喪數年。遊京師。屬河決。以財佐公上。補太廟齋郎。選授邵武軍建寧縣尉。于時盜賊多。王名不見。邑居患之。君以機往。所至輒禽。郡守言其勞不報。替授茂州司戶。兼錄事叅軍。兄為德陽宰。不且俱入蜀。改信州鉅山縣尉。未行。以疾終。年五十一。嘉祐元年夏四月癸亥也。娶鄧氏。生男光遠。光道。皆好學。見稱于士友。君之啓手足。命以卒業而已。不語他事。一女嫁黃某。亦冠族。其冬十一月壬寅。葬于所居東北十有餘里。太平鄉三異里符源。銘

曰。世無災兵。以敬其生家。有禮義。以為之地。衣冠揖讓。優游以卒歲。復何歎於意哉。

## 陳繫

番陽志陳繫。字明仲。安仁人。義居五世。鄉人號港口陳。登嘉祐六年進士第。哲宗新政。以都官郎對稱旨。提舉河北常平。遷漕

又移河東。攝太原。時方經理西鄙。繫獨當飛輓。後城烏龍。功尤多。竟感疾卒。詔為治墓。官其子墨彥。即雪溪也。有文集十二卷。兄晞。字規聖。亦登第。官至著作佐郎。能篆古書。家謂李陽冰以來一人而已。

## 陳子思

宋畢西臺集陳子思者。名知默。其先蜀郡閬州人也。曾大父省華。仕至左諫議大夫。大父堯叟。為真宗相。父師古。為

郎中。而堯叟兩弟。堯佐。為仁宗相。堯咨。為節度使。方其家盛時。子孫仕宦滿朝。至監司郡守者數十人。治甲第京師。車馬衣服聲伎之奉。時無比者。而子思已好學。力學不肯為子弟游。家人欲官子思。子思曰。吾學從科舉。所以為官也。齋即監簿。祇辱吾志。乃讓其兄子之孤者。家人強之。子思終不肯受。子思既長。舉進士。十餘年不第。治平元年。再舉進士。就試尚書省。復不得第。乃退曰。吾老矣。不可猶舉進士。因盡棄其所好。携妻子之汝居

靈泉山。治宅種田。往來於山中。子思舉進士時。嘗為詩。及居靈泉。不治他文。專以詩為事。期年。詩大行。汝許襄。鄧陳鄭之人。皆知子思善為詩。慕其名。日有以詩交子思者。子思皆報之。子思為人高遠。有志尚氣。非其人不與游。與游者雖甚貴。不少下之。至居田里。與父老親。故相過。無所擇。一皆盡其歡心。以此人滋愛之。畢仲游兄弟居陽翟。有誦子思之詩於仲游者。仲游以為唐人詩。而恠未嘗見也。問之。乃子思詩。大驚。乃盡其詩。縱觀之。而與兄弟學詩於子思。子思之論詩曰。吾中有所期者。志也。諭吾之志於外者言也。比吾之言。可以詠歌。則為詩。凡如吾之所欲道。而雅言者。皆詩也。而世人之詩。返若非其語言。何哉。故子思之作詩。凝思澹視。俛首少頃。或枉行笑語。伸紙和墨。如不經意。而章已就矣。人初以為易。與其和之者。雖累月終不及。故子思之詩。溫潤縱恣。自然不類世俗作者。子思居靈泉二年。有疾。因入陽翟。謂畢仲游曰。我死無忘吾詩。畢仲游曰。不敢。後一年。子思平居無事。謂其妻曰。吾體不樂。殆死乎。乃之賈延年家。擣紙欲次其詩。未成。而子思病遂卒。子思既卒。其家乃盡取其詩藁。及他文章。納諸棺。而葬之。曰。無使人得也。是時仲游去陽翟。行至長葛。聞子思卒。哭甚哀。曰。嗟乎。子思之卒。吾在此者。亡其詩矣。使人問之。果然。乃抵其子。遲及諸交。

游得子思二百篇。居靈泉作者。百篇而已。曰。猶可以為遺後人。子思之亡。年三十八。云。贊曰。陳氏自蜀來京師。遂顯。而居鄭。子思間徙汝之靈泉山。其卒也。復家於鄭。今為鄭人。子思多才。有學。為宰相。節度使之孫。而竟以匹夫死於山中。此人悲子思者也。未也。唐人以詩名家者甚眾。而皆在杜甫下。子思之詩。蓋有似杜甫者。故其詩一出。方數千里。爭傳之。志欲就成。中道而死。悲夫。

**陳知儉** 宋范太史集 朝奉郎陳君墓誌銘 并序 君諱知儉。字公廩。陳氏其先。閩州人。曾祖諱省華。真宗朝為諫議大夫。始居

開封之管城。贈太師尚書令兼中書令。封秦國公。祖諱堯佐。以太子太師致仕。是為文惠公。贈太師中書令兼尚書令。封鄭國公。父諱博古。大理評事。館閣校勘。贈比部郎中。文惠公相仁宗。其兄文忠公。任樞密使。弟康肅公。武寧節度使。三人位將相。宋興以來。言兄弟之貴者。以陳氏為盛。比部又以學行登文館。顯名。君生於世家。沉厚精敏。少孝謹。脩勵自立。既長。志欲克紹祖考。振奮於時。初以祖蔭守太常寺太祝。累官大理寺丞。英宗嗣極。恩遷太子右贊善大夫。知常州無錫縣。丁母仙。居縣太君宋氏憂。服除。知開封府鄆陵縣。以治行聞。上即位。恩遷殿中丞。改國子博士。避父諱不

拜王荆公執政。欲引以脩三司條例。固辭。擢提舉京西常平廣惠倉。未幾除權發遣轉運判官。行部過汝。葉令不治。繫囚以百數。君取茶饋決遣。斯須而盡。無不當者。改權發遣轉運副使。轉虞部員外郎。徙權發遣河北東路轉運副使。改金部員外郎。權轉運副使。恩州有兄弟遇父與人鬪者。共擊殺之。第遁去。兄伏殺人。有司具獄將行刑。君適至州。止之。曰。子救父可憫。且庸知非弟乎。彼聞兄將死。必還捕得果款。伏以官吏失入罪及者。衆使吏自發舉。乃奏讞之。兄得釋。弟亦免死。郡吏饒石紀其事。坐言濬河非是。奪金部。授知睦州。未行。已而復其官。又坐舉官不當。罷睦州。復為虞部。改朝奉郎。元豐三年十一月丁巳。卒于洛陽履道坊第。年四十六。明年二月某日。葬管城之先原。君性穎悟。於書無所不讀。至陰陽卜筮道術方外之言。皆探其奧。好賢喜善。出於誠心。視當世名公巨卿大人。樂克已就之。忠信之士。則篤友而不怠。故其所知與游者。必一時賢雋。今樞密副使。呂公。端明殿學士。司馬公。皆嘗薦其才。在京西河北治獄。多所平反。奉法無私。而能恕以與人。故所至郡縣。畏其嚴肅。而樂其寬厚。舉吏八百餘人。娶史氏。先卒。再娶閻氏。封壽陽縣君。五子曰敷。早卒。曰崇。曰居。曰中。曰孚。尚皆幼。一女適大理寺丞馬昭。亦先卒。君卒之日。家無餘財。太尉文公留

守西都。遣吏以幣往治其喪。又命某為銘。銘曰。展矣陳君。相國之孫。明試以才。可紹其門。自下而飛。未極復止。胡不永年。俾究其美。葬從先兆。既固而寧。詔于無窮。永緘茲銘。

## 陳薦

宋史列傳陳薦字彥升。邢州沙河人。舉進士。為華陽尉。盜殺人。棄尸民田。薦出驗。有以移屍告者。田主又殺其母。縣欲聞致殺

二人。以道薦失盜之責。薦不可。曰。焉有誣人以自贖者邪。已而獲盜。從韓琦定州河東幕府。性木彊簡澹。獨琦知之最深。每語人曰。廉於進勇於退。嫌疑間毫髮不處。與人交久而不變。如彥升者無幾也。琦輔政。薦為秘閣校理。判登聞檢院。知太常禮院。英宗諸王出閣。選為記室參軍。直集賢院。穎王為皇太子。加右諭德。王即位。拜天章閣待制。進知制誥。知諫院。薛向首謀取橫山。功不成。薦請以漢王恢之罪。罪向。楊繪論曾公亮用人不當。言既行。而遷侍讀。罷諫職。薦曰。此乃宰相欲杜繪爾所言。是宜責宰相。疏入不報。除龍圖閣直學士。河北都轉運使河決棗疆。水官議於恩冀深瀛之間。棊隄三百六十里。期一月就功。役丁夫八萬。薦曰。河未能為數州害。民力方困。願以歲月為之。還判流內銓。太常寺議學校貢舉法。請會三年

貢士數均之諸路計口察孝廉如漢制。權主管御史臺言李定匿所生母喪。不宜為御史。罷臺事。又以議典禮不合。出知蔡州。召為寶文閣學士。兼侍讀。進資政殿學士。屢求退。以為本州命。西省燕餞。資善堂擢其子厚。御史臺主簿。未幾提舉崇福宮。卒年六十九。贈光祿大夫。史論載朱京後。**東**  
**都事**畧陳薦入判吏部銓。與議學校貢舉法。請倣漢率口察孝廉。均之諸路。什取一。判太常寺。范純仁。胡宗愈。劉琦。錢顛。相繼罷言職。薦言御史天子耳目之官。今以言而逐之。是自蔽其耳目也。權知御史臺言李定不持所生母喪。豈可以為御史。數日罷臺事。以太常議襲封中書以為不當坐降一官。見秦王世官。改群牧使。知開封府。出知蔡州。以疾請提舉崇福宮。又知青州。北京留司御史臺。遷寶文閣學士。提舉醴泉觀。進右諫議大夫。兼侍讀。神宗以東宮舊僚。拜資政殿學士。引退。命知邢州。至邢未幾。復請崇福宮。卒年六十九。薦儀狀魁偉。詞氣莊重。天性簡淡。無聲色之好。而司馬光亦服薦之質。直云。**宋呂忠穆公集**陳薦字彥升。博學高文。擢進士第。遍歷中外。清華繁劇之任。忠厚亮直。號云前輩。雅為司馬溫公所知。韓魏公尤知之。溫公云。如彥升質直。先所以服其為人可知矣。韓魏公墓誌。乃彥升撰。紀實得史法。公之子厚。字公載。仕官不阿附。雖志不得伸。而公

議以為長者。厚之子翼。有才幹。為深州通判。金人陷深州。翼死節。我馬既陷中原。公之諸孫淪沒殆盡。可哀也。彥升嘗為神宗皇帝東宮僚屬。眷禮尤深。進職至資政殿學士。今信德府有公居宅。張師正東齋記事。謂公居第。乃郭進宅西南一角。郭進。太祖皇帝朝功臣也。又陳彥升。資政篇什尤高。嘗為彭門八詠。士大夫傳誦彭門。今徐州也。南通垓下。北連豐沛。有范增墓。又唐張建封嘗為徐泗節度使。有燕子樓。垓下詩云。九里山南楚漢爭。風波翻覆走長鯨。霸圖欲斷中宵失。帝業時來一戰成。懶渡滄江漸父老。更無勅敵壓韓彭。農人不識當時意。祇得春霖事耦耕。范增墓詩云。藏名羞立虎狼朝。乘變東依項籍豪。惜失壯圖撞玉斗。不知天命與金刀。還家落日埋英氣。回首浮雲委舊勞。百步西連陵母塚。峩峩先識泰山高。燕子樓詩云。僕射松楸狐兔游。侍兒猶在水邊樓。風清玉簟愁敲枕。月滿珠簾懶上鉤。舊事欲論卿夢斷。新詩吟就海潭秋。樂天才似春深雨。斷送殘花一夕休。燕子樓事。白樂天長慶集載之甚詳。此不具述。彭門八詠。兵火以來失之。惟記此三編。又陳彥升有甥孫無求。業進士。博學能文。因覽照而悟。遂祝髮為僧。改名宗願。住真定府洪濟寺。踰三紀。其語錄云。良田萬頃。日食二升。廣廈千間。夜卧八尺。士人傳誦。後住真州長蘆寺。壽八

十餘卒。宋景文公集著作某頓首。比日邊候帖。縣官威撫使然。迂儒老斥塞外。但視簿書弄刀筆而已。河朔少文。每思英晤一快談。不可得。詩書之言鬱結膏中。如壘塊。數用醇酒澆之。猶不平。改歲益寥寥無賴。相見未有期。事外自重。某咨。

### 陳良

維楊志陳良。揚州人。有學行為鄉里所推。八貢禮部。治平四年。與子景山同登進士第。良事親孝。既登第而念親之不見也。乃

歎曰。光子令刀學起家。今墓木已拱。而予方登第。不及景山遠矣。有詩云。父子聯榮世所希。予家何幸竊恩輝。自慚不及吾兒甚。得向親前謝綠衣。王君玉贈詩云。姪娥丹桂惜雙枝。見說蟾宮影漸稀。龍過禹門和骨換。鳳巢阿閣帶雛飛。石渠典校前芳在。鴈塔留題故事希。莫恠楊人爭洗眼。上林春盡畫船歸。良終於朝奉郎秘書丞。景山終於著作佐郎。有秘丞集藏于家。元一統志陳良。字漢傑。寓家滄溪。唐子昂之後。宋熙寧三年。第進士。是歲廷試。始試凡一百九十五。同第葉祖洽為榜首。良仕至廣安郡守文學。為士人所宗。

### 陳公衮

肝江前志陳公衮。南城人。治平中以神童召試。太守黃師道有詩贈之云。玉皇詔我自盱城。下車期年徵政聲。唯得

奇童穎川子。年始七歲業老成。手揮椽筆書大字。口誦五經富強記。君非祖德積餘慶。來裔安能具神智。一見降羨增嗟呼。寄言昭武元正夫。長歌大軸貽褒贊。比擬劉晏李泌徒。近來詩思復清峻。辭瞻格老實奇俊。居嘗親試一一精。奏達帝聰彰聖運。英廟激賞人中祥。俞旨頒降政事堂。臨軒未暇召入對。龍駕俄聞升上蒼。舉世才命各有待。俊氣尚幼佳名在。當令明主語大喜。曰吾不知德昭有輔翼才。吾子孫無慮矣。遂令掌文翰。及南閩請援機務。悉以委之。尋拜丞相。俶襲位。禮遇彌至。德昭重厚多謀。臨事無撓。每師祿戒嚴。議者盈庭。德昭至則佗論皆息。其治家以孝聞。每時序置酒。環列几席者凡四從。嘗自為詩曰。滿堂羅綺兼朱紫。四代兒孫奉老翁。及寢疾自為墓誌。乾德五年卒。年七十八。贈太保。子九人。惟秀文守文子孫以功名顯云。

### 陳豫

宋孫觀鴻慶居士集故石中奉大夫致仕贈少師陳公神道碑。陳氏建安大族。自秀公以文學政事累踐大官于嘉祐治平

之間。神宗御極。進拜右丞相。任重道遠。望臨一時。世德垂延。陳氏益大。歷五朝百有餘年。公族子弟著仕藉。而以材能處顯者。前後蓋相望也。公諱

豫字子由。用族父秀公恩。任秘書省校書郎。調開封府陽武縣尉。以最陞  
温州永嘉。泰州隴城二縣令。隴城並河。遇連雨暴溢。官寺民廬。水及半扉。  
公私病之。公議徙爽塏。上書言狀。書下得請。去縣里所營高燥地。建城市。  
開井閘。不日而就。水潦至。人去墊溺。按堵如故。縣人為公生立祠。用舉者  
改宣德郎。知信州鉅山縣。丁父中奉公憂。卒喪。知延安府敷政縣。丁母令  
人葛氏憂。憂除。知應天府柘城縣。改同州澄城。轉通直郎。簽書彭武軍節  
度判官。覃恩。遷奉議郎。轉承議郎。經畧司幹。當公事秩滿。再除提舉本路  
糴買。就遷提舉弓箭手。公精壯果敢。長於斷。所涖皆有名迹。西方用兵。軍  
食最先務之急。官吏竝緣為盜。軍無宿儲。士有飢色。公問弊。知其故。出金  
繒下其沽。而增穀價以受糴。不使一吏預其間。未幾車輓負擔四面而至。  
芻粟告具。師飽以有功。公曰。此一時之利。未足言。又建請石堡寨。旁近地  
數千頃。皆沃壤。可據賊衝。築一壘。嚴兵塞其道。使人肆耕其中。歲得粟以  
紓漕輓之費。則百世之利也。詔從之。築軍賜號威德。陝右歲籍邊民為弓  
箭手。公蒐選丁壯。聯為保伍。人得占田多寡有差。至卒長別給一馬。身自  
督教之。久皆精練。為諸路之冠。當是時。自大將至裨校。築堡障。扞姦偷。斥  
境土。受俘獲。大者增秩。小者賜金。多公計畫。而人不知自公出也。公善知

人。明於任使。嘗言。御將士當使過勿拘以文法。然後可使蹈白刃。赴水火。  
而不辭。杜大中者。豪縱不治。繩檢。一日抵罪。當下吏。公惜其材。留不遣。移  
書屬鄰帥善御之。大中挺身搏賊。勇冠一軍。遂為名將。韓公世忠。少年喜  
鬪。數犯法。當伏誅。公顧謂帥曰。世忠驍悍不畏死。寇至。蓋令當前。斬捕自  
贖。而殺壯士乎。帥從之。始隸兵籍。每戰先登。梟貴將之首。以獻。遂知名。建  
炎南渡。提孤軍。戡大憝。手擒二叛。威震夷狄。冊封咸安王。時人方之狄武  
襄云。公四任關塞。僅十年。繇幾幕。至部使者。累功伐。七遷。至朝議大夫。議  
者恨不得公。將兵數萬。獨當一面。而不究於施設。為可惜也。八寶息。還中  
散大夫。自言於朝。曰。久任邊州。且老矣。乞東方一郡。自効。得守濟州。會歲  
大旱。飛蝗蔽野。所過草木蕭然。公即日移告。坐齋室。遲明。具冠裳。率賓屬  
徒步出。譙門。徧走群祀。伏地頓顙。為百姓請命。有頃。陰雲四合。大澍如注。  
却蓋不御。徒步而旋。是日也。螟蝗一洗無噍類。歲大熟。獲倍它壤。徙萊州。  
不赴。請祠。得提舉舒州靈仙觀。已乃被疾。上書謝事。政和七年。五月。某甲  
子。卒於其子通判沂州杻之官舍。享年六十八。積官至中奉大夫。爵嘉興  
縣開國男。食邑三百戶。明年三月。癸酉。葬潤州丹徒縣大慈鄉之原。後以  
子故。累贈少師。公涖州縣。治道尚嚴。條教已下。人守之如誼。盟不敢犯。斷



治自己出。群吏坐曹行文書而已。夏秋賦調束芻。為人執一牌立闕外。刻日書其上。吏不及門。期至而集。為文勸耕二十斛。明白而切於事。傳誦至今。為法輕財樂施。喜趁人之急。聞有疾痛。欲去之如在己。始赴柘城。舊令尹遇疾暴卒。貧無以給喪事。公為具棺衾以歛。已而同寮與邑之賢士大夫皆賻。又為處其費。擇送吏與。凡行李所須。授其孤以行。守濟之日。道遇衰經數人。羅拜其前。泣曰。吾父倅臨淄。甫就官而得疾死。護喪次封內。貧不能歸。聞使君高義。故來。公惻然計其費。贖遣而去。祿賜所得。拊養孤嫠。收恤宗族。有秀公之風。郊祀。息以次。補諸弟。而不願仕者。任其子分田廬。公不取。推以奉寡姊族子。師尹游大學。不遂。困而歸。見公曰。儒冠竟誤人。幸今筋力未衰。尚堪馳馬試劍。收一戰之勳。毛錐子不足恃也。公笑曰。通塞有命。少安無躁。為具裝資。勉使卒業。遂收其科。後官至尚書郎。族婦新寡。有遺腹子曰。璿。舅姑憐之。命改適。而守節自誓。久益困瀕於飢寒矣。公周其之絕。又教畜其孤。進於學。學成試有司。一上中之。迎其母以養。族黨感歎以為榮。璿後以才選。荐更任使。將漕帥。遣褒顯其親。遂極光寵。公建州建陽縣人。曾祖曉。祖贄。不仕。皇考冲。以公貴。贈中奉大夫。元配令人徐氏。賢良。奕之孫朝散。即師甫之女。贈某國夫人。今配令人馮氏。贈少保。某

之女。左通奉大夫。充徽猷閣待制。躬厚之妹。有馴德淑行。為令妻。為壽母。中奉公孤立。一意委身事國。未嘗以家為恤。有子嗣興。纂序前聞。享有丕社。由令人善相其夫。而能教子。享年六十五。封咸寧郡夫人。後公十六年。當紹興四年。十二月乙亥。棄世。是月壬寅。合祔于少師之墓。改號瀛國夫人。四男子。曰机。曰模。曰梓。曰桶。四女。武學生翁。朝奉郎。知南雄州黃達。如。朝奉郎宗子。學博士李弼。朝奉郎朱棫。其壻也。孫男女若干人。公在事五十年。不治貲產。既得謝。無以歸。通判君奉安興。近還沂水。官下。疾稍侵。親客詣卧內省疾。且曰。公自言有四種生事。安在。公指四子曰。此是。已距今紹興乙亥。四子者。机。右朝議大夫模。右朝散郎梓。故右奉議郎桶。右朝請大夫。充敷文閣待制。孫曰巖。右登仕郎。曰岐。右迪功郎。曰品。右承務郎。曰岫。右承務郎。曰嶧。石迪功。即盛矣夫。嗚呼。君子種德。毓善。積之躬。修之家。責報於天。取必於數十年後。如探諸囊中。而敷文公逢辰得路。強仕之秋。已躋法從。追贈公至公師母夫人。進封大國。子孫蕃衍。簪笏如林。陳氏之興。蓋未艾也。始秀公葬其母荆國太夫人於潤之五州山。遂家焉。秀公夢又祔荆國之次。至是諸孤奉公之喪。還次潤。亦卜地於五州。不獲。一夕夢公刺汝州。擁騎從張。呵引如平生。犁旦瀛國與諸郎夢皆合。而不曉所

謂他日行焦山道中。顧見一穴。水深土厚。曼衍相屬。卜者曰：吉。問：山中人皆曰：儂家主人母所卜壽藏也。遂相隨造其家。一媪出見曰：老婦異時藏骨於是矣。忽夜夢若迎新太守者。俄頃一大人衣紫佩金。踞明床而坐。呼老婦前曰：此吾所居。非爾所當有也。方悖寤而諸君適至。願奉此地以獻。即其日書券予直。問其名則汝山也。遂舉以葬。於是諸孤屬待制馮公誌其葬。而墓隧之碑至今無辭以刻。數文公詒書晉陵孫某為之辭。某復曰：少師德烈靡不聞。數文鼎貴且大用。且得當世文章鉅公。具著顯庸。揭諸墓。方負罪屏伏田里。非其人也。辭不獲命。乃撫誌文終始大節著之。而系以銘。銘曰：陳世大家。發迹秀公。於赫少師。又亢其宗。結髮從軍。具著婉畫。儲倚缺然。公預其責。千箱稠至。曳踵頽肩。菽粟如山。露積不垣。士飽而歌。氣作一鼓。大袒高驤。馮河暴虎。螟蝗空起。彌滿一圻。電掃霆驅。甘雨應祈。左右具宜。文柔武克。由初訖終。挺身徇國。老去歸歟。駟馬安車。有來治中。擁笏垂魚。無地可廬。可耕可殖。田不踰寸。種之以德。汝視汝麓。其獲幾何。萬金之產。孰與予多。有嘉者子。持囊入侍。紹開厥家。戎公是以。

## 陳侁

延平志 侁字君舉。世卿子也。仁宗錄賢勞之後。補太廟齋郎。調潭州司法。福州羅源縣令。開水利渠。溉田千餘頃。治學舍以教。

邑子弟時祭酒鄭榜未仕。名德已重。公執謁造焉。請為邑子弟講說。日與諸生列坐俯聽。邑以大化。改大理寺丞。知黃巖安遠縣。轉太子中舍。知循州。歷殿中丞。國子博士。通判蔡州。公嘗以疾在告。聞將錄謀殺獄。取案視之。疑不入於死。召獄官入卧內。以法意曉之。使白守。守恚曰：吾白首法寺。於法反不熟耶。會法官李達以職事過境上。意與公適同。其議遂決。得脫死者五人。守由是知公。丁諷來治幕。未更民事。疑公以能握已。既而察公為鉅人長者。悉以州事聽焉。以比部員外郎知惠州。州有澧湖。方十餘里。堤壞湖涸。積數十年。而魚租尚存。公因冬閱民兵。假其力築堤扞江。魚鼈蒲蓮之利。悉以予民。俾鬻以當租。歲免緡錢五十餘萬。民德之名。其堤與橋皆曰陳公。始惠民未知麥。公教之。民乃競殖。有司考課。上其治為第一。轉虞部郎中知宿州。宿俗梗強。喜鬪盜。公橋其俗。糾之以嚴。纔九月而囹圄空虛。五月朝廷以其事付中書。移知開封縣。境內多盜。公曰：是凍綏使然。於是籍無家而寄食者。官為總括其衣糧。日給食。歲給衣。病給醫藥。卒之。通死減十九。因上其事請立法。朝廷行之。公為縣當熙寧之初。詔令一新。條目萬緒。壓於司農。事當一一稟承。不得少出意見。公請執政請得一州自效。乃除泉州。未幾。坐開封事罷去。州人相語太守以陷失青苗被罪。

能哀錢五千餘萬輸之縣官。當還我父母。合詞相唯。期三日而五千萬之數積於州門。然後相與詣部。使者言之。部使以聞。移知舒州。舒瀕皖溪。水暴漲。即齧城。壞民廬舍。公鳩民力築堤十餘里以防之。去之一年。水大至。與堤平。不為害。民感嘆曰。非陳公吾屬尚生而食耶。再知泉州。泉民聞公復來。老稚抃呼。爭走逆旁郡。至有灼臂於馬前曰。復見公矣。州之東湖。溉民田四萬頃。遇旱則湖涸。田廢。公教民以牛車汲潮水入湖。自是無旱歲。民至今思之。泉為州瀕海。人多賈販海外。在法往復。必使東詣廣。否則沒其貨。公憫之。奏疏願置市舶於泉。哲宗即位之二年。始詔泉置市舶。實公兆其謀也。公天性仁厚。動必以禮。言不苟發。雖家人莫見其喜愠。於物泊無所好。惟學問不倦。與人交際。一以誠信。治泉七年。以其官致仕。元豐二年。公子瓘登科。神宗顧問考官陳襄曰。第三人是甚人家子弟。襄曰。循吏陳備之子。上嘆息曰。循吏且有此子。宰職以下。聞玉音者。莫不禁之。初。公嘗名其子曰安老。命之曰。天下未嘗無美材也。然希至於道者。養之弗安耳。養得所安。則安於義。朝為上公。暮為逐客。安於得失者也。刀鋸在前。鼎鑊在後。安於死生者也。惟其安於死生。是以不變。士至於不變。然後盡乎義命。吾所以名汝。及長。是為忠肅公瓘。宋陳了齋集先君行述 公諱備

字君舉。秘書少監。累贈吏部尚書。諱世卿之子。受氏徙居族系。本末具載尚書公之碑。公三歲而孤。既冠。以少監子五遇大禮。特恩補太廟齋郎。調漳州司法參軍。為法受賦。民便之。及公且代。詣州乞留。公州為請。就注龍溪簿。移福之羅源令。始至。曰。孔子廟為學。延布衣鄭穆。將致之以教邑子弟。乃以公事趨府。委幣於穆。穆辭公曰。下邑僻陋。無秀穎之士。非其材。盡不美。教則不至。考德而問業焉。莫且於先生。願留聽而賜臨之。以為之師。豈唯子弟之賴。今亦與有聞焉。乃不果辭。穆至。升堂南面。正席講說。公日與諸生列坐俯聽。邑以大化。縣有荒地。得水則可墾。公為鑿渠。疏泉以溉。為田數百千畝。改大理寺丞。知台州黃巖縣。移虔州安遠縣。二縣去州遠。部使者罕至。今多不能。能亦苟不事事。公在黃巖四月。在安遠一年。及去。民皆涕戀。遮行。思之至今。轉太子中舍。移知循州。歷殿中丞。國子博士。通判蔡州。賜緋衣銀魚。覃恩。轉虞部員外郎。公嘗以疾在告。聞將錄謀殺獄。取案視之。疑不入於死。召獄官至卧內。以法意曉之。使謂守曰。是獄也。宜加審焉。獄官未之曉。守亦不聽。將遂錄之。公病未聞。強起視事。以故未得錄。守恚曰。吾白首法寺。於法反不熟耶。通判第移疾。獄有差。無累也。奚所虞而校如是。公曰。獄繫人命。所宜重。且不嫌累已。是尤不可苟且校也。持

議未決。會法官李達以職事過境上。公問焉。達意與公適同。議乃決。得脫死者五人。守由是知公。後公堂除得郡。用其薦。即龍圖閣直學士錢象先也。錢去公攝州事。確山報獄囊頭拘械。公閱案已。即稅之。諸從事皆驚。問其故。公徐曰。竊盜拒捕。法不至是。汝陽富民宮婢死。瘞之。覺焚其屍。事方廷訊。州獄自以得鞫。皆將邀賄焉。公訊之曰。婢犯主殺之。無罪。獨殘其屍。為入於法。即日以其罪論之。丁諷來治蔡。諷久於詞館。未更民事。始疑公以能擢已。既而察公為鉅人長者。悉以州事聽焉。公於所處。盡使其跡常出於諷。公之有助。衆莫得而知。及諷治他郡。聲績不能如蔡也。轉比部員外郎。知惠州。州有廢湖方十餘里。春夏積水。潦行者病涉。其地水不可牧。旱不可藝。其廢不知幾何時。而環湖之民。故有魚租。湖廢而租在。公因冬閱民兵。借其餘力。築堤扞江中。設斗門為水道。潦退水不得出。盈則泄之。江蒲連魚鼈之利。悉以予民。構亭具舟。載肴酒。聲伎率僚屬賓客。時節游燕。中州之士。聞公賦政起弊。不鄙夷其俗。隨所施設。與民胥樂。多為公賦詩者。而州人命其亭橋。皆曰陳公。以示不忘。民未知麥。公將教之。乃於立春勾芒之祀。前期墾布麥種。立土牛其上。遠農來觀。牛見麥苗。知可殖。乃競殖焉。州以有麥。緣海之民。相驚有寇自海上來。且至。提點刑獄晁宗恪

攝帥廣州。疑懼不知所為。閉門飭備。發兵旁郡。兩路騷動。野居之民。驚逆流徙。公曰。是必海舶有還至者。寇來不先聲也。不為備。班春於湖上。民恃以不恐。既而果非寇也。覃思轉駕。部員外郎轉虞部郎中。除宿州。宿俗疆梗。喜鬪盜。囹圄充斥。以為常。公至。橋其俗。糾之以嚴。姦猾尤無良者。茶法必行。無所賞。訟衰。獄空。治聲彰著。而州當水陸之衝。賓客雜還。臺謁驛給百須之物。有不慊其意者。騰謗於上都。曰。不治莫如宿。獄繁而不決。盜縱而不捕。至朝廷遣使詢察。不如所聞。知其為謗也。執政乃始有知公者。會開封令避親。當對移。移公開封。轉比部郎中。縣境多盜擾。居艱。道路捕得皆壯役。下卸。竈務卒。公曰。是凍餒使然。於是藉其無家而寄食者。官為總括其衣糧。日給食。歲給衣。病給醫藥。又為連竈土床。穴其下。冬則畜炊煙。以燠之。為法以受其長。杜其侵牟。卒之通。死減十九。因上其事。請立法。至今行之。公為縣。當熙寧之初。詔令斬然一新。法施乎縣。自內始。條目萬緒。壓於司農。事當一二。稟承不得少出其意。公詣執政。請曰。赤縣名。擢材之地。不材瘠官。是懼。願得一州自効。乃除泉州。未幾。卒。坐開封事。罷去。州人方怙冒德政。始聞。歎歎相語。太守以陷失青苗錢。被罪。能哀錢五千餘萬。輸之縣官。當還我父母。合辭相唯。無一人以罄匱解。多者至捐百千。少者

一二錢期三日而五千萬之數積於州門。然後相與詣部使者言之。部使者以聞。公至闕下。一年事釋。轉駕部郎中。除知舒州。州瀕皖溪。公調薪石。鳩民力築隄十餘里。以防水患。明年公去。水大至。平隄不為害。部使者上之。詔獎後守。民則曰。陳公之惠也。秩滿。就除泉州。泉民思慕既久。聞公復來。老稚抃呼。爭走逆旁郡。至有灼臂於馬前者。曰。復見公矣。時賈青為轉運使。青貴家子。駢駘殘刻。部之材良。掇拾無免者。聯事者耻名出其下。以苛察相勝。民大凋困。公之來。非青等意善。潭守陳洌奏曰。洌材請使治泉。漳小郡。得某足矣。不行。青等不自得於泉。事務為挫。握常咄咄毀公。或解之曰。泉州愷悌人也。青嘻笑而嫚言曰。愷悌愷悌。蓋謂愷悌為可簿云。東湖舊溉民田四萬餘頃。歲旱。湖涸田廢。公教民以牛車。汲潮水入湖。復以灌漑。自是環湖之田無旱歲。進士解發。故事有鹿鳴宴。自修例冊削其費。公曰。茲費有為也。奚可已。以俸錢為之。會大禮。進勳上柱國。賜四品服。泉人賈海外。春去夏返。皆乘風便。熙寧中。始變市舶法。往復必使東詣廣。不者沒其貨。至是命轉運判官王子京。拘攔市舶。子京為盡利之說。以請拘其貨。止其舟。以俟報。公以貨不可失時。而舟行當乘風便。方聽其貿易。而藉名數以待。子京欲止不可。於是縱跡連蔓。起數獄。移牒譙公。沮國法。取

民譽朝廷所疾。且將并案。會公得旨再任。詔辭溫渥。子京意沮。而搜捕益急。民駭懼。雖藥物燭棄不敢留。公乃疏其事。請曰。自泉之海外。率歲一往復。今迂詣廣。必兩駐冬。閱三年而後返。又道有焦石淺沙之險。費重利薄。舟之南日少。而廣之課歲虧。重以拘攔之弊。民益不堪。置市舶於泉。可以息弊止煩。未報。而子京倚法藉沒。以鉅萬計。上即位。子京始懼。而遽以所籍者還民。州有獄死者十有八人。疑可宥。而請事下監司覆案。子京得之喜。宣言曰。是非死獄。朝廷欲生之。使某人往鞫。獄變。劾公。公曰。活死者本郡守之意。又欲辨之乎。獄官避失入重譴。問之不承。公得代。且行。部使者以獄事留公。公不為留。猶牒所居郡止公。公欲引年乞謝。以是不得請。欲如洪省親。不得行。初公既孤。所生母劉氏適洪州潘氏。生承事。即與嗣。公既仕。詣洪迎劉之漳。官滿興嗣來迎。以歸。他日公又往迎馬。興嗣不可。公母子不能奪也。官必擇東南。赴罷往來。必一至親側。兩姓子孫。朝夕承起居。問安否。誥誥如一家。而公與興嗣。又皆以賢名于世。及公進於朝。以特恩累封劉氏為彭城縣太君。曰。最後繫官于泉者五年。淹恤于鄉。又三年。太夫人過九十。足廢不能履。書來公泣下不能視。謂其子曰。吾平生游宦四方。時得一寧省。雖隔閭未嘗三四年久也。今太夫人耄矣。又疾。吾亦老。

恐不復相見。負悔天地。將乞謝徑。往事適不可奈何。明年三月。獄事始報。公以無累。是月公請致仕。遂如洪待報。公與太夫人皆皓然白首相見。喜極泣下。大夫人強為公飲。親舉酒酌公。驩甚。未幾。公得疾。既病。為大夫人言曰。千里遠來。不得朝夕侍。以疾貽憂。大夫人泣亦泣。既而曰。臨老得復相見。雖就木焉。瞑矣。退謂其子曰。吾死亟以喪歸。無久於此。重太夫人憂也。初公既解泉州。以覃恩進階朝議大夫。至是守本官致仕。授告之夕。以壽終。元祐元年七月丙寅也。享年七十有二。母羅氏。累封仙源縣太君。前夫人杜氏。追封長興縣君。今夫人杜氏。封永和縣君。男四人。曰瓊。汀州軍事推官。曰珏。蘇州常熟縣主簿。蚤卒。曰權。宣義郎。曰城。假承務郎。女五人。長適朝請郎致仕張知古。次適和州防禦推官知潤州金壇縣事葉唐。稷次適進士楊公輔。次適饒州鄱陽令李深。次未嫁。孫男九人。全郊社齋。即正裕。正冲。正平。正方。正忱。正孺。正弼。孫女六人。將以二年某月某甲子葬于某地。公天性仁厚。動必以禮。燕居齋如也。與人言不苟發一辭。於身之得喪利害。雖家人莫得其喜愠。周人之急。不前計有無。樂獎人之善。務掩人之過。於物泊無所好。唯問學不倦。姊貧。悉挈其甥之官。男教之學。後為善士。女擇所宜歸之。奏薦先其兄之子。後其子在官。不忽細務。自為曹掾。

固已得民。其長民以教化為先。所至必斥大學舍。新祭器。歲時親率諸生行禮其中。其罪責人不發詞色。於獄每求所以生之。其為防限。寬而不可踰。始至。民或未便。已而安之。去思又益不忘。其去羅源三十年。過其邑。父老載壺漿出境迎拜。問長官無恙。及行。猶皆涕戀。鄉民困於鹽。公為移書郡得損計口之數。又患鄉校之廢。誘率里人得米三千斛。構屋為田。益市書以便學者。公歿。士歎於學。喪歸。空一邑。變衣出送。無不悲慟。泉羅源父老聞公之歿。亦皆率其子弟序哭於學。其民皆為位於佛祠。以哭。泉之人尤哀。市者輟肆。行者相弔。惠澤之在民。可槩知也已。唯其沉默不為表襮。渾無觚角可見。又其所試者小。著於行事終此而已。其命也夫。其不幸也夫。公與人交。一以誠信。無不為之盡。不於其人之賢否輕重。示高下厚薄之迹。以迹求公。未有知公者也。唯陳襄鄭穆與公遊最舊。襄顯屢薦公於朝。宰相吳充亦知公。然不克薦。公老於為郡。無不憚之意。駸童刻吏乘時侵蔑。衆意不堪。而象垢受侮。主於右民。未嘗有幾微見於辭色。知公者謂公為有待也。然止此而已。其非命也歟。其非不幸也歟。將以傳世行後。唯顯刻是賴。謹叙次行治終始。伏俟採擇。孤子陳權泣血述。黃氏日抄。陳君舉葉正則。永嘉之學。又不及金溪。戴少望尚有些實說。葉正則都是閑。

說。又云陳君舉有周禮類數篇。又說漢唐好處與三代暗合。陳同父才高氣粗。葉正則只杜撰進卷。見戴肖望湖南語。說却平正。朱子語類君舉得書云。更望以雅頌之音。消鑠群慝。章句訓詁。付之諸生。問他看如何。是雅頌之音。今只有雅頌之辭在。更沒理會。又去那裏討雅頌之音。便都只是瞞人。又謂某前番不合與林黃中陸子靜諸人辨。以為相與詰難。竟無深益。蓋刻畫太精。頗傷易簡。矜持已甚。反涉吝驕。不知更如何方是深益。若孟子之闢楊墨也。只得恁地闢。他說刻畫太精。便只是某不合說得太分曉。不似他只恁地含糊。他是理會不得。被眾人擁從。又不肯道可不識。又不得不說。說又不識。所以不肯索性開口道這箇是甚物事。又只恁鶻突了。子靜雖占姦不說。然他見得成箇物事。話間便自然有箇痕跡可見。只是人理會他底不得。故見不得。然亦易見。子靜只是未從他。便不說。及鉤致得來。便直是說。方始與你理會。至如君舉習中有一部周禮。都撐腸拄肚。頓着不得。如遊古山詩。又何消說着。只是他稍理會得。便自要說。又說不著。如東坡子由。見得箇道理。更不成道理。又却便開心見膽說。教人理會得。又曰。他那似得子靜。子靜却是見得箇道理。却成一部禪。他和禪識不得。實孫呂東萊麗澤集。祭陳君舉。嗚呼。理固難言。事堪永歎。尚斯

文其未熄。倘千載而莫旦。自夫孔門之徒盡。經術缺。馬遷而下。史法亂。微言卒墮於佛老。多識不離乎箋傳。惟公紹絕學之遺統。緬潛心於一貫。立六藝之要津。涉九流而弗畔。既超乘於先得。亦加鞭於後倦。可謂明古人之大體。而能通當世之變。泛觀人物。粵自秦漢。勲臣擅其氣畧。儒雅隆於辭翰。通人焉草草。法士焉斷斷。以余觀公。與夫專善偏長之士。豈可同日而論也哉。若乃推本皇家。講求文獻。嘗以為藝祖造邦。上基周室。而仁皇繼體之際。庶幾羞道於管晏。痛小雅之未復。先群疑而獨辨。推公之志。歐富韓范。緝熙寧之墜緒。振元祐之餘筭。又將會同錯綜。招雋集散。回萬牛於絕軌。手六轡以除按。合一代之玉石。出中原於塗炭。蓋又渡江諸老。皆有遺恨者也。嗚呼。憶學省之初識。惟伏燭之方燭。及脩門之晚別。幸後會之猶見。想此意之猶屬。若一體之中判。年偶同而智遲。名近似而實遠。溘騏驥之先祖。望孤征於款段。參移步斗沒。長夜兮漫漫。耿余懷其何極。訴之人而有限。對宿草而長號。真精爽之一盼。嗚呼。哀哉。尚饗。宋葉水心集。祭君舉中書文。嗚呼。惟公勤而無苦之累。敏而成鈍之功。豈徒意講聖賢之精蘊。固已實考王伯之汗隆。所欲說之空言。又曰。不如此載之行事者。皆古人之未及。詎廣學而希通。有能行之。審周道如貫珠。曉百世若發蒙。開章程於草昧。調

轡策於駕。瘡其廣其長。其深其崇。可以運之掌上。而措之環中。嗚于海陬。敗獲瘦筇。暴名如雷。新語如風。宿老負墻。豪雋景從。而時文靡然。由之一變。遂為多士之宗。好惡順逆。凡几恭恭。進退用舍。侃侃難難。機慮內沉。笑語外融。曾未施其一二。而謗大於山。忌衆成叢。洗足南塘之流。振袖葑村之岑。帝曰汝歸。公寐無聰。嗚呼哀哉。世事多端。非智非窮。謂其易研而復難工。有或問之。掩昭以聾。惟其不磨。植厚于穹。自我獲見。四十餘冬。其術則殊。其論鮮同。偉標寒而韻遠。繫死始而生終。異疾侵陵。美人西東。天罰不宥。銷殞併空。公既棄我。又遭鞠凶。日餘幾何。而不隨公。覆酒成池。有痛填膏。

## 永樂大典卷之三十一百四十一

## 永樂大典卷之三十一百四十二

九真

陳

陳襄

宋史列傳襄字述古福州候官人少孤能自立出游鄉校與陳烈周希孟鄭穆為反時學者沈溺於雕琢之文所謂知天盡性

之說皆指為迂闊而莫之講四人者始相與倡道於海濱聞者皆笑以驚守之不為變卒從而化謂之四先生襄舉進士調浦城主簿攝令事縣多世族以請託脅持為常令不能制襄欲稍革其俗每聽訟必使數吏環立於前松謁者不得發老姦束手民有失物者賊曹捕偷兒至數革相撐拄襄語之曰某廟鍾能辨盜犯者捫之輒有聲餘則否乃遣吏先引以行自率同列詣鐘所祭禱陰塗以墨而以帷蔽之命群盜往捫少焉呼出獨一人手無所污扣之乃為盜者蓋畏鍾有聲故不敢觸遂服罪知河陽縣始教民種稻富弼為郡守一見即禮遇之襄留意教化進縣子弟於學或讒之於弼謂其誘邑子以資過客弼疑焉人勸毀學舍以塞謗不聽久之弼以語襄襄曰自反而縮雖千萬人往矣公苟有感志何名知己益講說不少



懈。弼由是愈益奇之。及入相。薦為秘閣校理判祠部。譯經僧死。遺表度十僧。列于廟。三年度一道士。皆抑不行。知常州運渠橫遏震澤。積水不得北入江。為常蘇二州病。襄度渠之丈尺。與民田步畝。定其數。授以浚法。未幾。遂削望亭古堰水。不復積入。為開封府推官。監鈇判官。神宗立。奉使契丹。以設席小異於常。不即坐。契丹移檄擅吏。出知明州。明年。同修起居注。知諫院。改侍御史。知雜事。論青苗法不便。曰。臣觀制置司所議。莫非引經以為言。而其實則稱貸以取利。事體卑削。貽中外譏笑。是特管夷吾商鞅之術。非聖世所宜行。望貶斥王安石。呂惠卿以謝天下。又乞罷韓絳政府。以杜大臣爭利而進者。且言韓維不當為中丞。劉述范純仁等無罪。宜復官。皆不聽。而召試知制誥。襄以言不行。辭不肯試。願補外。安石欲以為陝西轉運使。帝惜其去。留修起居注。襄懇辭。手詔諭之。乃就職。踰年為知制誥。安石又欲出之。帝不許。尋直學士院。安石益忌之。擿其書詔小失。出知陳州。徙杭州。以樞密直學士知通進銀臺司。兼侍讀判尚書都省。卒年六十四。贈給事中。襄涖官所至。必務興學校。平居存心。以講求民間利病為急。既亡。友人劉尋視其篋。得手書累數十幅。盈紙細書。大抵皆民事也。在經筵時。神宗顧之甚厚。嘗訪人材之可用者。襄以司馬光韓維呂公著蘇頌范

純仁蘇軾至於鄭俠三十三人對。謂光維公著皆股肱心膂之臣。不當外。謂俠愚直敢言。發於忠義。投竄瘴癘。朝不謀夕。願使得生還。帝不能盡

用。史論載在鄭俠後。

**東都事畧**

陳襄知諫院。改侍御史。知雜事。時王安石

為政行青苗法。襄上言。臣已三奏乞罷青苗。而陛下未以臣為然。臣觀制置司奏請。莫非引經以為言。而其實貸民以取利。是特為管仲商君之術。非陛下之所宜行。臣願陛下為堯舜之君。以仁義治天下。不願陛下為霸王也。陛下富有中國。廣輸萬里。內無疆臣敵國之患。外無西戎北狄之難。凡四海九州之賦。入供吾之用。不為不足。陛下不於此時與廟堂之臣坐而論道。以行王政。而反屑屑為均輸舉貸之事。臣竊為陛下惜之。又乞貶斥王安石。呂惠卿以謝天下。奏五上。又乞免劉琦等罪。召還范純仁除直舍人院。兼天章閣待制。明年知制誥。直學士院。襄既忤安石。以草河北詔言水不潤下。中書改之。又赦文有奉祠紫宮以為語犯俗嫌。出知陳杭二州。入知通進銀臺司。遷樞密直學士兼侍讀。卒年六十四。襄有學行。與陳烈鄭穆周希孟友善。閩人謂之四先生。所至務先學校。至親為講解。好薦達人材。喜愠不形于色。為政多慕古人所為。然或迂闊。頗不為人所服云。姓氏。遙華。襄知浦城縣。摸鍾辨盜。在經筵。薦司馬光等三十三人。紹興元

年詔曰。近得襄薦章。司馬光而下三十三人。德行言語。政事文學。斯為盛矣。文集曰。有德之言。君子之文。上為人主所欽。下為士大夫所宗。誦其詩。讀其書。想見其人。襄孫輝。杭州太守。輝子燁。持麾節湖廣四川。元一統志。常州府陳襄。以秘閣校理判尚書祠部。出知常州府。庠下窄。不足以容生徒。襄勤於經始。成以不日。其規模氣象。遂為諸郡庠序之冠。襄晨入其中。坐授諸生經義。旁決郡事。由是毗陵學者盛於二浙。治平間。召還。將行。委官關公。得雜收無名錢數百萬。因召積年有官逋未償者。悉以代輸。襄談於宴樂。故有餘足以周物。常州運渠橫遏。震澤積水。不得北入于江。以為常蘇數邑民田之害者累世矣。襄以渠之丈尺。對民田之步畝。分授有制。不月而成。遂削望亭古堰。而震澤積水乃克北流。民害以除。而田旱有溉。豐穰歲饗矣。召還。修起居注。知諫院。又按王安石學記云。嘉祐六年。樞密直學士陳襄鎮此邦。乃鼎新黌宇。州子弟相率而至。四方之士。輕千里而來。乃延聘良師。表厲論說而教之。名臣言行錄。公為主簿。集其士子弟。及庶民之好學者。教于縣庠。使孝于其親。順於其昆。信於其鄉。仁於其民。由是為其父兄者。更相糾戒。不可以非禮于吾簿焉。時有禁近大臣。扶護親喪還閩。衢州以南。所過邑皆調民丁七百。送其行李至浦城。公曰。農

時方作。雖王命尚不可奪之。矧以為私邪。乃令就賃以後。劉執中撰詞堂記。陳迂古密直知建州浦城縣。曰。有人失物。捕得莫知的。為盜者。述古乃給之曰。某廟有一鍾。能辨盜。至靈。使人迎至後閣祠之。引群囚立鍾前。自陳不為盜者。摸之則無聲。為盜者。摸之則有聲。述古自率同職。禱鍾甚肅。祭訖。以帷帷之。乃陰使人以墨塗。良久。引囚逐一令引手入帷摸之。出乃驗其手。皆有墨。惟有一囚無墨。訊之。遂承為盜。蓋恐鍾有聲。不敢摸也。此亦古之法。出於小說。筆談。公在河陽。邑居隘陋。盛夏。公出。家人間或垂簾。納涼於廳事。既而其積失官緡錢二萬。守者以為辭。公不辨。出已俸償之物。議喧騰。富公亦以為信。未幾。盜獲於它邑。乃守積者為之。河陽里胥運置酒村。破蕩產業者。世以為病。公命浙東。從之學者。張公謬以百金僦田。兩夫募農師。引沃水灌為稻畦。種以糯穀。比其耕。拚耘。耨。收割也。必躬泣之。而其往來。皆用盛樂。招集其民。俾觀稼穡之法。酒村既足。民胥効之。瘠鹵之地。遂為膏腴。溫造故迹。復生杭稼矣。詞堂記。熙寧二年。陳迂古學士襄。自右史遷臺。雜近例。左右以補。知制誥臺雜。乃叙遷三司副使。於是特降旨。候知制誥闕。與召試。襄辭曰。陛下以義使臣。則臣敢不惟命。是聽。豈可計校資地。以為輕重。况義之所在。知無不言。夫豈知銖鎰之在前。而寵

祿之居後哉。一有願利避害之心。則依違姑息。無所不至。身且不正。焉能正人。乃許追寢前命。明年。以言青苗事復為右史。又歲餘始掌誥命。呂氏家塾記。召試知制誥。公不就。奏曰。朝廷比以制置條例司。改更常平新法。中外之議。皆以為擾。臣負憂責。不得不言。未能開悟聖心。蚤令寢罷不職之罪。不知譴其所有。召試。臣不敢當。旋罷知雜直舍人院。兼天章閣侍講。復修起居注。皆辭以為言事不職。不敢承命。仍乞外補。御批其疏。近除知制誥。卿以言事未遂。懇不受命。且求外補。朕素慕卿經術行已。深惜遠去。故特還舊職。庶幾左右經席。漸磨道義。以適所願。聞今覽來奏。尚欲固辭。豈未悉朕意歟。今還卿來章。當函就職。遂復修注判銓馬。詞堂記。熙寧中。陳州一日晨起。屋瓦盡有冰文。作花果鳥獸狀。如雲母印著粉紙。時陳襄侍讀守淮陽。有屬請奏祥瑞者。公云。此事當奏。但非瑞奏耳。但作奏云。有此詳異。不敢不奏。以竹卷盛瓦數十枚。奏呈。冰文雖消。痕跡猶在。識者皆以陳公為得體。韓莊教遺事。公生平講求萬民利害。雖非其職。必錄于篇。會其部使可以立事者。則以授之。利及四方者。又不知其數焉。凡于朝廷治體。州縣養民之事。必求其術之可以為法者。鰥寡孤獨。遺棄幼子。災傷水旱。凶札疾疫。恤窮安富。養老勸農。治兵牧馬。練將守邊。積穀生財。差役漕

運之事。莫不夙夜圖營。精密曲盡之術。而又詢於賢者。明者。能者。不憚謙遜。屢求廣諮博訪。既得一善。則又稱其得之所自。而推以授人。此其平生存心。凡四十年弗懈也。既亡。彛檢其手書。議及民政。講求治道。或以相授。或以相諮。凡餘百本。或累至十幅。盈紙細書。講論得失。則其以天下為已憂也。又如此。使之大用。豈可量哉。詞堂記。富丞相當國日。引陳襄述古為上客。述古所以告富公者。盡仁義也。有不悅富公者。造為五鬼之號。而襄在其一。夫流言待無知而傳。至智者則止矣。以富公之賢。其門豈無善士。以述古之賢。而肯為人作鬼乎。呂氏家塾記。公之平生。以道德教育天下英才為已任。故以學業出入其門者。無慮千人。而齒于仕版。輔大政。親近侍。列臺閣。師邊防者。有矣。守方州。使諸路。佐郡邑。宰人民者。所至多焉。莫不知所以仁民為固國之本也。治已為臨下之範也。學古為修身之資也。事親為行道之始也。官于四方。而民受其賜者。皆公之所教也。不止如是焉。自始達及終身。凡聞天下之賢。有學行者。有吏能者。有道德者。有忠義者。其才可以進之于朝。以為民庇。及具表則者。不必識其人也。必書其實。以遺其所部使。牧守。或執政柄者。未登其賢。而用不已也。因之拔擢。致身於身顯。而不知其自於公者。眾矣。是以其亡。四方髦士。及公卿大夫。識與

不識若喪其明。咨嗟靡息。馬公之於學。志在攷古。以治其性。為本。事君以建其忠。為業。故雖燕居。必持厥志。謂暴其氣者。不可以入君子之德。是以雖家人藏獲。平生未始見其不足之色。銳於經綸。天下大務。尤能受盡言。樂聞已過。喜於為善。度量淵廣。長於包荒。樂於教民。其職精於治體。其政先於變俗。其仁勤於濟眾。其文貴於謙光。故其出入中外。裕裕然弗以進退榮辱動其心焉。每日惟大人為能格君心之非。吾徒之事也。其知諫知雜言出至誠。詳審有緒。不為激訐。故雖譏病大臣。補救時政。上每嘉納而多留中。詞堂記。**宋葉祖洽集**承奉郎守秘書省著作佐郎知太常寺陳先

生行狀。公諱襄。字述古。其先本光州固始人。當五代之末。隨王氏入閩。因家于閩之福唐。今為福唐人。公之考以公贈兵部侍郎。昆弟五人。長兄諱則之。好古力學。以文稱。鄉黨間號為處士。絜諸孤。隱居古靈村。侍郎尚幼。長兄知其質美。可以起家。趣使事學。卒克有成。得官真宗朝。主邵武軍歸化簿。公時隨侍。在官始十餘歲。侍郎常選縣之老儒使教焉。每為文。辭教者多自以為不及。往往辭避。知縣沈君一日過侍郎。至公之書室。見其一榻凝塵。枕席皆不治。因告侍郎曰。公之子器度甚遠。宜善視之。而侍郎亦自謂是子必能大吾門。後授台州之黃巖尉。未赴任而卒於道。公方十

八歲。扶柩反葬。執喪盡禮。公既孤且多病。常以先君侍郎之言為念。居間益自策勵。上事繼母以孝。下教弟妹以義。方求士之賢者。親而友之。得其鄉士陳烈。周希孟。鄭穆為之友。四人者。氣古行高。磨礪錫切。相期天下之重為己任。是時學者方溺於雕篆之文。相高以收名聲。所謂知天盡性之說。皆指以為迂闊。而士亦莫之講也。公與三人者。獨以斯道鳴於海隅。聞者始皆笑人而驚。四人者。不為變。守之益堅。躬行於其家。由家達於州閭。人卒信而化之。父兄皆飭其子弟請從之。由是閩中士人宗之。謂之四先生。雖有誕突盜傲。不可率者。不敢失禮於其門。已而四先生之名。且傳之四方。從之學者。日益眾。然出公之門。顯者居多。公慶曆二年。中進士及第。主建州之浦城簿。會邑闕令。公獨當縣事。邑之封疆遠。且多世族。前後令罕能制蔽。蒙請託。習以為常。公夜寐夙興。務究其弊。訟之難聽。而積久者窮極本源。剖決無留。有請託者。惜其士類。不欲遽繩以法。每聽訟。必使數人環列於前。私謁者無所發。由是邑人知公之不可干。老姦宿贓。縮手喪氣。民畏且愛。爭圖公之像。以神事之。至今。先有詔郡邑興學。公遂諭邑之富人。出所餘以繕學舍。成使邑之子弟造焉。公為人學。講說不數。士之自遠方來者。至數百人。部使安刑部積始。至其縣。公即以十事便於民者。干

之安呼吏議之。立行其七。徐又行其三。人受其賜。部有疑獄。多委公決。俄舉台州仙居令。時新有詔舉令。而公哀然為首。仙居為縣僻陋。民不知教。公於正歲。因耆老來賀。作勸學一篇。使門人管師復讀於庭。且諭之曰。吾秩滿即去。爾有子弟。亟遣就學。於是耆老相與感泣歎嗟。從之翕然。每過社稷孔子廟。必下而趣。邑人自是有所矜式。學者興起。縣有西圃。燕廢弗葺。縱民耕種其中。然每有興建。必為民利。故瓦木之資。不責於民。而樂輸之。下至織席之微。亦願出所得助焉。及公去也。老幼攀車遮道。幾不得出境。皇祐三年。改著作佐郎。知益州河陽縣。會司徒富公。亦自鄆移鎮河陽。公常以自負所學。不見知於當世名卿。及得富公從之。甚喜。富一見公。亦厚遇之。二人相得以道義。故有所為。無不以公言為聽。燕遊登臨。必與之偕吟詠樽俎。更和迭倡。富嘗曰。陳著作。奇才也。公亦自以為仲於知己。縣之西有齋舍。俾治新之。率邑子弟於學。至弛身後。以誘之。又命其徒張公。諤吳道分教之。民莫不聳勸。俄有謗者。謂公誘邑子以資過客。富公聞之。不能無惑。志以問公。公對曰。自反而縮。雖千萬人。吾往矣。公苟感誘。何以為知己。富不能折。其親舊聞之。有自京師來責公者。曰。可毀校以塞謗。公笑謂曰。以一謗者。使諸生遂不得聞道。其於自任何如。卒不毀講說。不為

少懈。然後富公始竒之。知其自信之篤。先是邑人多不是學。公為令於此。士之名於薦書。而取科第於朝者。累累有焉。土人不習水田之利。上之人雖有知者。憚於興事。亦莫之敢。公因政之暇。行相地。且得水之可以溉田者。言之。州未之信。公命其徒出泉十萬。僦田二頃。以試之。粳稻果大收。得穀以償出泉者。其餘猶足以供官。河陽人大享利。至和初。遷秘書丞。就移彭州濠陽縣。舟行至夔。而富公自太原入相。以文學政事薦公。嘉祐二年。遷太常博士。召試祕閣校理。明年判尚書祠部。遇權貴人。奏乞寺觀名額。且度僧人道士。公堅執著令。不為行。因奏言。近年以來。自官闡宦官。以及要近。一例陳乞。蓋秉政大臣。不為陛下愛惜典刑。首為瀆亂。所有詔令。未敢奉行。尋罷祠部。編書昭文館。六年。以祠部負外。即出知常州。州南濱大湖。民欲取水浸灌。而限以運渠之高。勢不能導浚。修之則費極大。累政患之。公與漕使。今集賢殿修撰。李復圭同志協力。一月畢功。州民到今賴之。郡庠下窄。不足以容生師。公勤於經始。成以不日。其規摹氣象。遂為諸郡庠序之冠。公晨入其中。坐受諸生經義。旁決郡事。由是毗陵學者盛於二浙。每歲取士。得常多於他處。八年。由度支負外。即為司封負外。即賜緋衣銀魚。治平初。以開封府推官。召之。將行。委官閱公帑。得雜收無名錢數

百萬。因召積年有官。通未償情。可矜而力不足者。悉以輸之。蓋公淡於宴樂。故有餘。足以周物。三年。由開封府入三司。為監鈇判官。明年上即位。奉命使虜。虜人欲以坐先之。公以使者不當辱命。固爭以禮。虜不能屈。使還。以工部郎中。知明州。未至。熙寧初。召還。以刑部郎中。修起居注。尋知諫院。管勾國子監。時有詔。令兩制臺閣。臣僚議學校貢舉之制。公因奏事。得其本。則為之甚易。陛下先求賢德。使位師長。則百度可不勞而成。伏見常秩。陳烈。管師常。程頤。經行脩明。宜召為太學官。使學者有所師法。未幾。罷諫院。兼侍御史。知雜。有旨。候知制誥。有闕。與試。公上疏言。陛下必以臣自內史。過為臺雜。乃是下遷。遂有此命。陛下以義使臣。臣當惟命是聽。豈敢較計。以為重輕。况知雜之任。上裨朝政。下正臺綱。豈知鈇鎖之在前。寵利之在後。一有顧避之心。則依違姑息。無所不至。願寢前命。詔從之。俄兼判吏部。流內銓。賜金紫。銓中士人被舉者。常積二百餘員。累年方得召對。執政苦官之冗。欲難其進。以為澄吏良法。公曰。不清其源。而澄其末。何益。遂白執政。請得併伸引對。自是被舉者無滯淹之患。又言。近日臣僚家用恩例。陳乞親屬。任使多是衝改。已授人。遠方寒族。往復疲敝。非立法之意。乞自兩府而下。如有陳乞。並於季闕以前。預指某處。不得臨時換易。士人便之。

方是時。朝廷一新天下法度。革故之始。尚駭群聽。公數上疏論列。言多留中。嘗言。人君先於知道。其次在得賢。然後務立法度。其說多見嘉納。偶論事未報。一日。中書來召。稱有旨。令試知制誥。公辭免。不肯下筆。時有執政使人趣之。公遂巡謝之。徐奏曰。臣以負憂責。不敢不言所欲言。未能開悟聖心。方且待不職之罪。未知譴所。所有召試。非臣敢當。旋罷言責。除直舍人院。兼天章閣侍講。復兼修起居注。皆固辭。仍乞補外。上深器之。遂賜手詔云。近以卿知制誥。卿以言事未遂。懇不受命。且求外補。朕素慕卿經術。行已深惜。遠去。特還舊職。庶幾左右經席。漸磨道義。以釋所願。聞。今覽求奏。尚欲固辭。豈悉朕意歟。還卿來章。當亟就職。不獲辭。命復修注。判銓。四年。除知制誥。兼直學士院。不數月。出知陳州。未期。移杭州。杭為都會。賓旋之衝。又屬朝廷相繼遣使。公外應接。使客內撫循士民。州不知其擾。杭雖號水鄉。而地斥鹵。可食之水常不繼。唐相國李長源。舊為六井。引西湖以飲民。井既久廢。不修。水遂不應。民用公命。工討其源流。濬而甃之。井遂可食。雖遇旱歲。民用沛然。皆誦佛以祝。命通判蘇軾為之記。公在杭二年。移應天府。未至。又移陳州。陳地勢卑。每遇霖雨。遂無通溝。民苦之。公命修八字溝。以溲水。城中無泥行之阻。州之學舍隘甚。自范文正公有意闢之。數

十年矣。公一朝以官舍廣之。親入學與諸生講中庸。州人始不務學。至是踴躍自奮。公嘗釋奠學中。州人各遣童稚觀禮。公一以善言循循誘之。莫不感勵。八年。召還。知通進銀臺司。兼門下封駁事。提舉進奏院。公去國數年。一旦見上。慰勞有加。宣諭久之。即除石司郎中。樞密直學士。判太常寺。兼禮儀事。明年。兼侍讀。知審官東院。又明年。提舉司天監。元豐元年。修郊廟奉祀禮文。明年。兼判尚書省。是年十月。慈聖光獻皇后山陵。上特選公為鹵簿。使護葬事。受命而公已病矣。上使中貴撫問。公且辭使事。期迫猶不改差。三年三月十一日。卒於京師。將終。其妻子環泣。求所以語後者。公沉然而應曰。夫何言。安以歿之耳。因索紙筆。書先聖先師四字付其子。嗚呼。然後知公深達於性命之理。而其所以語後者。孔顏之道而已。公之疾也。上數問左右大臣曰。陳某疾減耶。其亟也。再遣中貴存問。而公已不及見矣。其亡也。奏至。上為愴悼。贈給事中。官其子姪。特及外孫。加賻贈馬。上方知公行且用矣。公亦素有自任之志。期見於用。而命有所制。悲夫。公為人寬厚長者。而臨事有不可犯之色。勇於為義。其氣渾然。人欲以喜怒探之。終莫之得。遇利害得喪。恬如也。其接物誠。其與人恭而溫。與之遊者。不覺鄙吝之失於心也。公之亡。士大夫相弔於朝。處士相弔於家。皆曰。德人

往矣。所至汲汲以興利教民為事。蓋其兼濟樂育之心。出於天性。非有所徇而然也。平居與所知論極天人之際。因及燮理之事。未嘗不慨然有志。惜哉。不見於事。享年六十有四。階累升為朝散大夫。勳累升為護軍。爵累升為上黨郡開國侯。教畜弟妹甚勞。皆有成立。第章舉進士第。令為都官。負外郎。妹長適前祠部郎中直史館劉彝。次適進士倪天隱。次適司封。負外郎集賢校理鄭穆。皆當世有聞者。公娶陸氏。累封文安郡君。子男二人。長紹夫。守秘書省正字。次中夫。守將作監主簿。女五人。長適蘇州錄事參軍傅楫。次適宣德郎方象。次適承奉郎孫之敏。二女未嫁。公三遇大禮。不奉子弟以官。欲其自立也。而追念伯父。嘗有功吾門。其後未有仕者。故於知制誥年。先奏其孫良夫。郊社齋郎。嗚呼。士常患德不足以充位。而位過其德。夫擁高軒。策駟馬。懷黃金之印。結紫綬於腰。非不崇且貴也。而論之以事業。則蔑然無聞。所以榮於勢者得矣。其榮於義者安在。是故君子不患無位。患所以立。不患位不及人。而患德之不足。今公官不過郎中。職不過學士。而道之在人。利之在物者如此。雖使公極位望於一時。以彼較此。未知其孰愈也。公於六經之義。自有所得。方將營一丘之地。為退居之計。著書以自見其志。志不遂。故其平生所為文集二十五卷。以元豐四年。九

月十九日葬於常州宜興縣永定鄉蔣山之原。祖洽晚得識公於京師。舉進士於開封也。公為考官。及公移陳州。祖洽嘗在幕府。朝夕相與處。受公之教。而觀公之德為多。故得公行事尤詳。而祖洽謹掇其大者為行狀。請有道而能文者。圖其不朽焉。謹狀。門生孫覺撰陳先生墓誌銘。公姓陳氏。諱襄。字述古。其先光州固始人。五代時。王氏入閩。因隨家焉。今為福州候官縣古靈人。曾祖諱令圖。仕閩通顯。祖諱希頴。文林郎。果州司戶參軍。父諱象。台州黃巖縣尉。累贈尚書兵部侍郎。母黃氏。永嘉郡太君。繼母王氏。集慶郡太君。慶曆二年。進士及第。建州浦城縣主簿。浦城多世族。侵擾請託。以撓法。敗政為常。縣缺令者。又之。公不為恤。辨治有能名。移台州仙居縣令。益務以禮法教其民。民愛樂之。莫肯犯。皇祐三年。改秘書著作佐郎。知益州河陽縣。時司徒韓國富公為之守。一見而知之。土人不知水種之利。公度田二百畝為法。以示人。人冒行之。至今。移彭州濠陽縣。富公入相。薦之。召試充秘閣校理。判尚書祠部。有乞寺觀額。度人為僧。道士者。公論不可。編定昭文館書籍。知常州。州濱大湖。而運渠高。水不能溉。公為剗去堰堞。浚之。與湖通波。賴其利者二百里。民有父母存。而出贅。叱使還養。允數十人。召為開封府推官。三司鹽鈔判官。上初即位。使北虜。虜人欲

屈公下坐。公以禮固爭。不為屈。還知明州。未至。召修起居注。知諫院。管勾國子監。有詔兩制臺閣議學校貢舉之制。公因奏常秩等四人。知經有實行。宜以禮召見。補太學官。未幾。罷諫院。兼侍御史。知雜事。有旨。知制誥闕。召試。公上言。陛下以義使臣。臣當聽命之不暇。敢懷利以事上哉。從之。兼判吏部流內。賜紫衣金魚。言內外臣寮數親屬官。多選人以授者。請以三月為限。從之。時朝廷大新法。而聽者為屈。公數上疏論列。輒留中不下。召試。知制誥。公奏辭曰。臣有言責。不敢不言。言未足塞責。謹其可逃。詔試。臣何敢當。又除直舍人院。天章閣侍講。兼修起居注。皆固辭。乞補外官。上賜手詔曰。近以卿知制誥。卿以言事未遂。懇不受命。且求外補。朕素慕卿經術。行已深惜。遠去。特還舊職。庶幾左右經席。漸磨道義。以釋所願。聞。今覽來奏。上欲固辭。豈未悉朕意歟。還卿來章。當亟就職。乃復起居注。判流內銓。明年知制誥。兼直學士院。詔河決河北。諸郡公當視草。以水不潤下為言。中書改之。乞知陳州。移杭州。復唐相國李泌六井通判杭州事。蘇軾為之記。僧方人居。而禪學久廢。不傳。公以宗本傳宗。二人為之倡。其徒至。奔走天下。移應天府。未至。又移陳州。修八字溝。以泄城中霖雨。水潦之苦。州人便之。詔還。知通進銀臺司。兼門下封駁事。提舉進奏院。公久去朝廷。上



見而勞問之甚渥。除尚書右司郎中。樞密直學士。判太常寺。兼禮儀事。明年兼侍讀。知審官東院。又明年提舉司天監。元豐元年。詳定郊廟奉祀禮文。明年兼判尚書都省。是年十月。慈聖光獻太后山陵。以公為鹵簿使。公蓋以病矣。三年三月十一日。卒於京師。享年六十有四。公在告久。上數以問大臣。及遣中貴人臨視。而公已卒。奏至上為愍悼。贈給事中。錄其子之未官者。且及其外孫焉。階朝散大夫。勲護軍。公布衣居里巷。與陳烈。周希孟。鄭穆游。鄉人尊之。號四先生。仕宦所至。必大斥學舍。新祭器。歲時行禮。其中親為諸生橫經以講。及任大府。事劇體重。猶不倦以止。其樂善好學。殆天性也歟。資稟溫厚。未嘗見其喜愠之色。與人交久而彌篤。折節下士。所游多時聞人。鄭穆。劉彝。皆其女弟之婿。娶陸氏。封文安郡君。子男二人。紹夫。秘書省正字。中夫。將作監主簿。女五人。長適蘇州錄事參軍傅楫。次適宣德郎方彖。次適承奉郎孫之敏。二女未嫁。所著文集二十五卷。以元豐四年九月。葬於常州宜興縣永定鄉蔣山之原。銘曰。有嚴陳公。不降色辭。躬厲以正。去嘗見思。小邑大州。視之若一。勸學談經。人固不率。問學醇古。操行則高。經術行已。天語之褒。如公羈孤。又無黨援。學士歿身。維帝之眷。行信於友。有德在人。雖不百年。在公猶存。毗陵宜喜。公治昔者。今葬

其鄉。將配公社。古靈先生年譜。陳氏出自媯姓。虞帝舜之後。夏禹封舜子商均於虞城。三十二世孫暹。父為周陶正。武王妻以元女大姬。生滿。封之於陳。賜姓媯。以奉舜祀。為胡公。胡公二十六世孫軫。為楚相。封潁川侯。因徙潁川。稱陳氏。支分派別。不可得而考。在唐有陳忠。其先江左諸陳。世客潁川。一子邕。邕三子。夷。行夷實。夷則。夷行為太子太保。檢校司空。相文宗。夷實一子翻。翻一子嘉。為陵州別駕。別駕一子聞。為陵州刺史。刺史三子顯。為檢校侍中。江南道節度使。勲為兵部侍郎。黜為職方郎中。侍郎一子檄。自蔣之固始。從王緒入閩。家于福州。任閩為太尉。推誠奉國功臣。太尉三子。令鎔。為太中大夫。令圖。為客省使。令猷。為檢校工部尚書。客省一子希穎。皇朝淳化中。以文林郎守果州司戶參軍。戶曹五子。則之。拱之。象恢之。裕之。象台州黃巖縣尉。累贈尚書兵部侍郎。後改贈金紫光祿大夫。舊名連之。字金紫。三子。交。將仕郎。真州司法參軍。贈正奉大夫。襄樞密直學士。尚書右司郎中。兼侍讀。贈少師章。朝儀大夫。提舉杭州洞霄宮。贈金紫光祿大夫。真宗皇帝天禧元年丁巳。是年三月。公生於福州之古靈。後鄉人號為古靈先生。東坡先生熙寧中倅杭。有詩貽公云。去年柳絮飛時節。記得金籠放雪衣。注杭人以放鶴為太守壽。天禧五年辛酉。乾興元

年壬戌。仁宗皇帝天聖元年癸亥。天聖九年辛未。明道元年壬申。明道二年癸酉。景祐元年甲戌。景祐四年丁丑。寶元元年戊寅。寶元二年己卯。康定元年庚辰。慶曆元年辛巳。慶曆二年壬午。是年公於楊真榜登進士第。授試秘書省校書郎。建州浦城縣主簿。慶曆三年癸未。六月到浦城。有謁廟祝文。慶曆四年甲申。有祈雨詩。祈雨祝文。送章衡秀才序。慶曆五年乙酉。有答呂寺丞書。答黃殿丞書。慶曆六年丙戌。有答黃殿丞書。是年十月秩滿。慶曆七年丁亥。以部使者舉為台州仙居縣令。有仙居勸諭文。慶曆八年戊子。有謝闕郎中書。皇祐元年己丑。有勸學文。天台山習養瀑記。天台縣孔子廟記。皇祐二年庚寅。有和鄭闕中仙居詩十二首。是年十二月秩滿。皇祐三年辛卯。用薦者改秘書省著作佐郎。知益州河陽縣。有懷友人陳烈詩。祭仙孫五郎文。皇祐四年壬辰。春過浦城。有留題南峯寺詩。到河陽。有與蔡舍人二啓。皇祐五年癸巳。至和元年甲午。遷秘書丞。就移知彭州濠陽縣。至和二年乙未。是年鄭國富公自太原入相。以文學政事薦公。嘉祐元年丙申。有白頭詩。嘉祐二年丁酉。遷太常博士。以鄭公之薦。召試秘閣校理。嘉祐三年戊戌。判尚書祠部。嘉祐四年己亥。編定昭文館書籍。有郊

祀大禮慶成詩。并表吳君唐卿墓誌銘。嘉祐五年庚子。嘉祐六年辛丑。有殿中御史陳公墓誌銘。是年冬。遷尚書祠部員外郎。出知常州。嘉祐七年壬寅。有請願臨樞密學校主學書。嘉祐八年癸卯。仁宗皇帝登遐。英宗皇帝即位。公由尚書度支員外郎。遷尚書司封員外郎。賜五品服。英宗皇帝治平元年甲辰。召為開封府推官。治平二年乙巳。治平三年丙午。除三司鹽鐵判官。有蘇明允府君挽詞。治平四年丁未。英宗皇帝登遐。神宗皇帝即位。公奉使北虜。八月還。遷尚書工部郎中。充秘閣校理。出知明州。有英宗皇帝挽詞。使還。咸熙館道中詩二首。黑崖道中詩。和東王少卿見遺詩。過雒州南門。偶書呈知府張皇城詩。奉使回上殿劄子。左侍禁陸君墓誌銘。開封府祥符縣主簿陸君墓誌銘。祭黃虞部文。神宗皇帝熙寧元年戊申。還鄉省松楸。有和程公闢遊越山亭詩。春晚賞牡丹。奉呈席上諸君詩。和程公闢遊宿猿洞詩二首。和程公闢紅梅詩。和程大卿遊昇山詩。和程大卿遊鳳池寺詩。和程大卿荔枝詩。和程大卿新闢諸寺門詩。和程大卿書宿猿洞詩。是年冬。被召。熙寧二年己酉。夏到闕。遷尚書刑部郎中。修起居注。知諫院。管勾國子監公事。秋。除侍御史。知雜事。有旨。候知制誥闕。召試。公上疏力辭。詔從之。兼判吏部流內銓。賜三品

服有辭修起居注。知諫院。四狀。修起居注。舉自代狀。侍御史知雜事。舉自代狀。辭中書候試。知制誥狀。赴召。修注上殿。劄子。進誠明說。并劄子。知諫院。進劄子。乞正臺諫官劄子。議校貢舉劄子。乞免御史劉述等罪狀。論制置三司條例。乞行均輸法狀。彈劄放王介狀。論祖無擇下獄狀。乞疎放秀越二獄干繫人狀。熙寧三年庚戌春。詔試知制誥。公自言嘗論常平新法。不聽。辭不就試。執政以為當出。乃欲罷御史。以集賢殿修撰陝西轉運使。勅未下。上批別進。呈謂執政曰。吳申全不能講。欲候陳某受職。留講筵。於是除祕閣校理。復修起居注。直舍人院。兼天章閣侍講。仍判銓。有辭中書。召試。知制誥狀。并申中書省狀。辭直舍人院狀。辭判吏部流內銓。勅內名銜狀。辭直舍人院判吏部流內銓。兼天章閣侍講狀。辭侍起居注。擇日祇受修起居注。勅命狀。祕閣校理修起居注。舉自代狀。辭兼天章閣侍講狀。彈李南公除京西運判不當狀。乞召還范純仁狀。彈御史裏行王子韶狀。彈步軍副都指揮使宋守約三狀。論差擇縣令劄子。論流內銓奏避屬官劄子。論差選京朝官知縣劄子。彈秀州軍事判官李定狀。乞止絕權貴陳乞恩例劄子。論散青苗不便。乞住支五狀。論李常待罪不報。及呂公著落職劄子。論王安石劄子。論韓維充御史中丞。與韓絳領制置司妨礙狀。

論韓絳參知政事。乞罷制置司狀。熙寧四年辛亥秋。知制誥遷尚書吏部郎中。兼直學士院。冬。出知陳州。有內制一卷。謝知制誥啓。致陳州。謝富相公啓。熙寧五年壬子秋。移知杭州。有勸學文。夫人吳氏墓誌銘。十月。錢送錢塘貢士。登彼公堂詩。題忠定張公書後。是年。修錢塘六井。東坡先生為之記。熙寧六年癸丑。有駕部陳公墓誌銘。熙寧七年甲寅。有和子瞻泂牒京口。憶西湖寒食。及吉祥牡丹詩三首。是年秋。移應天府留守。未至。復移知陳州。有陳州謝到任表。自杭之宋。過永樂院留題詩。熙寧八年乙卯。有穎川府學釋奠勉童子詩。穎川賞花詩二首。是年冬。召還。知通進銀臺司。兼門下封駁事。提舉進奏院。遷尚書右司郎中。樞密直學士。判大常寺。兼禮儀事。有論差除勅不由封駁司劄子。謝轉樞密直學士啓。熙寧九年丙辰。兼侍講。知審官東院。有經筵薦溫國司馬公而下三十三士。章疏一卷。理會吏部資序劄子。乞定審官東院條例狀。與富相公書。熙寧十年丁巳。提舉司天監。冬。郊祀大禮。為禮儀使。有依敕文舉陳烈狀。元豐元年戊午春。奉勅詳定郊廟奉祀禮文。夏。決口塞詔。改新開決河曹村埽曰靈平。遣公為祭謝使。有詳定禮文。并制樂所定銅木尺度一卷。論樂劄子。祭天用樂劄子。崇國夫人符氏墓誌銘。故太師中書令曾魯公挽詞二首。元豐二年己未春。兼判都

省冬慈聖光獻皇后崩。命公為山陵鹵簿使。有慈聖光獻皇后挽詞二首。  
元豐三年庚申。是年三月。公捐館于京師。壽六十有四。將終。書先聖先師四  
字付其後。階為朝散大夫。勲為護軍。爵為上黨郡開國侯。明年九月葬于常  
州宜興縣永定鄉蔣山之原。特詔常州供應所闕後累贈少師。家君重刊先  
正密學遺文于顛之郡齋。俾晬次第年譜以冠之。庶幾生平遊宦歲月之先  
後與夫壯志晚節詩文之辭力。瞭然可見。曄謹承命恭考三朝實錄。暨文集  
狀墓誌家譜諸書。參校有可攷者。乃繫于歷歲之下云。時皇宋龍集辛巳。紹  
興紀號之三十一載。十月朔旦。六世姪孫。將仕郎曄謹拜手記。**黃氏日抄**陳  
密學襄公平生歷州縣。孜孜以教育人材。講求萬民利害為念。失官錢不辨  
而出俸償之。固為厚人也。爭新法不聽。遂辭知制誥不就。蓋與溫公辭樞密  
副使同此一心之守道不回者也。執法不行權貴人。寺觀名額。似雖小事。所  
識尤高。**李伯紀**陳襄文序。李綱伯紀序襄之文曰。所著文章。殆所謂有德之  
言。而君子之文歟。上為人主之所欽嚮。下為士大夫之所宗師。誦其詩。讀其  
書。可以想見其人。劉執中作祠堂記。亦曰。其政先於變俗。其仁勤於濟眾。故  
其出入中外。裕然弗以進退榮辱動其心焉。**朱晦菴**大全集。揭示古靈先  
生勸諭文。古靈先生陳公勸諭為吾民者。父義。能正其家。兄友。能養其弟。

弟教。能教其兄。子弟能事父母。夫婦有恩。貧窮相守為恩。若棄妻不養。夫  
長改嫁。皆是無恩也。男女有別。男有婦。女有夫。分別不亂。子弟有學。能知  
禮義廉耻。鄉閭有禮。歲時寒暄。皆以恩意往來。燕飲序老少坐立并起。貧  
窮患難。親戚相救。借貸財穀。婚姻死喪。隣保相助。無墮農桑。無作盜賊。無  
學賭博。無好爭訟。無以惡凌善。無以富吞貧。行者遜路。少避長。賤避貴。輕  
避重。去避來。耕者遜畔。地有畔不相爭奪。斑白者不負戴於道路。子弟負  
重執役。不令老者擔挈。則為禮義之俗矣。以上同保之人。今仰互相勸戒。  
孝順父母。恭敬長上。和睦宗姻。周卹鄰里。各依本分。脩本業。莫作姦盜。莫  
縱飲博。莫相鬪打。莫相論訴。莫相侵奪。莫相瞞昧。愛身忍事。畏懼王法。保  
內如有孝子順孫。義夫節婦。事跡顯著。即仰具申。當依條旌賞。其不率教  
者。亦仰申舉。依法究治。自餘禁約事件。仍已別作施行。各宜遵守。毋致違  
犯。**司馬溫公傳家集**言陳述古劄子。治平二年正月十日上。臣竊聞陝西  
都轉運使陳述古。昨因巡邊。妄奏朝廷稱邊鄙寧靜。不足為慮。後因權涇  
源路經畧司事。聞副總管劉几。稱西人黠集。將謀入寇。請出兵防托。述古  
恐與前奏相違。因此怒几。奏稱不協軍情。張皇生事。擅移几知鳳翔府。數  
日之間。西人果大舉犯邊。殺掠弓箭手。及熟戶蕃部。述古亦不即時發兵

救援致陷沒數千戶。近者雖知朝廷已差臺官勘述古罪狀。然竊聞所坐止於擅移劉几。及奏狀有不實之處。若以文史議之。罪不至重。若以國計言之。為害實深。何則。國家承平日久。人不習戰。雖屯戍之兵。亦臨敵難用。唯弓箭手及熟戶蕃部。皆生長邊徼。習山川道路。知西人情偽。材氣勇悍。不懼戰鬪。從來國家賴之。以為藩蔽。今述古知西人欲來侵擾。而自避。翻覆之辜。順成欺罔之謀。抑遏將官不許救護。遂以數千戶生民。委於虎口。使父子流離。骨肉塗炭。豈惟已陷沒者深可哀痛。臣恐自今以後。諸路弓箭手。皆不敢於極邊居。熟戶蕃部。皆有叛國從賊之心。以此觀之。其害豈小哉。况述古出於門蔭。材氣庸鄙。自立官以來。所至之處。縱恣冒臆。殘虐吏民。不顧憲典。輕侮王命。驕暴狼狽。天下共知。屢曾坐事黜降。旋復收用。叨竊名位。一朝至此。誠過其分量。故天奪之魄。舉措乖繆。駭人視聽。陷敗民命。挫辱國威。內外之人。無不憤疾。臣聞舜誅四凶。而天下服。如述古平生所為。亦可以謂之凶人矣。陛下縱不欲明加斧鉞。以謝邊民。亦當投之荒裔。以禦魑魅。庶使封疆之臣。少加驚懼。取進止。沈忠敏公集。祭陳述古墓文。孔子之生也。嘗所休止。猶惡其木陰。迫其歿也。戒母翦伐。乃愛及乎孔休。陳蔡之郊。一飽莫續。而塊然堆身。奉祀百世。以迄乎今。公於孔子之

道。聞而習之。於數千載之後。曷其能固結於人心。生有顯位。足以行其道術。歿有遺愛。足以流其德音。公之歿又矣。而此邦之人。所不能忘者。顧典刑之具在。想精爽之如臨。像公儀形。既脩祠事。而歲祭墓下。猶庶幾其來歆。俯視宿草。仰瞻拱木。蔚然深茂者。蓋樵牧知戒。而無斤斧之侵。况若某等。推公餘澤。以溉學者。則永懷之極。且不能自禁。一酌而招此故事也。九原可作。尚鑒時忱。咸淳毗陵志。蘇軾寄陳述古詩。慧泉山下土如濡。陽羨溪頭米勝珠。賈劔買牛吾欲老。殺鷄為黍子來無。地偏不信容高蓋。俗儉真堪着腐儒。莫恠江南苦留滯。經營身計一生迂。

## 陳舜俞

宋史列傳。陳舜俞字令舉。湖州烏程人。博學強記。舉進士。又舉制科第一。熙寧三年。以屯田負外。即知山陰縣。詔候

代還。試館職。舜俞辭曰。爵祿名器。砥礪多士。且示以至神。烏可要期如付劑。契繳中書帖上之。青苗法行。舜俞不奉令。上疏自劾曰。民門出舉財物。取息重止一倍。約償緡錢。而穀粟布縷魚鹽薪菽。耰鋤釜錡之屬。得雜取之。朝廷募民貸取。有司約中熟為價。而必償緡錢。欲如私家雜償他物。可得。故愚民多至賣田宅質妻孥。有識者老戒其鄉黨子弟。未嘗不以貫貸為苦。祖宗着令。以財物相出。舉任從書契。官不為理。其保全元元之意。

深遠如此。令誘之，以便利督之以威刑，方之舊法，異矣。詔謂賑民之絕，而抑兼并，然使十戶為甲，浮浪無根者，毋得給俵，則乏絕者已不蒙其惠。此法終行，愈為兼并地爾，何以言之？天下之有常平，非能人人計口受餉，但權穀價貴賤之柄，使積貯者不得深藏，以邀利爾。今散為青苗，唯恐不盡，萬一饑饉荐至，必有乘時貴糶者，未知將何法以制之。官制既放，錢取息，富室藏鏹，坐待隣里逋欠之時。田宅妻孥，隨欲而得，是豈不為兼并利哉？雖分為夏秋二料，而秋放之月，與夏歛之期等。夏放之月，與秋歛之期等，不過展轉計息，以給為納，使吾民終身以及世世，每歲兩輸息錢，無有窮已。是別為一賦，以弊海內，非王道之舉也。奏上，責監南康軍酒稅五年而卒。舜俞始嘗棄官歸，居秀之白牛村，自號白牛居士。已而復出，遂貶死。蘇軾為文，哭之，稱其學術才能，兼百人之器。慨然將身任天下之事，而人之所以周旋委曲，輔成其天者，不至一斤不服。士大夫識與不識，皆深悲之。云。論見盧秉傳後。**嘉禾郡志**：令舉嘉興人。仁宗嘉祐四年，應材識茂異，賢良方正，能直言極諫，科擢為第一。是時公已登進士乙科矣。復中是選，故文章聲名赫然在人上。始授光祿丞，簽書壽州判官，宰山陰，秩未滿，詔試館職不就。會朝廷行青苗法，上書力詆，且自劾。因忤執政，貶監星江酒稅。

公在貶所，日與太博劉凝之，跨雙犢以窮泉石之勝。自號白牛居士。公直道自信，無所回撓，遂絕意仕進。得著書立言，有都官集進卷行于世。蔣之奇序東坡六客公與焉。**江州寓公傳**：令舉秀州人，博文強記，擢進士第。又中制科，熙寧中為山陰令，以不奉行青苗，謫南康監稅。初見廬山，欣然賦詩曰：沂洄江上山，千里皆可愛。忽見匡廬峯，氣勢一何大。崔嵬青天屏，巖巖白雲蓋。藤蘿拂金繩，瀑水掛玉帶。未雨龍穴藏，摩空鳥飛礙。疑非紅塵間，遂在萬物外。聞有高世士，眠雲不知載。飲露滄朝霞，彌月下天籟。軒冕何足道，天地乃投芥。吾能與之游，無庸去浮海。既抵郡，又賦十絕，有曰：石磴梯山一里高，荒煙源處稅漁樵。官廳事冷人應笑，免對青苗強折腰。自古匡廬是勝遊，謫臣何敢計淹留。城中未有看山處，客館僧坊謾舉頭。時劉渙致仕居廬山，林泉之嗜畧同，遂相與乘黃犢遊覽。嘗以六十日之力，盡南北山水之勝。**輿地紀勝**：舜俞作騎牛歌，語在劉渙傳。好事者爭作歌，舜俞俱和之。和部使者毛某，歌曰：君平山前白雲老，五十休官何太早。咄哉官早莫行道，鸞鳳豈肯爭梁稻。愛山愛水去無時，漸老更買黃牛騎。長髯老奴挈榼隨，白紵皎皎山人衣。因鄰湖邊有逐客，也解忘形樂泉石。不使執轡從翁遊，翁自出錢為買牛。山中酒美數醑我，醉裏詩成要我和。市

兒指點應不識。底不輕表走快馬。毛夫子。真國士。出問風謠宣直指。滿酒本是神仙人。功名強為蒼生起。聞說騎牛不詆訶。手臂紅綫為作歌。美辭百卉鋪錦綉。雄辯三峽傾銀河。我牛入山路漸熟。好歌吟聲易成曲。明年恩亦當放還。直入深雲無管束。欠却劉家買牛黃金錢。又得毛公騎牛碧玉篇。和渙子怨歌曰。陳子無能久棄廢。騎牛入山學遁世。劉子有道憂天下。欲取相印乘駟馬。二子相逢湖水頭。進退兩忘俱未酬。長歌對市人聞者。應擲揄。君不見蔡澤不相終。躍馬。又不見甯戚未遇先飯牛。腰懸六黃印。廩食萬戶侯。人生顧何常。古來海水生柔桑。少華一峯已為谷。白日西出明朝陽。男兒蓋棺事乃了。目睫榮悴空悲涼。水之曲。山之傍。歲窮且飲酒。富貴無相忘。後李公麟畫為騎牛圖。舜俞每恨惠遠周景式輩作山記。踈略而渙。舊掌雜錄聞見。未暇銓次。舜俞採其說。叅以記載者。舊所傳。畫則山行旁抄。夜則發書考訂。泓泉塊石。具載不遺。折衷是非。必可傳而後已。又作俯視之圖。尋山先後之次。以冠之。為五卷。人服其勤。舜俞後北歸。以授李常于濟南。遂行于世。舜俞官至屯田員外郎。卒。山南北留詠甚多。時人以此稱之。宋蘇東坡集祭陳令舉文。嗚呼哀哉。天之生令舉。初若有意。厚其學術。而多其才能。蓋已兼百人之器。既發之以科舉。又輔之以

令名。使取重於天下者。若將畀之以位。而令舉亦能因天之所予。而日新之。慨然以身任天下之事。夫豈獨其自任。將世之士大夫。識與不識。莫不望其如是。何一奮而不顧。以至於一斥而不復。以至於死。嗚呼哀哉。天之所付為偶然。而無意耶。將亦有意。而人之所以周旋委曲。輔成其天者。不至耶。將天既生之。以畀斯人。而人不用。故天復奪之。而自使耶。不然。令舉之賢。何為而不立。何立而不遂。使少見其毫末。而出其餘棄。必有驚世而絕類者矣。予與令舉別二年。而令舉沒。既沒三年。而予乃始一哭其殯。而弔其子也。嗚呼哀哉。尚饗。陸游渭南集跋東坡祭陳令舉文。東坡前後集祭文。凡四十首。惟祭賢良陳公。辭指最哀。讀之使人感歎流涕。其言天人予奪之際。雖若出憤激。然士抱奇材。絕識。沉壓擯廢。不得少出一二。則其肝心疑為金石。精氣去為神明。亦烏足恠彼憤者。因不知也。紹熙甲寅十二月二十九日。笠澤陸游謹書。

## 陳長孺

宋劉忠肅公集陳長孺國傳墓銘。公諱孝標。字長孺。姓陳氏。曾祖諱咸。卿。祖諱肅。贈吏部侍郎。考諱希古。贈秘書監。

公以廕補太廟齋郎。調保州保塞縣主簿。光州司法。以處州龍泉縣令。舉監汾州永利西鹽。得眼疾。所謂內障者。求鑿以歸。又二年致其事。除太子

中舍英宗即位改殿中丞賜緋衣銀魚令上即位進國子博士熙寧五年六月五日以疾卒享年五十有九公性至孝幼失母實鞠於祖母永安太君方氏及長而祕書公分務南都退居東平其所以奉親自養禮賓友內外晏然無所不樂而忘其身之疾者繇公於子職盡也如是凡十餘年既居喪而方夫人猶在寢及事二季父益以謹順聞與諸弟友愛相與以安貧服禮為事歲時恭慎祀饗自始事迄卒祭朝服以俟酌酒饋食有數有序每獻再拜興俯屏息於几筵如親其聲容而有所受命者至婦子侍御率以祗恪無敢跛倚與朋友久而不渝和易以愛人雖賤夫遇之有禮自祕書公之亡於是三十年鄉里之亟盛亟替朝譽而暮毀者凡幾家至論清白有常能持其門戶則人必指陳氏而稱公曰吉德君子也雖然臨之以義利蓋有不可動者保塞上官或屬以私公謹對曰不可僚友謂之曰以是居卑非身謀也公曰士窮達得失不有命乎而道固若是議法有守不可撓而本之以恕疑者必傳輕此多所平宥汾州課增衍於格當賞矣俄以疾廢而至於亡鄉人莫不咨嗟以善人不得報為惜公少舉進士有聲名善作詩晚讀佛老書信事頗篤夫人李氏故崇儀使榮州刺史緯之女生四男照早世熙熙默皆服儒一女歸鄭儒繼室夫人之妹封金華縣

君光三年亡生一女不育七年四月二十四日葬公於鄆州須城縣盧泉鄉鄆上里先塋之甲穴公某長舅也方不幸幼孤實公守之又教之以俾成人於葬也其可以不銘銘曰徇惟博士孝悌有儀維畜不施維善不耆維其命之是以順之維德不疢何公之悲

### 陳慥

容齋三筆陳慥字季常公弼之子居於黃州之岐亭自稱龍丘先生又曰方山子好賓客喜畜聲妓然其妻柳氏絕兒妬東坡

有詩云龍丘居士亦可憐談空說有夜不眠忽聞河東獅子吼拄杖落手心茫然河東獅子指柳氏也坡又嘗醉中與季常書云一絕乞秀英君想是其妾小字黃魯直元祐中有與季常簡曰審柳夫人時須醫藥今已安平否公暮年來想漸求清淨之樂姬媵無新進矣柳夫人此何所念以致疾邪又一帖云岸諭老境情味法當如此所苦既不妨游觀山川自可損藥石調護起居飲食而已河東夫人亦能哀憐老夫一任放不辭事邪則柳氏之妬名固彰著于外是以二公皆言之云元一統志陳慥字季常本眉人陳公弼之子寓居于黃之岐亭號龍丘子蘇軾謫居與之往來唱和東坡有方山子傳黃州府志季常號龍丘居士元豐三年東坡謫黃州至岐亭有白馬青蓋來迎乃故人陳慥也留五日賦詩而別宋蘇東坡集方



山子傳方山子光黃間隱人也。少時慕朱家郭解為人。閭里俠皆宗之。稍壯折節讀書。欲以此馳騁當世。然不遇。晚乃遊於光黃間。曰岐亭庵居蔬食。不與世相聞。棄車馬。毀冠服。徒步往來山中。人莫識也。見其所著帽方。聳而高。曰此豈古方山冠之遺像乎。因謂之方山子。余譴居于黃。過岐亭。適見焉。嗚呼。吾故人陳慥李常也。何為而在此。方山子亦矍然。問余所以至此者。余告之。故俯而不答。仰而答。呼余宿其家。環堵蕭然。而妻子奴婢皆有自得之意。余既聳然異之。獨念方山子少時使酒好劍。用財如糞土。前十九年。余在岐下。見方山子從兩騎。挾二矢。游西山。鵲起于前。使騎逐而射之。不獲。方山子怒馬獨出。一發得之。因與余馬上論用兵及古今成敗。自謂一世豪士。今幾時耳。精悍之色。猶見於眉間。而豈山中之人哉。然方山子世有勲閥。當得官使從事於其間。今已顯聞。而其家在洛陽。洛宅壯嚴。與公侯等。河北有田。歲得帛千匹。亦足以富樂。皆棄不取。獨來窮山中。此豈無得而然哉。余聞光黃間多異人。往往陽狂垢汙。不可得而見。方山子儻見之。與。姓。氏。遥。華。季。常。號。龍。丘。居。士。自。洛。之。蜀。以。駿。馬。載。二。妹。遇。溪。山。佳。處。留。數。日。卜。居。黃。岡。北。稱。靜。菴。子。瞻。贈。臨。江。仙。細。馬。遠。驅。雙。侍。女。青。巾。玉。帶。紅。靴。溪。山。好。處。便。為。家。誰。知。巴。峽。路。得。見。洛。陽。花。迴。旋。落。英。飛。玉。

蓋人間春日遲斜。十年不見紫雲車。龍立新洞府。鎔鼎舊丹砂。

## 陳知雄

宋畢西臺集陳水部墓誌銘。君諱知雄。字守柔。陳氏故右正議大夫致仕述古之子。故太子太師致仕鄭國文惠公

堯佐之孫。故左諫議大夫贈太師尚書令秦國公省華之曾孫也。世為蜀郡閬中人。後徙鄭。今為鄭人。君年十五。以文惠公恩。守將作監主簿。累遷光祿寺丞。為人博文強記。倜儻任氣節。喜賙人之急。其仕官不畏強禦。日與上官辨是非。必得當而後止。上官多不悅者。人或告之。君自若。初監河南府酒稅。次監信州鹽酒稅。竟以為上官辦事。為所中傷而廢。其年未三十也。君一廢四十年。治平中。以神宗皇帝即位。恩授檢校水部員外郎。濮州團練副使。可以復仕矣。而遂不仕。其居閭里。日飲酒為詩篇。治宅種田。油然自得。出入游縱。譏譎笑謔。雖老不衰。嘗大病幾死。人以為自此衰矣。而病已如故。人問之。君曰。它人病者憂死。病而有憂。所以益病且衰也。我病即待死耳。不憂故不衰。知者以為名言。君年六十有九。正議公尚無恙。往來蔡鄭之間。白首問安。人皆歎息焉。其後正議公薨。君持喪居鄭里。至元祐八年。君年七十有一。平居無事。遂卒。實七月一日也。娶張氏。故翰林

院學士復之女孫。故內殿崇班成之女。男三人。長曰復。前河南府永寧縣尉。次曰某。次曰某。女三人。長適右通直郎辛友直。次適進士介瑜。次未嫁。卜以某年日月葬。公於懷忠鄉。某里某原。其子復。乞銘於東平畢某。某之外祖贈金紫光祿大夫陳師古。即正議公之從兄。君於某母黨也。其可不銘。銘曰。噫守柔公。相孫強其志。屯其身。任一跌。不復論。年雖老。氣益振。所好義。且多聞。人從游。日諄諄。今已矣。嗟外門。猶有待。觀後昆。

## 陳太素

宋史列傳太素字仲華河南緱氏人。中進士第。嘗為大理評斷官。又入審刑為詳議官。權大理少卿。又判大理寺。任

刑法二十餘年。朝廷有大獄疑。必召與議。太素為推原人情。以傳法意。眾皆釋然。自以為不及。雖號明習法令。然所論建。亦或不中。每臨案牘。至忘寢食。大寒暑不變。子弟或止之。荅曰。囹圄之苦。豈不甚於我也。歷知江陰軍。兗州。明州。有治迹。如在大理。瀕疾。數求罷。執政以為任職弗許。累官至尚書兵部郎中。卒。太素家行修治。尤喜論刑名。常以為有司議法。當據文直斷。不可求曲法。求曲法。所以亂也。同時有馬尋者。須城人。舉毛詩學。寃累判大理寺。以明習法律稱。歷提點兩浙陝西刑獄。廣東淮南兩浙轉運使。知湖撫汝襄。洪。宣。鄧。滑。八州。襄州飢。人或群入富家掠困粟。獄吏鞫

以強盜。尋曰。此脫死耳。其情與強盜異。奏得減死。論著為例。終司農卿。又有杜魯者。濮州人。為吏。號知法。嘗言國朝因唐大中制。故殺人雖已傷未死。已死更生。皆論如已殺。夫殺人者死。傷人者刑。先王不易之典律。雖謀殺已傷則絞。蓋甚其處心積慮。陰置賊害爾。至於故殺。初無殺意。須其已死。乃有殺名。苟無殺名而用殺法。則與謀殺孰辨。自大中之制行。不知殺幾何人矣。請格勿用。又言近臣赦令。殺人已傷未死者。皆得原減。非律意。請傷者從律保辜法。死限內者。論如已殺。傷勿赦。皆著為令。宋胡文恭公集陳太素等至中舍海詞。勅具官某等。朕以季秋吉辰。消誠孝饗。薦幣之夕。休氣熏蒸。而祠官祝釐。歸福於朕。思與九服之士。同均百順之貺。以明乾施之普。無不周也。以爾等交修士矩。參服王官。或專握守符。或別抗倅乘。齋祠之恪。述職于外。有繕治貢助之勤。議勞則均。章賞。維等用進爾茂秩。往虔我思。

## 陳景元

真仙通鑑字太虛。宋神宗賜號貞靖。建昌道士。遇張無夢授祕術。通儒玄。名聞朝野。後得道。長嘯正坐而化。

## 陳遷

羅山志陳遷字德升。年十六游學金陵。以強記聞。王荆公嘗命與陸農師。徧觀蔣山碑石。無慮百言。歸而暗錄。不遺一字。越二

國因病留蔣山。與勇禪師言話有契。勇與頌云。胡孫兒子太惺惺。愛弄千年鬼眼睛。不現宰官身說法。時時來我頂頭行。即棄儒冠逸于鄉里。究心禪寂。為續燈錄。蔡元度朱世英。諸顯人咸師事之。

### 陳圓

南康志陳圓字德方。星子人。飽學獨行。嘗應制舉。當時賢良之名甚著。後隱于城內。後山士子從之學。鄉里名輩多出其門。蘇

黃諸公皆器重之。太史過南康。駐輿尋訪其家。賦詩有城中咫尺雲橫校。獨立前山望後山之句。又為名其堂曰獨善。

## 永樂大典卷之三十一百四十二



重錄總校官侍郎臣高拱

學士臣瞿景淳

分校官洗馬臣林燦

書寫生員臣曹嘉賓

圈點監生臣馬承志

臣吳敬

九真

一百二十二

3143-4



官簿簽出第三十二方四十四  
計  
日  
業  
輯  
志  
錄

卷

共書一  
種計

條

乾隆三十八年十一月廿六日發寫  
謄錄

257 (15)



永樂大典卷之三十一百四十三

九真

陳

陳瓘

宋史列傳陳瓘字瑩中南劍州沙縣人少好讀書不喜為進取學父母勉以門戶事乃應舉一出中甲科調湖州掌書記簽書

越州判官守蔡卞察其賢母事加禮而瓘測知其心術常欲遠之屢引疾求歸章不得上檄攝通判明州卞素敬道人張懷素謂非世間人時且未越卞留瓘少須之瓘不肯止曰子不語恠力亂神斯近恠矣州牧既信重民將從風而靡不識之未為不幸也後二十年而懷素誅明州職田之入厚瓘不取盡棄於官以歸章博入相瓘從衆道謁博聞其名獨邀與同載詢當世之務瓘曰請以所乘舟為喻偏重可行乎移左置右其偏一也明此則可行矣龜山語錄瑩中言載舟事最好無元祐舟不知為甚梅得大重及紹聖時不知却如何亦偏多載了從此兩舟所載者因何物得重今當減去何物則適平若被人問到此須有處置始得如是本分處置得事之人必須有規矩繩墨一一調和得是不令錯了若只說得德德使休亦

不濟事。孟子言天下可運於掌。如彼所言。天下誠可運於掌也。天子待公為政。敢問將何先。惇曰。司馬光姦邪。所當先辨。勢無急於此。瓘曰。公誤矣。此猶欲平舟勢。而移左以置右。果然。將夫天下之望。惇厲色曰。老不務績。述先烈。而大改成績。誤國如此。非姦邪而何。瓘曰。不察其心。而疑其迹。則不為無罪。若指為姦邪。又復改作。則誤國益甚矣。為今之計。唯消朋黨。持中道。庶可以救弊。意雖忤惇。然亦驚異。頗有兼收之語。至都。用為太學博士。會卞與惇合志。正論。遂紂卞黨。薛昂林自官學省。議毀資治通鑑。瓘因策士題引神宗所製序文以問。昂自意沮。遷秘書省校書郎。紹述之說盛。瓘奏哲宗。言堯舜禹。皆以若稽古為訓。若者。順而行之。稽者。考其當否。必使合於民情。所以成帝王之治。天子之孝。與士大夫之孝不同。帝反覆。寃問。意感悅。約瓘再入見。執政聞而憾之。出通判滄州。知衛州。徽宗即位。召為右正言。遷左司諫。瓘論議持平。務存大體。不以細故藉口。未嘗及人。賸昧之過。嘗云。人主託言者。以耳目。誠不當以淺近見聞。惑其聰明。惟極論蔡卞。章惇。安惇。邢恕之罪。御史龔夬。擊蔡京。朝廷將逐夬。瓘言。紹聖以來。七年五逐言者。常安民。孫諤。董敦逸。陳次升。鄒浩。五人者。皆與京異議而去。今又罷夬。將若公道何。遂草疏論京。未及上。時皇太后已歸政。瓘言外。

戚向宗良。兄弟與侍從。希寵之士交通。使物議籍籍。謂皇太后今猶預政。由是罷監揚州糧料院。瓘出都門。繳四章奏之。并明宣仁誣謗事。帝密遣使。賜以黃金百兩。后亦命勿遽去。界十僧牒為行裝。改知無為軍。明年。還為著作郎。遷右司員外郎。兼權給事中。宰相曾布使客告以將即真。瓘語子正彙曰。吾與丞相議事。多不合。今若此。是以官爵相餌也。若受其薦。進復有異同。則公議私恩。兩有愧矣。吾有一書論其過。將投之以決去就。汝其書之。但郊祀不速。彼不相容。則澤不及汝矣。能不介於心乎。正彙願得書。旦持入省。布使數人邀相見。甫就席。遽出書。布大怒。爭辨移時。至其踞評語。瓘色不為動。徐起白曰。適所論者國事。是非有公議。公未可失待士禮。布矍然改容。信宿出知秦州。崇寧中。除名竄袁州。廉州。移郴州。稍復宣德郎。正彙在杭。告蔡京有動搖東宮迹。杭守蔡蒞執送京師。先飛書告京。俾為計事。下開封府制獄。併逮瓘。尹李孝稱逼使證其妄。瓘曰。正彙聞京將不利社稷。傳於道路。瓘豈得預知。以所不知。忘父子之恩。而指其為妄。則情有所不忍。扶私情以符合其說。又義所不為。京之姦邪。必為國禍。瓘固嘗論之於誅省。亦不待今日語言聞也。內侍黃經。臣蒞鞫。聞其辭。失聲嘆息。謂曰。主上正欲得實。但如言以對可也。獄具。正彙猶以所告夫實。流。

海上。璿亦安置通州。璿嘗著尊堯集。謂紹聖史官專據王安石日錄。改修神宗史。變亂是非。不可傳信。深明誣妄。以正君臣之義。張商英為相。取其書。既上而商英罷。璿又徙台州。宰相徧令所過州出兵甲護送。至台。每十日一徙告。且命凶人石慄知州事。執至庭。大陳獄具。將脅以死。璿揣知其意。大呼曰。今日之事。豈被制旨邪。慄失措。始告之。曰。朝廷今取尊堯集爾。璿曰。然則何用許使君知尊堯。所以立名乎。蓋以神考為堯。主上為舜。助舜尊堯。何得為罪。時相學術淺短。為人所愚。君所得幾何。乃亦不畏公議。干犯名分乎。慄慙。揖使退。所以窘辱之百端。終不能害。宰相猶以慄為怯。而罷之。在台五年。乃得自便。纔復承事郎。帝批進目。以為所擬未當。令再叙一官。仍與差遣。執政持不行。卜居江州。復有譖之者。至不許。輒出城。旋令居南康。纔至。又移楚。璿平生論京卞皆披擿。其處心發露。其情慝。最所忌恨。故得禍最酷。不使一日少安。宣和六年。辛年六十五。璿謙和不與物競。閑居矜壯自持。語不苟發。通於易數。言國家大事後多驗。靖康初。詔贈諫議大夫。召官正彙。紹興二十六年。高宗謂輔臣曰。陳璿昔為諫官。甚有讜議。近覽所著尊堯集。明君臣之大分。合於易天尊地卑。及春秋尊王之法。王安石號通經術。而其言乃謂道隆德駿者。天子當北面而問焉。其背

經悖理甚矣。璿宜特賜謚以表之。謚曰忠肅。東都事畧。陳璿。徽宗即位。除右正言。論卞修實錄。增加王安石實錄。秦神宗大典。請改修徽宗欲開言路。首還鄒浩。而中丞安惇尚緣往事。欲格成命。璿再上疏力言。宜召還浩。遂惇以明黜陟。遷右司諫。又極論蔡卞假託經義。倡為繼述。重誣神考。輕欺先帝。倡為國是。以行其私。卞之所是。謂之國是。卞之所非。謂之流俗。尊安石而薄神考。不可為國是。宜因其請詞。許而遣之。章惇懷異不忠。宜因其辭。山林使罷之。又言惇為山林使無狀。致大昇舉。陷于泥淖之中。露宿野次。宜罷其職。又論修建景靈西宮不當。且言建立之地非是。後改知無為軍。璿責之日。方上疏論蔡京。而命下於門外。繳四奏。并明宣仁誣謗。修實錄。建西京等事。徽宗密遣人賜璿黃金百兩。由是京罷。召還。除著作郎。遷右司負外郎。又以書抵曾存論日錄。及國用士。以為尊私史。而壓宗廟。緣違費而壞先政。布怒。罷知秦州。尋主管冲祐觀。除名。編管袁州。移廬州。又移郴州。監中嶽廟。坐其子正彙上書。建繫開封獄。安置通州。始璿所辨日錄事。著尊堯集。議者以為言多詆誣。編置台州。移楚州。居住以卒。年六十五。靖康元年。贈右諫議大夫。璿篤學有識。志不苟合。居喪孝。初。蔡卞知其才。待之加禮。璿不肯附麗。恬於進取。雖諸公文薦。迨居言職。所疏奸惡。雖



所舉不避也。嘗曰：彼則舉爾所知，此則為仁由己。識者重其言，瓘既力言，京不可用，用之必為腹心患。悉如其言。瓘有詞辨通易數，天下治忽多驗。自號了翁云。子正彙。正同。江州志：陳瓘為右司員外郎，尋以忤曾布斥。歷袁、廉、郴、楚等州，未坐。所著尊堯集事，安置台州郡，將石憾不為禮。未幾，移通州，尋得自便，憾得罪當揆，故貶憾通州以媿之。瓘不欲見，遂泛舟至九江，家于城南。時崇寧丙申歲也。瓘自謂流竄十五年，所至無向明之室。因作南窓而銘之。語在弟宅類。自是遍遊山北，與僧總為方外交。嘗賦詩云：廬山俯長江，秀色摩青天。招提選勝地，好景相屬連。東林最幽曠，殿閣含飛煙。馨香滿天下，無如遠公蓮。社客方散後，零落七百年。之人遠同調，綠綺非絲弦。不可傾耳授，但許心相傳。迷津苦難渡，人以師為船。法鼓忽雷震，此事非偶然。何時穿蠟屐，問法浮雲邊。又詩云：廬山景何如，勝迹多已古。水石相回旋，天地巧排布。我本天涯人，未知有廬阜。恨不早經過，西征一何暮。香爐在何許，縹緲凌高空。却入白蓮沼，令人思遠公。高巖草堂在，吏隱居其中。至今三尺童，猶能話白公。可想不可見，山色空重重。水流未何遠，所過生苔蘚。自古垂飛簾，至今不能捲。此外猶足觀，足力已困竭。僧居本靜閒，群鳥爭轉舌。恰欲高枕眠，魂夢恐遭聒。知是乘雨來，山路泥

滑滑。陰雲猶未收。明朝又西發。瓘精釋典，號了翁所居。今為崇福院云。餘見井宅條。南康志：瓘熙寧間為右司諫，坐論蔡京父子屢貶，最後謫徙南

康，往朱山之南北，吟賞諷詠，寵辱俱忘。自號了翁云。有墨帖與隨緣居士黃策晉陵尤表得之。文公立公祠於郡學，取而刻石于白鹿。帖云：瓘夏末

蒙除官觀，居南康，居閑，得祥載恩。自辛城中，飽含隘而不漱，水時得免，便

醫。尤所喜使，山利雖開，城廬享大江，日在戶牖。杜門得此，是以畢餘齡矣。

孫備還毗陵，計須相見，諸可詢知，不復詳布。瓘再拜。雷州府圖經志：諫議

忠肅公陳了翁崇寧三年南遷于廉州，館于州前宣化坊讀書齋。扁曰：了齋。立課程以自適，杜門絕與賓客交。先是公以紹聖史官專據荆公日錄

以修裕陵實錄，變亂是非，不可傳信，故居諫省，首論其事。進日錄論辯乞改實錄，及竄合浦，著尊堯集，深闢誣妄，以明君臣之義。有諫章立碑于舊

學講堂。其後一夕有大星墜于齋前，光焰如晝。翌日有羽書召還。後舊學經火，諫章不復存矣。維揚志：陳瓘自諫省謫揚州，堯庫以論蔡京交結外

戚，廷欽聖也。被命數日，欽聖悔悟，遣中使宣諭以非本旨。方且開解，主上召還矣。賜度牒十道，伴勿遽行。繼遂有無為之命。公以京猶在朝廷而復言者差遣，是非不辨，不敢祇受。乃京得外補，公乃拜命。後卒葬于揚州西

山言行錄公為越州簽判。蔡卞為帥，待公甚厚。每以公學識卓異，待遇加禮。而公已得其心術，常欲疎遠之。屢引疾尋醫，章不得上。會明倅闕，蔡俾公權攝。以時當得職田，意公方貧，必喜於少紓。公到明，遂伸尋醫之請。將所得主租，遜前官。明州以法當公得，公以義不當受，卒不取而歸之官廩。初卞嘗為公語，張懷素道術通神，雖飛禽走獸，能呼遣之。至言孔子誅少正卯，彼嘗諫以為太早。漢楚成臯相持，彼屢登高觀戰，不知其歲數。殆非世間人也。公每竊笑之。及將往四明，而懷素且未會稽，卞留公少俟。公不為止。曰：子不語怪力亂神，以不可訓也。斯近悖矣。州牧既甚信重，士大夫又相諂合，下民視之，從風而靡。使真有道者，固不願此。不然，不識之，未為不幸也。後二十年，懷素敗，多引名士，或欲因是染公，竟以尋求無迹而止。非公素論守正，則不免於羅織矣。公在言路，知無不言。然議論持平，務大體，彈擊不以細故。未嘗及人私過，常言人主託言者以耳目，固不當以淺近見聞惑其聰明。况以訐為忠，無補於時，反傷治體乎。道事公譽望早達，自登科，不及汲於仕進。元祐紹聖間，諸公交薦於朝，公慎所主，多所退避。及後被春知居言路，排姦扶正，所指議者，往往嘗相舉薦。故公疏文有曰：在彼則舉爾所知，在此則為仁由己。未嘗以預薦而入其黨，亦不以小故

而絕其恩。蓋公之意，以士人出處，不因薦刺而廢公議，則朋黨之說無緣而起。道事公，每謂天下之事，變故無常，惟稽考往事，則有以知其故。而應變王氏之學，乃欲廢絕史學，而咀嚙虛無之言。其事與晉無異，將必以荒唐亂天下矣。故彈蔡京疏文有曰：絕滅史學，一似王衍，重南輕北，分裂有萌。逮今三十餘年，而所言無不驗者。道事公，以紹聖史官，專據荆公日錄，以修裕陵實錄。變亂是非，不可傳信。故居諫省，首論其事。進日錄辯，乞改實錄。又因竄責合浦，著尊堯集，深闢誣妄，以明君臣之義。然猶止以增加之罪，歸于蔡卞，蓋公之意，以謂荆公已歿，宗其說，以殖私黨者。卞實罪魁，救時革弊，當以去卞為先。若根源鋤塞，則制其流蔓易矣。又邪說大行，勢不可回。於是直攻荆公之惡，以明禍本之所在。所以復著四明尊堯也。雖尊崇宗廟，破闢私史，立意則同，而議論直捷，無所迴避。則後集乃公之所取，以為正也。故公自謂四明尊堯者，芻蕘改過之書也。後集序文，可以備見。道事元城，譚錄曰：陳瑩中安世，嘗薦自代，而未嘗識。而中庸曰：道之不行，不明也。我知之矣。智者賢者過之，愚者不肖者不及也。若瑩中者，多失之過。如尊堯集，先評王荆公為伊呂聖人之耦，而後論諸僭叛不軌之域。此學術不粹也。其始論荆評日錄也，乃歸過蔡卞，以為吾用權道。且君子立

言行也。當本之誠。此之謂誠可乎。春秋書二百四十二年之事。善善惡惡。或原心定罪。則有之。何嘗有加罪誣人之事。今欲正一大事。而枉筆且誣人。是自招曲也。如此。安有能立者乎。又曰。當今之務。非出於荆公。則入於溫公矣。元祐諸公所行。蓋有未當處。不可全用。今日之事。則固不可用。有一道理。未嘗為人說。恐萬一傳去。使秦革先施。而不可不為吾子言。然則救弊之理。莫若只宗神考。大有不可及者。則漸自正。韓維曰。陳瑩中之說。固如是也。公曰。安世實嘗語之。以此。劉公集有答陳公書論尊先集。天樂與前說同。但其末云。報君行已。苟已無憾。而今而後。亦可以忘言矣。其後公遷謫以來。杜門不治人事。絕迹州郡宴會。幾三十年。所至人情向慕。雖田夫野老咸知名願見。及自天台歸通川。道由會稽。時王豐甫仲疑為越帥。以公早為岐公所器重。具舟楫為禮。候公於郊。因共載歸官舍。越人間公赴府。會競未觀瞻。比肩輿歸館。道路遮擁。義不可行。為人欽重如此。道事公在台五年。屢該赦當自便。而刑部不敢檢舉。既而上旨。令叙官放還。乃因郊霈霑恩。然初以宣德郎被謫。而叙官乃得承事郎。實鐫降也。被命之後。忽得州牒。備坐省劄云。奉御批叙復數內。陳瓘叙復未當。合於見存官外叙一官。仍取旨與差遣符州。告示本官知委。公既供知委。而來

通州將數月。又有省劄下通州。令公具家狀陳乞差遣。人皆賀公以為起發有漸也。公曰。此廟堂欺君玩世之術爾。若與差遣。豈因見問上聞吾叙官不當而見於御批。諸公不敢。但已為此遷延之說。以塞上旨。家狀雖可供而差遣其可乞耶。彼謂吾不堪流落。而因茲乞憐爾。乃報云。家狀昨因削籍毀棄。無憑供具。事果不行。遺事公晚年。益負天下重名。蔡氏之黨。必欲殺公以快意。時王宋得罪。公適居江州。讒者以為公未居宋之鄉郡。因危言陷公。賴徽宗聖察。止令移居南康。及後方寇彌聚。又造飛語。言公之壻為寇所劫取。欲以相中傷。復有楚州之命。蓋公所論京下。皆披摘其用心。而發露其潛慝。蔡氏最有忌嫉。故得禍。比同時諸公為最酷。猶以徽宗保全不至死也。遺事公性至孝。事親承順顏色。使親庭無不適之意。居喪毀瘠如禮。廬墳茹蔬。連年有甘露芝草之瑞。於兄弟友愛尤至。伯氏早世。公撫卹其孤。教養嫁娶。使皆有所成立。初奏補恩澤。捨己子而先伯父之子。及後貶責。以至終身。諸子皆白衣。未嘗有不滿之意。遺事公性謙和。與物無競。與人議論。率多取人之長。雖見其短。未嘗面折。唯微示意以警之。人多退省。愧服尤好。獎進後輩。一言一行。苟有可取。即譽美傳揚。謂已不能。公平生手不執錢。不視權衡貨殖之事。未嘗講論。唯於農田不廢詢訪。

以米之貴賤。而察歲之豐凶也。然常語人則曰。有國家豈能忘利。或孳孳而營之。或臨事必以為言。此前賢以為戒也。遺事公雖閑居。容止常莊。言不苟發。雖盛暑見子孫輩。未嘗不正衣冠。一日嘗與家人語。家人戲問。實否。公退自責者累日。豈吾嘗有欺於人邪。何為有此問也。御下尤有禮法。未嘗以非類罵人。遺事公有斗餘酒量。每飲不過五爵。雖會親戚。間有歡適。不過大白滿引。恐以長飲廢事。每日有定課。自鷄鳴而起。終日寫閱。不離小齋。倦則就枕。既寤即興。不肯偃仰枕上。每夜必置行燈於床側。自提就案。人或問公。何不呼喚使令者。公曰。起止不時。若涉寒暑。則必動其念。此非可常之道。偶吾性安之。故不欲以勞人也。遺事公智明慮遠。事無大小。必原始要終。驗如符契。又通易數。如靖康變故。隆祐垂簾。國家中興之事。往往嘗預言之。士大夫間有親聞者。遺事李丞相伯紀為柱史。坐論水被謫。有書與公。求華嚴真旨。若將忘世者。公以狄梁公得筏猶捨之語報之。且謂李文靖王文正二公。皆好佛者。未嘗泥其教文。而專以衛物為心。文靖為相。以不擾之說報罷。內外所陳利害。文正當軸。終日端默。包兵革以待夷狄。勉其繼踵。二公於筌筏之外。書辭數千言。及後伯紀果大用。識者歎公藻鑑。且服公之至論也。遺事徐師川以才氣自負。少肯降志於人。

常言吾於魯直為舅氏。然不免有所竊議。至於了翁心誠服之。每見公或經旬月。必設拜禮。忠宣范公。晚年益以天下自任。尤留意人材。或問其所儲蓄。人材可為今日用者。答曰。陳瓘。又問其次。曰。陳瓘自好也。蓋言公可以獨當天下之重也。宣和之末。人憂大厦之將顛。或問將定夫察院。以當今可。以濟世之人。定夫曰。四海人材。不能周知。以所知識。陳了翁其人。也。劉器之亦嘗因公病。使人勉公以鑿藥。自輔云。天下將有賴於公。當力加保養。以待時用也。其為賢士大夫所欽屬如此。遺事公自遷謫。所居必葺小齋。終日寫閱內典。觀經史二十餘年。如一日。未嘗少懈。以所抄錄。名曰知恩。殆千餘軸。又雜觀百家之文。壁卜等書。開卷得益者。亦片紙紀錄。粘于壁間。環座既遍。即合為一策。名曰壁記。如此者又數十冊。遺事張丞相天覺。晚年亦好佛書。重道。建嚴閣作醮籙。會黃冠釋子。紛紛奔趨之。公雖嘗被其薦引。然素未相識。及通書也。至是代書簡之曰。辟穀非負道。談空夫自然。何如勲業地。無愧是神仙。及在山陽。方與賓舊會食。見邸報有天覺所上遺表。遽止酒而起。歎傷異常。客有以為疑者。公曰。張固非粹德。且復才疎。然時人歸向之。今其云亡。絕人望矣。近觀天時人事。必有變革。正恐雖有盛德者。未必孚上下之聽。殆難濟也。未幾公亦感疾。浸至大故。遺事陳

瑩中與開止叔沼與榮陽公書問其言前輩與公之交游必平關書云某公某官如稱器之則曰待制劉公之類其與已同等則必斥姓名示不敢尊也如日游醉謝良佐云此皆可以為後生法童蒙訓陳瑩中嘗言學者須常自試以觀己之力量進否易曰或躍在淵自試也此聖學也童蒙訓陳左司瓘送其姪淵責沈文曰予元豐乙丑夏為禮部貢院點檢官適與校書郎范公淳夫同舍是時先公為秘書省正字公嘗論顏子不遷怒貳過惟伯淳能之予問公曰伯淳誰也公默然久之曰不知有程伯淳邪予謝曰生長東南實未知也予嘗以寡陋自愧了翁之子正由云了翁自是每得明道先生之文必冠帶然後讀之范太史遺事龜山先生題責沈後曰了翁以蓋世之才邁往之氣包括宇宙宜其自視無前矣乃退然不以賤知自居而以不聞先生長者之名為愧非有尊德樂義之誠心而以自勝為強何以及此高文大筆者之簡陋使世之自廣而狹人者有所矜式豈曰少補之哉聞見錄瑩中撰尊堯集以辨王安石所作目錄以詆祖宗詆神考者今行于世靖康初不及大用以死特贈諫議大夫瑩中晚喜康節先生之學嘗從伯溫求遺書曰吾於靖康若有得也陳了翁年譜序云了翁先生意其才似寇萊公而學術過之不然徐師川范堯夫游定夫劉

器之諸君子何獨許其當天天下之重責沈尊堯諸作家傳人誦夫誰不知有先生獨其家法相傳之要不讀先生年譜無以知之事親以孝事君以忠為吏以廉立身以學非惟可為家法直可為天下後世法而默堂請益龜山伊尹之所覺周公之所思孔子之所貫顏子之所樂是四者聖賢所以立乎其身者也立身為體孝也忠也廉也其用陳氏學術過寇遠矣夢兆公為閩縣時廉訪使者怒曰汝何恃而敢然邪公曰孤寒小官無可恃所恃者惟潔已自守而已此其家法之一而可用為法焉者故及之秦定丁卯中元前六日承直郎延平路總管府推官三山林興祖敬書了齋先生吾國故也魯有孔鄒有孟國人知之天下知之千萬世而下皆知之先生之忠肝義膽輝爛青史厥亦猶是先生有文集行于世吾邦甫惟兵火煨燼無存邑庠舊有責沈石刻時亦散失其雲仍松礪君諱宣子字達觀悉心殫力四出搜訪零碎收拾迄為完璧今家塾有焉前數年堯自富沙得尊堯集歸語松礪遂亟取以錄亦不敢吝去年春聞訪得了齋文集於他郡手自繕寫畧無惰容每得一見亦不忍置今年夏適會其姪君詔家顧且謂前輩文集各有年譜冠其首吾祖文集獨闕是近已編輯畢當見之忽一日出示此編曰年譜畢矣於此乎益信先生之後有人而益敬

其後人之有志。堯生先生之邦。後松礪十有五年。聞道不早。幸而所見畧同。而所值之時又同。其在鄉黨學校間。多不見棄。大抵受命也。介俱未免為強項人。所願則學了翁。決不能如洵仁洵武輩。先生有云。氣質之用狹。道學之力大。的哉斯言。吾黨不敢不勉。了齋先生實主於嘉祐丁酉之四月。今其孫松礪生於嘉熙丁酉之四月。是編之作。又見於大德元年丁酉之四月。其亦偶然邪。其亦豈偶然邪。後學樊堯百拜盥手。書于譜後。了齋文。凡五十餘卷。親手抄錄。幸歲全書。暇日因修家譜。自公之曾祖。祖父而下。至于公生。循州之日。又由公登第入仕之始。至卒于貶所之年。凡四十六年之事跡。隨其歲月。緝為年譜。雖畧有倫序。但中間書簡之往還。詩詞之寄送。其歲月不能詳考。舉其大而遺其細。撮其要而約其繁。固不敢方前賢年譜之萬一。但欲紀其大槩。以示本族方來之子孫。予以見吾祖一點之精忠義槩。一世之跋涉間關。後有仕於朝者。亦當體吾祖之立心。勿墜家聲。以期無忝可也。是編始於大德丁酉四月之既望。而畢工於六月之中澣。中間或有先後之訛舛。後之人儻改而訂正之。亦所深望也。時大德元年。歲在丁酉。六月二十有一日。七世孫。宣子。百拜謹書于了翁書院。此序多闕。文了齋忠肅公著述不一。有文集四十卷。有易說。有尊堯集。

有責沈碑文。有年譜。龜山晦庵南軒諸先生為之序。我松礪翁嘗刊于祠下。俾子孫世守其家訓。至正庚子春。不幸毀於兵火。焚燎迨盡。澤嘗以為憂。憲輅至邑。詣祠拜謁。尋訪是書不完。申命諸朝表章祠祀事。因詢貢川族人。得年譜一本。敬取抄錄。復鋟梓于祠。傳諸不朽。告於族長文縉曰。宜至正甲辰。秋七月。朔。十世孫陳澤。百拜謹識。公諱權。字瑩中。南劍州沙縣人。曾祖文餘。贈駕部尚書。朱梁正明三年丁丑生。祖諱世卿。周太祖。廣順三年癸丑生。三十三歲。值宋太宗雍熙二年丙戌。狀元梁灝榜中進士。第二甲第十九名。官至知廣州政績。告滿未離任而歿。享年六十有四。累贈吏部尚書。父諱偁。祖世卿。第五子。真宗大中祥符八年乙卯六月生。仁宗明道元年壬申二月十八日。蒙恩補太廟齋郎官。至知洪州。元祐元年四月致仕。七月卒。年七十有二。累贈持進。仁宗嘉祐二年四月生於循州官舍。神宗元豐元年秋。領太學魁薦。元豐二年三月。上親試舉人。狀元時彥榜中進士甲科第三名。初任招慶軍學書記。湖州州學教。授神宗顧考官。問家世。陳公襄對曰。循吏陳偁之子。上嘆曰。循吏宜有此子。元豐七年。第二任。改宣義郎。濠州定遠宰。元豐八年。為禮部貢院點檢官。適與校書郎。范公淳夫同舍。范公嘗論顏子之不遷不貳。唯伯醇有之。公

問范曰。伯醇誰也。范默然久之。曰。不知有程伯醇耶。公謝曰。生長東南。實未知也。時公年二十有九。自是以來。常以寡陋自愧。得其傳者。如揚中立。先生亦未之識也。元祐五年。除太學博士。不就。蔡京薦之。元祐六年。十一月二十七日。作順昌濟川橋記。元祐七年。元祐八年。元祐九年。四月改紹聖元年。四月二十日。跋朱表臣所藏歐陽六一居士帖。五月復除太學博士。紹聖初。章申公以宰相召。道過山陽。公適相遇。隨衆謁之。章素聞公名。獨請登舟共載而行。訪以當世之務。公曰。請以所來舟為諭。偏重其可行乎。移左置右。其偏一也。明此則可行。章默然未答。公復曰。上方虛心以待公。公必有以副上意者。敢問將欲施行之。叙以何事為先。以何事為後。何事當緩。何事當急。誰為君子。誰為小人。諒有素定之論。願聞其畧。章復矻思良久。曰。司馬光奸邪。所當先辯。無急於此。公曰。相公悞矣。此猶欲平舟勢。而移左置右也。果然。將失天下之望矣。章厲色視公曰。光輔母后。獨宰政柄。不務慕紹先烈。肆意大改。成緒悞國如此。非奸邪而何。公曰。不察其心。而疑其迹。則不為無罪。若遂以為奸邪。而欲大改其已行。則誤國益甚矣。乃為之極論。熙豐元祐之事。以為元豐之政多異。熙寧則先志固已變而行之。溫公不明先志。而用母改子之說。行之太遽。所以紛紛至於

今日。為今之計。唯當絕臣下之私情。融祖宗之善意。消朋黨。持中道。庶乎可以救弊。若又以熙豐元祐為說。無以厭服公論。恐紛紛未艾也。辭辯淵源。議論勁正。章雖忤意。亦頗驚異。遂有兼取元祐之語。留公具飯而別。章到闕。召公為太學博士。公聞其與蔡卞方合。知必害於正論。遂以婚嫁為辭。久乃赴官。於是三年不遷。公為太學博士。薛昂林自之徒。為正錄。皆蔡卞之黨也。競推尊荆公。而擠排元祐。禁戒士人。不得習元祐學術。卞方議毀資治通鑑板。公聞之。因策士題。持引序文以明神考有訓。於是林自駭異。而謂公曰。此豈神考親製耶。公曰。誰言其非也。自又曰。亦神考少年之文爾。公曰。聖人之學。得於天性。有始有卒。豈有少長之異耶。自辭屈愧歎。遽以告卞。卞乃密令學中置板高閣。不復議毀矣。紹聖大臣嫉元祐。更改王荆公已行之法。乃用繼述之說。以為形迹。先朝追貶司馬溫公等。加以不孝之名。上謗宣仁事。傷國體。公時為太學博士。被旨賜對。其奏劄曰。道常然而不渝。事有弊則必變。故堯舜禹皆以若稽古為訓。若者順而行之。稽則考其當否。或若或稽。必使合於民情。所以成帝王之治也。遠滕之言。遂明繼述之義。且論天子之孝。與士大夫不同。秦陵喜所未聞。反覆詰問。語遂移時。迫於進膳。公乃引退。上意感悟。約公再見。有變更時事之意。執

政聞而恨之。遂黜公于外。秦陵聖顏英睿。臣下奏對。往往懾於天威。少或  
契合。公始召見。遽以人所難言。逆意開陳。辭達義明。使人主豁然感悟。由  
是縉紳士夫。罔不欽服。蘇黃門聞撫几歎曰。吾兄東坡。最善論事。然亦不  
知出此。遂以書抵公。歎譽甚至。紹聖初。用章惇薦為太學博士。先是惇之  
妻。嘗勸惇無修怨。惇作相。專務報復。首起朋黨之禍。惇妻死。惇悼念不堪。  
公見惇。容甚衆。謂惇曰。公與其無益悲傷。曷若念夫人平生之言。蓋譏惇  
報怨也。惇以為忤。不復用公。為別試所主文。林自謂蔡卞曰。聞陳瓘欲盡  
取史學。而黜通經之士。意欲沮壞國是。而動搖荆公之學。下既積怒。謀將  
因此害公。而遂禁絕史學。計畫已定。唯候公所取士。求疵立說行之。公預  
料其如此。乃於前五名悉取談經。及純用王氏之學者。卞無以發。然五名  
以下。往往皆惇洽稽古之士。公嘗曰。當時若無矯揉。則勢必相激。史學往  
往遂廢矣。故隨時。所以救時。不必取快目前也。言行錄紹聖二年。紹聖三  
年。除秘書省校書郎。執政聞之不悅。紹聖四年。四月。公謁章惇求外補。  
因謂章惇。主上篤於繼述。然今日廟堂。述神考乎。述荆公乎。惇默然出。公  
以宣德郎。借緋通判滄州。因聞太學博士林自用蔡卞之意。唱言於太學。  
曰。神考知王安石不盡。尚不及滕文公之知孟子也。士大夫皆駭其說。公

具其說以告。惇大怒。召自罵之。章蔡由是不咸。以是忤執政。故有是命。  
五月十二日。作大相國寺智海禪院記。十月七日。跋徐仲車有容詩。元  
符元年。除著作佐郎。樞密院編修官。辭。元符二年。公前此自館職請外  
補。得倅滄州。秩滿。至是移守衛州。中間數有薦章。兩被內除。皆辭不就。  
徽宗元符三年三月。徽宗即位。召拜左正言。曾布。韓忠彥所薦也。布曰。瓘  
等久當進。為惇等所抑。卞無宅見。人不附已者。便惡之。上曰。所謂妬賢嫉  
能也。皇太后亦諭忠彥等。甚以瓘差。除為得人。徽宗即位。召公為言事  
官。於是即日就道。論章蔡繼述平日之志畧行。公赴召命。至闕。聞有中旨。  
令三省繳進。前後臣僚章疏之降出者。公謂宰屬謝聖藻曰。此必姦人。圖  
蓋已愆。而為此謀者。若盡進入。則異時是非變亂。省官何以自明。因舉蔡  
京上疏。請滅劉摯等家族。乃妄言携劍入內。欲斬王珪等數事。謝驚悚。即  
白。時宰錄副本於省中。其後京黨欺誣。蓋抹之說。不能盡行。由有此跡。不  
可泯也。徽宗初政。欲革紹聖之弊。以靖國。於是大開言路。衆議皆以瓘  
華復位。司馬溫公等叙官為所當先。公時在諫省。獨以為幽廢母后。追貶  
故相。彼皆立名以行。非細故也。今欲正復。當先辯明誣罔。昭雪非辜。誅貴  
造意之人。然後發為詔令。以禮行之。庶幾可以無後患。不宜欲速致悔也。



朝廷以公論久鬱。且欲快悅人情。遽施行之。至崇寧間。蔡京用事。悉改建中之政。人乃服公遠慮。四月。公言。陛下欲開言路。首還鄒浩。取其有既往之善。可謂得已試之才。允合人心。無可正救。而聞御史中丞安惇尚緣往事論浩罪惡。欲寢已成之命。自明前舉之當。又言安惇奏浩是先朝所棄。不當復用。國是所係。不可輕改。臣竊惟是非之心。人皆有之。古先王以百姓之心為心。故朝廷之所謂是非者。乃天下之公是非也。是以國是之說。其文不載於二典。其事不出於三代。惟楚莊王之所以問孫叔敖者。乃戰國一時之事。非堯舜之法。然其言曰。夏桀商紂。不定國是。而合其取舍者為是。不合其取舍者為非。則是叔孫敖之意。亦不敢以取舍之私而害天下之公。是非也。若是非取舍簡擇。一以私意合我者是。異我者非。此楚莊王所以不敢也。豈聖時所宜用哉。因錄國是故事上之。人言鄒浩盡忠之言。以愛君憂國為心。先帝一時之怒。無終絕言者之意。惇居風憲。理當助浩。默而坐視。愧責已多。况如前日之所為者乎。極天下公議。非所以為國是。極人臣不改之孝。以為善述。昔以誤朝廷。今以非上。原情定罪。安可已乎。伏望檢會前奏。早賜施行。惇聞公章已出。亦自請去。是月。罷安惇出知潭州。五月。公言。紹聖大臣以繼述神考為說。以離毀宣仁為心。而瑤華乃宣仁所厚。

又於先帝本無間隙。萬一瑤華有豫政之時。則元祐之事必復。是以過為之慮。若刈草而去其根。則孟氏安得不廢。朝廷赦宥。為罪人而設。掖庭秘獄。治世所無。今若以為過而均之赦宥。以是廢興動靜。與眾同科。慢而不嚴。於禮未順。且瑤華前日得罪。外議藉藉。皆以為先帝有悔悟之言。審如此。則皇帝下一詔書。明白其事。陛下付外庭。使議典禮。縱令遂非之人。自護其短。安敢以先帝之言為不然乎。不報。既而瑤華廢。后用犢車還宮中。太后遣人以冠服易去道衣。乃入。中外聞者歡呼。公又言。尚書左丞蔡卞過惡。章惇前日所為。皆卞教之。卞以繼述神宗為名。以纂紹安石為主。立私門之所好。以為國是。奪宗廟大美。以歸私史。又言惇迹易明。卞心難見。春秋責意。則難見之罪。安所逃乎。上曰。只說與章惇。則卞自知矣。惇令吳伯舉諭旨於卞。卞乃請去。遂罷卞。出知江寧。六月。言。新知荆南邢恕。傾司馬光劉摯。梁燾等。幾至滅族。公議不容久矣。宜定其罪。是月。貶邢恕均州居住。七月。熒惑犯房心。公上言。咸平元年二月。彗出營室北。真宗謂宰臣曰。其祥安在。呂端等奏曰。變在齊魯之分。真宗曰。朕以天下為憂。豈獨一方耶。其年十月。遂用李沆為相。王旦參政。此二人天下所謂賢也。舉天下之賢而用之。則可以解天下之憂。真宗銷變之道如此而已。願陛下大

正厥事所用所棄皆合人心則合天心矣。漢元之時蕭望之周堪張猛與石顯許史之徒議論交戰邪正未決當此之時有夏寒日青之變而許史之徒以為堪猛用事之咎於是勢孤者危有力者勝臣嘗以謂天下大器也譬如一舟舟平則安舟偏則危自紹聖以來宰舟之人實右而虛左舟勢不平幾於傾覆觀者膽落亦已久矣陛下即位以來好平惡偏損諸右而遷諸左十損一二舟勢尚偏臣願陛下察用偏同濟之人抹傍觀膽落之語廣諏博訪而審其所以然也且星文之變昭示天下已數日矣惟京師陰雨見之最晚則是遠方之所知而陛下有所未知也况房心為宋之分野大星乃天房之位前星乃太子之位今幸未凌犯願陛下預思所以銷復之公言鍾正甫項為廣東運判親往新州追攝本州羈管人前諫官鄒浩就獄根勘賓客往來饋遺等事偶會大赦釋免竊惟浩以言事得罪於親戚故舊往來調恤之義朝廷未嘗有旨禁絕而新州所劾與御史臺羅織之獄萬里相應欲致浩於必死其為忍酷不亦甚乎然義者以為造意為虐者非正甫也欲望令正甫供奉所承受御史臺如何指揮本路如何供奉但考兩處行遣次第則造意為虐者人得其人矣詔安惇落待制依舊知潭州正甫與御史左膚石豫並送吏部與合入差遣八月作景靈西

宮初景靈神宗未有館御而居英宗之後殿及哲宗崩又無以處之蔡京言若謂宮東迫民居難展宜即其西對御道立西宮首奉神宗館御而哲宗次之右僕射韓忠彥以下亦請立西宮以奉神宗詔恭依且命戶部尚書李南公總其役公在左正言言其不可者五蓋國之神位左宗廟故神宗建原廟于左今乃在西不合禮經一也唐徐嶠言大理寺殺氣盛而鳥雀不敢棲今即其基則非吉地二也雖移官舍不動民居而大理寺與軍器監及元豐庫儀鸞司皆遷於他處則彼亦有民居不知遣幾家而後可就三也神宗以祖宗神御散在寺觀故合於一宮今乃析為兩處則鑿與酌獻分詣禮繁四也夫孝貴寧神自安奉於顯慶殿既安且久不宜輕動五也章累上且論京之矯誣卒不能易九月上幸潛邸龍德宮觀芝公言伏聞車駕將幸蔡王外第都下之人老幼相傳歡呼鼓舞願瞻天表人心所歸於此可見然聞欲因幸龍德宮而傳者以為欲觀芝草竊惟陛下即位以來天下豐稔慶瑞已多芝草雖異臣知不足以動聖意也况自祖宗以來乘輿所出必正其名若非為民祈禱即因謁見宗廟今乘輿之出固有名矣因幸漸宮何為不可然而觀芝之嫌亦不可不恤也此而不恤則流傳浸廣天下之人將有不遠萬里而獻芝者矣不報又言章惇獨相八年迷

國誤朝。罪不可掩。奉使失職。事干泰陵。遂命以特進出知越州。是月。公除右司諫。上言云。皇太后不待祔廟。果於還政。事光前古。名垂後世。陛下所以宜報皇太后。者宜如何哉。臣恐假借外家。不足為報也。又言。向宗良兄弟倚國恩。憑藉慈蔭。所與游者。連及待從。希寵之士。願出其門。裴彥臣無甚幹才。但能交通內外。漏泄機密。遂使物議藉藉。以為萬機之事。黜陟差除。皇太后至今與也。良由中外關通。未有禁戒。故好事之人。得以益傳耳。上批陳瓘累言。太后尚與國事。言多虛誕。不根。可送吏部。與合入差遣。三省請以公為郡。上不可。添差監揚州糧料院。公初不知被責。復求見上。閣門不許。公即具以劄子繳進。其一再論景靈西宮。其二論章惇罷相。制所稱國是。其三。其四。皆指陳蔡京罪惡。其言京云。國之大事。無過宗廟。可傳萬世。無過信史。今京以矯誣之言。唱西宮之事。妄謂先訓。以惑上下。自改日錄。以實其說。朝廷遂信其語。欲遷神考於西宮。豈非朝廷大政。委曲遷就為一京之地乎。京在紹聖。親入文字。請滅劉摯等家族。其言所以不行者。哲宗之大惠也。今哲宗之大惠。不聞於天下。而京復自謂有究治平反之功。欲使天下皆謂哲宗有濫誅之意。而京有及物之仁。始則為國生事。以復私讎。今則歸過先朝。自圖身利。前言既效。今計亦行。豈非朝廷大

政。委曲遷就為一京之地乎。陛下善述神宗。欽承哲宗。至德美意。達于天下。而京乃矯誣兩朝。上累聖政如此。二事未免委曲遷就。以為京地。况其他乎。前日緘口之人。今欲有言於陛下。京在朝廷。則莫不以言為戒矣。前日阻隔之士。今欲有望於陛下。京在朝廷。則莫不以進為懼矣。以言為戒。則依舊緘默。以進為懼。則甘於沉廢。天下公議。與親政之初。漸不侔矣。京之計策漸行。人之背向漸一。為京之羽翼者漸多。為陛下之耳目者漸阻。朝廷之威。自此而漸弛。蒙蔽之患。自此而漸成。安危治亂。漸可卜矣。又言。昔唐明皇欲用牛仙客為尚書。張九齡以為不可。明皇曰。但加實封可乎。九齡又亦以為不可。明皇變色曰。事皆由卿耶。李林甫曰。仙客宰相才也。何有尚書。九齡書主。不達大體。由是明皇悅林甫之言。宰相仙客而九齡自此寢跡。終見黜罷。今忠彥及布無九齡之望。而京之氣焰過於仙客。因勢觀望。而為林甫之言者。不知幾何人。崔群謂唐之治亂。在林甫九齡進退之時。今京輕欺先帝。與下無異。而又歸過於先烈。賣禍於博卞。曲為自安之計。而陛下果留之也。今既可以復留。後亦可以大用。天下治亂之勢。係於一京。崔羣之言。可不念耶。臣恐後之視今。亦猶今之視昔。治亂之機。不可以不早辯也。翌日復有旨。除公知無為軍。公即露章辭免云。蔡京關

通交結。其勢益牢。廣布腹心。羽翼成就。愚弄朝廷。有如兒戲。陛下若不早  
悞。漸成孤立。後雖悔之。亦無及矣。陛下若以臣言為是。則當如臣所請。按  
京之罪。明正典刑。然後改臣差遣。以示聽納。若以臣言為非。則是臣事發  
更為其罪益大。重加貶竄。乃得允當。詔不許辭免。上嘗諭宰執曰。瓘言  
事。極不可得。暫貶亦不久。前日遣人送黃金百兩。瓘受賜泣下。布曰。陛下  
待遇如此。宜其感泣也。初。公因朝會見蔡京。視日久而不瞬。嘗以語人曰。  
京之精神如此。他日必貴。然矜其稟賦。敢敵太陽。吾恐此人得志。擅私逞  
欲。無君自肆矣。尋居諫省。遂攻其惡。京聞公言。因所親以自解。且致情懇。  
而以甘言啖公。公使荅之曰。杜詩所謂射人先射馬。擒賊須擒王。不得自  
已也。於是攻之愈力。未幾。翰林學士曾肇亦上書。其畧云。臣近曾論貶逐  
諫官陳瓘。及太后特下手詔留瓘舊職。未蒙聽納。臣竊以為瓘言雖狂。其  
意則忠。何則。瓘以疎遠小臣。妄言宮闈之事。披瀝腹心。無所顧忌。此臣所  
謂狂也。太后援立聖明不世之大功。有前期歸政過人之盛德。退安房闈。不與外  
事。然後人無間言。本末相稱。萬一或有纖毫。可以指議。則於清躬不能無累。  
故瓘以愛君之誠。陳豫防之戒。欲以開悞聖心。保全盛美。忘身為國。臣子  
所難。此臣所謂忠也。內外之分。不可相干。家國之事。各有攸主。詩書所戒。

非不叮嚀。秦漢以來。得失可鑒。伏望留神省覽。先是曾布嘗獨密啓東朝。  
今與政否。上曰。外間差除。自不與。惟禁中。及內臣事。必須關白。凡章疏。亦  
須呈單子來取。看稍不如意。煎迫極甚。已而陳瓘論裴彥臣等。交通內外。  
太后怒。至哭泣不食。上再拜乞貶瓘。而怒猶不解。左右近習。或請擢蔡京  
執政。庶可解太后之怒者。羣臣皆莫敢言。肇既先上書。與王詵俱入對。初  
留身而上。遽及之。且曰。卿文字。但救陳瓘。無補於事。當更論東朝事。乃有  
補耳。十月。罷蔡京出知永興軍。長安闕帥。上欲遣京。韓忠彥以為當遣  
曾布。曰。京之出。天下所同欲。自差河東。太后不勝其怒。臣自此不敢復啓  
口。聖意如此。何幸如之。上曰。昨只是太后怒。朕元不主張。近日陳瓘有言。  
因詢其交通近習之狀。却有簡與裴彥臣云。且煩於太后前主張保全。朕  
昨逐馮說。亦只為京。布曰。聞王詵嘗向人說。既去却馮說。如元長何。今聞  
聖諭。則此言不虛矣。京立朝如此。以理言之。何可使之善去。但以形迹東  
朝。且令補外可也。罷章惇知越州。公論其責輕。於是中書省檢會公并臣  
僚上言云。惇編類章疏。看詳訴理。受禍千餘家。凡士民暗昧言語。加以刀  
楛釘手足。剝皮膚。斬頸拔舌之刑。責授武昌節度副使。潭州安置。責詞畧  
曰。先皇天資仁孝。勤儉愛人。每形德音。具見惻怛。及爾輔政。日肆誕謾。凡

陳開道之言。無非殺害之事。陰扶仇怨。妄肆中傷。或稱圖危上躬。或託謗訕宗廟。擯除禁近。視若狐豚。排斥縉紳。棄如斷梗。投之荒裔。肯使生還。存者悉為囚徒。死者不得歸葬。援引姦黨。布滿要路。造作語言。更相倡和。有司觀望。慘刻成風。殺戮無辜。道路以目。乖氣致異。上天降凶。水旱連年。民靡寧止。國有常典。宜即嚴誅。尚示寬恩。俾之速竄。中書舍人徐勣實為之。建中靖國元年七月。重修神宗實錄。初。公言。王安石日錄七十餘卷。具載熙寧奏對議論之語。紹聖再修神宗實錄。史官請以此書付史院。專據此書。追議刑賞。遂使裕陵之美。皆為私史所攘。所有實錄。願詔史臣。別行刪修。八月。復召除著作郎。兼實錄院檢討官。辭。除右司員外郎。兼權給事中。公奏言。臣嘗乞別修神宗實錄。以成一代之典。而不聞施行。蓋紹聖史臣。今為宰相故也。不報。時何執中為禮部侍郎。一日。以簡與公曰。今早見貴人。即魯布也。公即真矣。公即呼正彙示之曰。吾與丞相議事多不合。所聞乃爾。是欲以官爵相餌也。若受其薦。而復有異同。則公議私恩。兩無愧矣。吾有一書。將役之。以決去就。汝為我書之。又曰。郊祀不遠。倘不相亮。則夫汝思澤。能不介意乎。正彙再拜願得書。公乃大喜。明日持以入局。未及問。丞相約公相見。連价催促。公留使者少俟。已而同舍朱世英來。公

拉之。同詣政事堂。朱不知所以。丞相見公有同行者。有不豫之色。公不候坐定。遽出書為獻。丞相大怒。辯論移時。公指事叙言。辭色不撓。堂吏比肩聳觀。朱以皇恐。夫指。丞相怒甚。翹足肆坐。語浸驕慢。公雍容起白曰。瓘之所論者。國事是非。當付之公議。相公未可失待士之禮也。丞相整儀無語。公遂起。竟不聞所以相招者何言。其書畧曰。尊私史而壓宗廟。緣邊費而壞先政。此二者。閣下之過也。某所撰日錄。辨所謂尊私史而壓宗廟者。可見矣。又以一年之內。連下五勅。而諸路三十年之蓄。皆運於西邊。因述國用須知。所謂公邊費。而壞先政者。可見矣。遂以副本納布。布謂公所論為元祐單見。淺聞之說。又曰。雖有十書。布亦不動。公遂申三省。乞劾妄言之罪。早行竄黜。宰相將上。布云。瓘責臣尊私史壓宗廟。公邊費壞先政。皆非是。上令責瓘。韓忠彥陸佃曰。瓘言誠過。曾布當能容信宿。隨有海陵之命。遂自右司員外郎出知秦州。公所奏五勅。帖黃云。朝廷應副邊事。虛內事外。非一日也。故五勅之所取。雖有別用之處。然前後相因。以致匱乏。至於今日。遂耗天下根本之財者。初緣邊費也。一元符三年。九月。勅府界諸路。見管坊場錢。留出本路一年合支外。將剩數留半年。准備支用。餘一半。特令起發上京。一。其年十一月初。起發見管常平免役錢。如前勅。一。

建中靖國元年二月。勅諸路提舉司。將見在抵當息錢。並起發上京。一。其年三月。勅起發諸路。量添酒依抵當指揮。一。其年三月。又勅諸路助役錢。內撥一半充常平糶本。餘一半計置起發上京。充那往三路添助常平糶本。又曰。自元豐七年。以常平等積剩錢。補助邊費。歲取二百萬緡。為額。只以三年為期。蓋不欲多費天下民財。以資邊用。神考愛民之慮。可謂深矣。豈宜取三十年間根本蓄藏之物。一旦大違成憲。而偏用於一方乎。西邊財匱竭。則必取諸東南。東南積剩之物。今於無事之時。既巧取而偏用之矣。或東南有意外之患。又將取之何地乎。又曰。五勅之後。其年五月。又降一勅。以廣西錢一百萬貫。和預買紬絹。其文曰。人戶願請價錢。若於年例外支散。可以接濟。其實則人戶不願也。且以無為軍言之。民間買紬一疋。須用一貫四五百文足。人戶請常年錢一貫文。省今年例外創添支之數。此乃聚歛之術。臣恐自此一勅之後。相繼無已。又况侵削十路百姓。只得絹一百萬匹。未足以充陝西三兩月之費。此豈神考接濟之法乎。得太學生蔡薺長書。崇寧元年五月。籍黨人陳瓘任伯兩等。凡五十人。並令三省籍記。不得與在京差遣。尋責監建州武夷觀。六月。曾布欲傾惇而未能。乃詭情薦陳瓘。張庭堅輩。及蔡京用而布得罪矣。閏六月初。劉

后為賢妃生子。時宮中虛位。后因是得立。然纔三月而薨。謚獻愍太子。后之立也。鄒浩三疏諫。隨削其藁。尋得罪貶。上初即位。召浩還朝。首及諫立后事。褒嘆再三。詢藁安在。對曰。焚之矣。退告公。公曰。禍其在此乎。異時姦人妄出一緘。不可辯矣。及是蔡京用事。素忌浩。乃使其黨為偽疏。謂本宮人卓姬生子。后殺其母而取其子。其辭云。殺卓氏而奪其子。欺人可也。詎可欺天乎。詔暴其事。安置永州。明年移昭州。作青詞告上帝。有追省當時奏御之三章。初無殺母取子之一字。蓋為是云。九月。奉御寶批。應元祐謫籍并元符未叙復過當之人。各具元籍定姓名人數。進入。仍常切覺察。不得與在京差遣。文臣曾任待制以上官。餘官陳瓘等。凡一百一十九人。御書黨籍。刻石端禮門。十月。貶韓忠彥。陳瓘二十人有差。公坐黨籍。除名勒停送袁州編管。崇寧二年正月。論詆誣罪。貶竄任伯兩十四人。公移送廬州編管。作福州大中寺雲會堂記。作賈誼治安策論。三月。親試舉人時。李階為禮部進士第一。深之子。乃公之甥也。特奏名安忱對策云。使黨人之子。階魁南宮多士。無以示天下。遂奪階出身而賜忱第。忱惇弟也。著合浦尊堯集。崇寧三年三月五日。合浦作了齋記。四月。作心畫銘寄正由。十七日。跋李氏所藏神宗奎畫。十月丙午。作廣中樞

龜鑑寄正彙。作易說。崇寧四年四月十五日。跋司馬溫公送李益之侍郎歸廬山詩後。三月五日。在合浦作葵木杖銘。作真贊。十月二十日。作祭李德祖甥文。又作祭李叔平提舉文。崇寧五年正月。彗星出西方。其長竟天。大赦毀黨碑。公以星赦。量移郴州。得自便。作杜鵑詞。尋居明州。作伯瑜墓誌銘。陳伯瑜墓誌銘。在政和年間作。和陶淵明歸去來辭。九月二十八日。跋東坡詩曲。作四明尊堯集。大觀元年八月一日。作明州延慶寺淨土院記。大觀二年二月八日。作湖州開元寺觀音記。十一月二十日。跋楊中立撰陳居士傳。大觀三年。初公自嶺外歸。居明州。嘗令正彙幹盡錢塘。偶聞承議郎蔡宏說。感稱太師蔡京福厚。陰有搖動中官之迹。不敢隱默。亟詣杭州告京有反狀。知杭州蔡夔方與京叙宗盟。結死黨。遂執正彙送京師。而飛書告京。俾為計事。下開封制獄。上命中丞吳執中鞠之。獄辭果不右正彙。詔獄下明州。捕公甚急。士民哭送之。公不為動。入獄。見其子被繫。笑曰。不肖子。煩吾一行。蔡京用酷吏權尹李孝壽治其事。孝壽使吏脅公證正彙之妄。又誘公承教。正彙妄訴。公曰。正彙聞京將不利於社稷。傳於道路。遽自陳告。瓘豈與知。若瓘以所知忘父子之恩。而指其為妄。則情所不忍。挾私情以符合其說。又

義所不為。况不欺不貳。平昔所以事君教子。豈於利害之際。有所貪畏。自違其言乎。蔡京姦邪。必為國禍。瓘固嘗論於諫省。亦不待今日語言間也。一日。孝壽坐廳事。簾中列五木于庭。引公問之。公從容曰。蔡京之罪。瓘實知之。不肖子不知也。願多得筆札。悉以聞。孝壽懼不敢與。時內侍黃經臣監勘。聞公所對。失聲歎息。謂公曰。主上正欲得實。右司但依此供狀。大觀四年二月。獄具。竄公安置通州。正彙流沙門島。十一月。放自便。公上通州。自便謝表。公在通州。張無盡入相。欲引公自助。時置政典局。乃自局中奉旨。取公所著尊堯集。蓋將施行所論。而由史局用公也。公料其不能成。事辭以修寫未成。繼日承政典局。牒坐聖旨。俾州郡催促。公於六月初五日。乃用奏狀進表。以黃帕封緘。繳申政典局。乞於御前開拆。或謂公當徑申局中。而通書廟堂。公曰。恨不得直達乙覽。豈復可與書耶。彼為宰相。有所施為。不於三省公行。乃置局建官。若自私者。人將懷疑而生忌。正恐尊堯集至。而彼已動搖矣。遠其迹。猶恐不免。况以書耶。繼而悉如公言。政和元年四月。張商英罷。九月。公亦有勒停台州之命。責詞謂私與張商英意要行用。於是衆人服公之遠慮。而恠何執中為相。鄧洵仁為執政。革敢欺罔上下也。初。王安石嘗著日錄八十卷。初公謂安石此書。詆訕宗廟。誣

薄神考。蓋者撰在退居鍾山。懟上熱中之時。讀其書。論其事。不考其時可乎。及公貶廬州。乃著合浦尊堯集。以日錄詆誣之罪。歸于蔡卞。其後北歸。謂劉世安曰。昨在諫省。嘗以王荆公比伊尹。伊尹未嘗詆湯。胡可比也。又嘗以為神考之師。神考用荆公九載。何嘗終以其人為是乎。某之前言。可謂過矣。於是復著四明尊堯集。痛絕王氏。以發揚熙寧用舍。宰臣本末之緒。而自明區區改過之心。尊堯所以立名者。蓋以神考為堯。以主上為舜。而助舜尊堯也。書成。藏之于家。及是。奏御商英已罷。何執中等。乃請治尊堯詆誣之罪。勒停台州羈管。十九日申通州。十一月初十日巳時到台州。上台州羈管謝表。七月二十八日。跋司馬溫公簡後。公謫台州朝旨。下司行移峻急。所過州郡。皆令兵甲防送。不得稽留。至台久之。莫敢以居室借賃者。暫館僧舍。而郡守以十日之法。每遣廂巡起遣。故十日必為之遷一寺。公處澹然。不以介意。及到台數月。朝廷起遷人石。憾知州事。且令赴闕之官。士論訕訕。咸謂將有處分于公也。憾至。果揚言怖。公視事。次日即遣兵官突來約束。不得令出入。取責鄰人防守狀。又置邏卒數鋪。前後巡察。抄錄賓客書問之往還者。雖親家書。迨至隔絕。未幾。復令兵官突來所居。搜檢行李。攝公至郡。郡庭垂簾如制獄。大陳獄具。蓋朝旨取索尊堯集。

副本。而憾為此以相迫脅。且公知其意。遂發問曰。今日之事。豈被旨耶。憾非所料。失措而應曰。有尚書劄子。捲簾出示。公劄子所行。蓋取尊堯集副本。以為係詆誣之書。合繳申毀棄也。公曰。然則朝廷旨禪取尊堯集耳。追某至此。復欲何為。因問之曰。君知尊堯所以立名乎。蓋以神考為堯。而以主上為舜也。助舜尊堯。何為詆誣。時相學術淺短。名分之義。未甚講求。故為人所祛。使請治尊堯之罪。將以結黨固寵也。君所得於彼者幾何。乃亦不畏公議。干犯名分乎。請具申。確此語。確將顯就誅戮。不必刑獄相恐也。憾不待公言畢。屢揖公。尋詔人曰。不敢引其說。尚自如此。良可畏也。繼又幽公僧舍。使小吏監守對榻。坐卧窘辱百端。人情憂怖。慮有不測。公安之。不以為撓。憾亦終不能為害。公謫台州。於法合進表謝。台州不為發逆。表未得達。而石憾之來。聲勢甚異。公料其必受蔡疑。風旨意在得其元海陵。所投書。必將搜索及行李。於是為封事。繳謝未封。緘於篋。題以臣名。憾至。果如所料。而以緘題之。故不敢輒開。遂以奏御。疑與執中皆怒。未幾罷之。或問公何以審其如此。公於疑初無他。疑懷遺書之愧。而其黨未知納忠。相据實自為計。今顯其迹。則法使之術不行矣。公雖緣蔡氏得罪。而首論私史。力排王氏。王蔡之黨。如薛昂。蹇序辰。何執中。鄧洵仁。鄧洵武。蔡疑之。



徒皆當時協力排陷。欲殺公者。亦不獨蔡京兄弟而已。蔡薤與公初不相識。公上宰相書。謫居海陵。薤為太學生。以長書遺公。論天下事。皆合天下公議。遣人致於海陵。謂公諫疏婉而有理。似陸宣公剛而不撓。似狄梁公文章淵源。發明正道。則韓文公其人也。至次年。薤以對策為大魁。所陳時務。與前書頓異。於是愧悔。而欲殺公以滅口。密贊京黨。出力尤甚。正彙三山之窟。石械台州紛紛。皆其所為也。政和二年二月二日。跋張氏逸事。劉子後。八月九日。作責沈文。貽知默姪。政和三年十月十九日。跋江左司勸發菩提心文。政和四年四月八日。跋張承老所藏孫元忠司諫簡後。五月二日。書孫元忠上劉莘老甘賦後。政和五年三月二十八日。跋黃尚書送左經臣序後。政和六年。公在台州。屢該赦。當自便而刑部不敢檢舉。既而上旨。令叙官放還。乃因郊霈霈息。然初以宣德郎被謫。而叙官。乃得承事郎。實降鑄也。被命之後。忽得州牒。備坐省劄云。奉御批。叙復數內。陳瓘未當合於見在官外叙一官。仍取旨差遣台州。告示本官知委。公既供知季狀。陳乞差遣人。皆賀公以為起廢有漸也。公曰。此廟堂欺君玩世之術爾。若與差遣。豈應見問。上聞吾叙官不當。而見於御批。諸公不敢。但已為此遷延之說。以塞上旨。家狀雖可供。而差遣其可乞邪。彼

謂吾不堪流落。而因茲見憐爾。乃報云家狀。昨因削籍。毀棄無憑。供具事果不行。復叙宣教郎。主管江州太平觀。公因叙官自便。還通州。時開封府尹盛章與石械以私詒爭。章密取旨。送械獄以罪。編置通州。因揚言為公報忿。公聞而嘆曰。此豈盛世所宜有耶。因謀徙居以避之。時縣宰與公姻家。而於械亦沾親。械屬宰求館舍。宰以為疑。公謂宰曰。親戚患難。宜相州旋。置此恤彼。乃為義事。無足嫌也。宰於是與之盡力。械聞而愧。遣其子來致謝。公曰。吾為宰盡親戚忠告之益爾。非欲以德報怨。却之不見。月餘。遂挈家為江上之遊。公泛江至江州。愛其江州之勝。因卜居于城外。杜門不出。謁來者不拒。士大夫經由江上者。往往不之公府。而必到公家。延接無間。每為燕豆之款。踰年歡適。忽有朝旨。不許出城。月中存存。又更易守臣。日降下司文移。以俟新守之到。外間叵測。無不震懼。交遊中有來索與公往復書簡者。有碎公所書碑刻碑額者。公亦自期以死。惕息俟命而已。閱數日。乃令移南康居住。蓋緣蔡氏之黨。必欲殺公以快意。時王宋得罪。疾公者。來此時以怖公也。劉待制器之聞之。以書抵公曰。此乃鶴相。恐脅濮上之策。伎止此耳。公適居江州。讒者以為公來宋居之鄉。郡因危言陷公。賴徽宗聖察。止令移居南康。七月朔。作福州鳳池報慈院華嚴閣記。十

一月晦。作常州新修薦福寺記。政和七年。重和元年。宣和元年。八月十五日。作鄧南夫文。宣和二年。宣和三年。春。因方寇。嘯聚京黨。又遣飛語。言公之壻。為方寇所劫。取欲以相中傷。復令移楚州。公所論京下。皆披摘。其用心而發露其潛慝。蔡氏最所嫉忌。故得禍比同時諸公為最。猶以徽宗保全不至死也。公徙居山陽。經由江都。時淮帥毛友達。或疑其蔡氏腹心。勸公晦迹而過。公曰。吾無私憾於蔡氏。蔡氏之人。豈無是非之公乎。乃先遣書遺之。毛報書加禮。有公立朝行己之道。願望見而不可得之語。即出郊候公。語頗輸誠。公亦待之無間。後聞奏方寇事。不為欺隱。以書譽之。於親舊曰。蔽遮江淮。沮遏賊勢。斯人有助也。蓋公與人為善。不分彼此。大率如此。晚進後輩。因公激發。默化而為善者。不可一二舉也。十月。張商英卒於京南。時公在山陽。方與賓舊會食。見邸報有張天覺所上遺表。遽止酒而起。歎傷異常。客有以為疑者。公曰。張固非粹德。且復才疎。然時人歸向之。今其云亡。人望絕矣。近觀天時人事。有變革。正恐雖有盛德者。未必乎上下之聽。殆難濟也。未幾。公亦感疾。睢陽劉安世器之。因公病。使人勸公以醫藥自輔云。天下將有賴於公。當力加保養。以待時用。時徐師川以才氣自負。小肯降志於人。常言吾於魯直為舅氏。然不免有所

竊議。至於了翁。心誠服之。每見公或經旬月。必設拜禮。忠宣范公純仁。晚年益以天下自任。尤留意人才。或問其所儲蓄。人才可為今日用者。荅曰。陳瓘。又問其次。曰。陳瓘自好也。蓋言公可以獨當天下一重也。至是人憂大厦之將顛。或問游酢。定夫。察院以當今可濟世之人。定夫曰。四海人才不能周知。以所知識。陳了翁其人也。宣和四年。宣和五年。宣和六年。二月。公卒於楚州。初葬廣陵。宣和七年。靖康元年。贈諫議大夫。紹興二十六年八月三十日。賜謚忠肅。仁宗皇帝天聖二年。天子修先帝功臣記之于史。因訪世卿之世族。州里官次行治之本末於其家。有詔次其功。著之令典。布之天下。中間節文曰。維所以寵嘉陳氏之子孫者。其世母絕。右寵世卿。神宗皇帝元豐二年。皇帝臨軒。親試舉人。陳瓘中進士第三。上顧考官問家世。陳公襄對曰。陳瓘之子。玉音嘆息曰。循吏宜有此子。右寵備父子。哲宗皇帝元符三年九月。陳瓘自諫省論蔡京交結外戚。廷欽聖也。欽聖未察。謫監揚州筦庫。被命數日。欽聖悔悟。遣中使宣諭。以非本旨。方且開解。主上召還矣。上密遣中使賜黃金百兩。度牒十道。傳玉音。令勿遽行。繼有改知無為軍之命。瓘以蔡京猶在。而復言者。官是非不辨。不敢祇受。及京外補。瓘乃拜命祇受。上表謝恩。

右寵璣 高宗皇帝紹興八年三月。詔陳淵登對稱旨。授承事郎。有旨。賜同進士出身。紹興九年。詔除陳淵監察御史。再詔遷右正言。以職事上殿。

玉音宣諭。御札曰。昔陳璣為諫官。論國家安危治亂。係君子小人之用舍。及言蔡京等誤國之罪。建靖康之難。無一不驗。儻使其言得用。不為姦慝所乘。以抵于死。則朕今日豈至於披草莽以立朝廷乎。今命卿以此職。注意不輕。勿墮家聲。朕之所深望也。嘉歎久之。時上方驚儒術。論王氏程氏之學。玉音曰。聞卿是楊時壻所學。深得楊時之道。淵對。臣何足以知之。玉音又曰。楊時之學。乃是孔孟之道。三經義辯。足以鍼王氏之膏肓矣。淵對曰。楊時初亦信王安石之說。後學於二程。乃知王氏之非。玉音又曰。有三經義辯。便見王安石穿鑿之失。淵對曰。穿鑿乃王安石小過。其罪在於不知大道。原本一失。無所不差。故行之天下。遂為大害。玉音問其差若何。淵對曰。聖學之傳。止有論語。中庸。孟子之書。安石自未嘗知。舉數條辯析。玉音稱善。右寵璣 高宗皇帝紹興十年。御札曰。朕思忠臣而錄用其子孫。如卿者。抑又保家之主也。雖斲能趨遣於朝。而終以疾病退歸丘園。可勝慨嘆。今賜卿白金二百兩。聊助傲裝之費。至可領也。右寵正彙 欽宗皇帝靖康元年。臣僚上言。審取舍以辯是非。行賞罰以明

好惡。明主之先務也。切見蔡京於元符建中之際。包藏既深。罪惡未顯。有識之士。雖知其必亂天下。而嗜進妾倭之徒。亦且倚以為宗主。故右司負外郎陳璣嘗為諫官。獨能推測其用心。而披露其姦狀於未萌之前。詳言極論。明若著龜。至於今日無一不效。故京尤畏忌之。此一時言事官得禍為最酷。諸人既得自便。而璣獨再貶。指定居住州郡。流離羈窮。終以廢死。忠義之士。至今悲之。語及璣者。未嘗不為之流涕也。竊考前代以忠直忤犯璣。俾至於公議獲伸之時。雖已死亡。未有不褒崇爵秩。而錄用其子孫者也。伏望睿慈。憫璣齋恨沒地。不及目覩。聖明優加追贈。及官其子孫。以為忠義之勸。增士習以厚民風。實天下幸甚。取進止。靖康元年三月十七日。三省同奉 聖旨。陳璣持贈諫議大夫。仍與二子恩澤。勅骨體之臣。狗義而不顧。毀譽之實。既久而後明。爰錫憫章。式旌高節。故承議郎陳璣。忠貫日月。名等岱嵩。以諫議為心。安社稷為說。凜凜乎著龜之光。見諤諤乎藥石之至言。別白正邪。效于今日。田夫野老。莫不敢容。元惡巨姦。為之喪膽。流落之久。志氣不衰。辛老窮鄉。識者太息。緬懷風烈。肆有褒嘉。寵以諫垣。錄其嗣子。庶幾天下忠義之士。咸知朝廷勸賞之公。噫。及醜何為。自致淮南之懼。魏公若在。必輟遼東之行。矧我舊臣。無愧前哲。尚歆異數。永賁

九原。可特贈右諫議大夫。右寵瓘贈諫議制。高宗皇帝。紹興二十六年八月十三日。勅中書門下省。尚書省。關禮部狀準。紹興二十六年六月二十四日三省同奉。聖旨。陳瓘昔為諫官。議論忠謹。所言皆驗於後。及所著尊堯集。指定王安石日錄之過。深明君臣之分。殊可歎嘉。可特賜謚。令有司議定以聞。本部尋行下太常寺施行去後。據本寺申。本寺今欲擬謚曰忠肅。慮國忘家曰忠。剛德克成曰肅。伏乞省部更賜詳酌施行。本部今欲依太常寺擬到事理施行。伏乞朝廷詳酌指揮施行。申聞事。七月十六日三省同奉。聖旨。依關送中書門下省指揮。吏部供到狀勘。會陳瓘生前。係左承議郎右司員外郎。贈右諫議大夫。贈左通奉大夫。申聞事。奉勅傳曰。太上有立德。其次有立功。其次有立言。朕嘗謂言苟立矣。二者在焉。故左承議郎右司員外郎。贈右諫議大夫。贈左通奉大夫。陳瓘所謂沒而其言立者歟。昔孔子作春秋貶諸侯。討大夫以獎王室。爾明此義。故其言知尊君。昔唐明皇罷張九齡。相林甫。議者謂治亂自此分。爾用此說。故其言驗於後。若此者。蓋朕賜之意也。爾義有所激。身且不顧。况於家乎。內有所守。死且不懼。况少貶乎。若此者。蓋有司定謚之指也。噫。生而為英。死而為靈。朕意爾之精爽。尚凜凜乎如生。必能鑒此哉。可特賜謚忠肅。奉勅

如右。牒到奉行。紹興二十六年八月三十日。中書舍人王綸行。右寵瓘謚忠肅制。臣仰惟。皇帝陛下紹興之初。宵旰求治。思念忠臣。錄其子孫。詔先臣正彙賜對行殿。將加擢用。而先臣久任在貶所。幽處窟室。時已抱病。扣陛墜辭。宸衷惻然憐之。偶寓直內閣。奉祠以歸。又寵降御札。賜白金以獎其行。顧念撫存之意。具載詔旨。宸翰寶章。雲漢昭回。榮動縉紳。輝生蔀屋。於虀休哉。先臣銜戴厚恩。迺以疾廢。不能仰酌天地之大德。為終身恨戒。臣捐軀盡瘁。圖報萬一。臣追惟先大父臣瓘。頃在諫垣。以論事忤權臣。南流合浦。先臣繼以言獲罪。北竄海島。十有三年。徽宗皇帝。照其非辜。恩徒近甸。逮靖康間。始命以官。除丞太僕。主上龍飛。眷遇愈厚。非特先臣被寵若此。邇者先大父臣復家。賜謚忠肅。父子際遇。人臣罕有。其此臣雖至愚。竊謂君臣之際。實難。唐太宗待魏徵最厚。然徵幾沒。未顧其家衰矣。至文宗。迺始錄用其五世孫。今臣一門三世。咸受。聖恩。其為榮幸。豈唐魏氏所能企及哉。臣材力駕下。懼無毫髮補報。如先臣所戒。謹昧死以所藏宸翰。刊之琬琰。昭示天下萬世。且推原事迹。告于若孫。俾無忘。聖天子之休德云。紹興二十八年五月朔日。右朝奉大夫添差權通判建州軍州主管學事。兼管內勸農事。陳大方謹書。吾大祖駕部尚書

公家訓云。事親以孝。事君以忠。為吏以廉。立身以學。所以自吏部尚書。特進諫議而下。至直閣正言。及宗正少卿。累世俱蒙 聖眷。御札 玉音。褒嘉賜賚不一。史冊備載。今錄一二。附於年譜之後。以示子孫。如能恪守祖訓。忠以事君。孝以事親。廉以蒞事。學以立身。不墜家聲。則豈不能動朝闕之眷遇耶。是又宣子之所深望也。子孫其勉旃。延祐二年。歲在乙卯。仲春之望。七世孫宣子百拜謹書。了齋先生舊祠堂記。建中之初。右司諫陳公瑩中。論蔡氏兄弟忤旨竄嶺表。公之南遷。不以其罪舉天下憤惜之。無敢言者。名隸黨籍。餘二十年。轉徙道途無寧歲。卒以窮死。初京為翰林承旨。以詞命為職。潛姦隱慝。未形於事。雖未通顯世之人。蓋莫知其非也。公於時力言京不可用。用之必為腹心患。宗社安危。未可知也。聞者往往甚其言。以為京之惡不至是已。而陰結嬖倖。竊國柄。悉如公言。於是人始服公為著龜也。昔王文公安石學行負時望。神宗皇帝用參大政。士大夫相慶於朝。謂三代之治。可以立致。呂公獻可獨以為不然。抗章論之。雖文正溫公。猶以為太遽。欲獻可姑緩之。未幾。多變更祖宗故事。以興利開違為務。諸公雖悉力交攻之。莫能奪。其流毒至于今未殄也。故溫公每謂人曰。獻可之先見。余所不及。心誠服之。余以謂公之於京。言之於未用之

前。獻可之於荆公。論之於既用之後。則公之先見。於獻可有光矣。二公之言。蓋異車而同轍也。靖康中。朝廷欲盡復祖宗之舊。而一時故老無在者。天子念公之忠。追贈諫議大夫。官其四子。所以寵嘉之甚厚。此非私於陳氏也。蓋將以風勵臣節也。而公之邑人。乃相與即縣庠為祠堂。以奉公祠。堂成。屬予為記。余曰。公之德業。足以澤世垂後。雖不用於時。而其流風餘韻。獨足以立懦夫之志。非一鄉可得而擅也。然居今之世。流離擯斥。其施不廣。而邑之士大夫。誦其書。尊其道。仗節秉義。繼其風烈。時有人焉。則功施於其鄉為多矣。古者有功。人則祀之。則公之祀當載祀典。以遺來世。是宜書。乃為之書。建炎四年八月朔。記。龍圖閣直學士。朝散大夫。提舉杭州洞霄宮。楊時撰。從事郎。新差建寧府府學教授。李經書。并題額。又記云。延平太守余景瞻。以書語曰。了齋忠肅公。此邦沙縣人。陳公以識見之。明。言論之直。褒于靖康。比嘗采諫垣之制。而立勸忠之坊也。了齋遺蹟而求之。公生之年。距今一百五十六載。所居之屋。尚存三間。并後楹。一累塹。施桁。可謂甚古。則公生之十八年也。且公居合浦。謂室為齋。名齋曰了。自為之記。以著齋。心享上之義。後居荆。浙江淮之間。舉世以了翁稱。公之所居。何適而非了齋。况於其鄉耶。葺其僅存。與其既圯。復其齋扁。藏其遺

書肖像於楹。俾其雲仍歲時奉祀。是邦人尊慕所同者。而際也。得舉而行之。願紀焉。岳復於余侯曰。尚賢存古。教化之先務。夫了齋身居言責之時。憫邪說之誣民。憤小人之蠹國。明目張膽。力排其姦欺。痛誣詆其凶險。至於京之用舍。為治亂之分。雖遠去於朝。流離轉徙。而籲天呼父。忠之所激。滔滔汨汨。如長江大河。無所壅。巖巖烈烈。如迅風勁庭。無所避。若乃平生學力。尤著見於尊堯之書。其在合浦。辨私史。增加昭裕陵之盛美。自謂對越在天。至于四明。為論四十九篇。拔本塞源。不遺餘力。而後已。此其任宗社安危之責。視生死禍福。為何等物。聞風起者。當如何其尊慕也。故昔之滕樞竹尾。地雖尋丈。以了齋何陋之有。非惟合浦為然也。凡公之居。人必加敬。尺椽寸甍。相期勿壞。今之模舊規。新匪質。謂之了齋。不在茲乎。詩曰。豈不爾思。室是遠而。孔子曰。未之思也。夫何遠之有。夫所思在心。而不繫乎室之遠近。余侯之心。豈不曰。屋已百餘年矣。修之復可百年。後未繼今者。敬益弗替。是此邦之人。常目繫而道存也。抑了齋之道。存乎其言。既輯既藏。講明之傳于學者。以無忘公志。則邦人之尊慕。達於天下之尊慕。龜山所謂誦其言。尊其道。仗節秉義。以繼其風烈者。廣矣。嘉定三年二月朔記。

奉議郎權撫州軍州兼管内勸農營田事三山林岳撰 從事郎福

州路提點刑獄司撫法官郭詢直篆書。迪功郎南劍州州學教授楊宏中隸額。淳熙年間。未文公先生知南康軍州。嘗立濂溪先生祠。以了翁先生配祀。見未文公先生年譜。當考。嘉熙三年。主簿燕燕廳黃商楫詣于郡守馬天驥撥官田租米貳拾帳入焉。每歲以春秋二仲丁奉祀云。讀了翁文集。嘗讀陳忠肅公之文。觀其述已之志。稱人之善。未嘗不推而決諸義利取舍之間。於是公之所以常胸中浩然。前定不疚者。其所自得。蓋有在也。孟子曰。欲知舜與跖之分。無他。利與善之間耳。又曰。生亦我所欲。義亦我所取。二者不可得兼。舍生而欲義者也。陳公之學。蓋得諸此。惟其察而精之也。入毫芒。是以擴而充之也。塞宇宙。新安朱熹敬書。又云。李氏曰。舜之所以能替眚底豫者。盡事親之道。共為子職。不見父母之非而已。昔羅仲素語此。云只為天下無不是底父母。了翁聞而善之。曰。唯如此。而後天下之為父子者定。彼臣弑其君。子弑其父者。常始於見其有不是處耳。又云。了翁於義利上。看得最分明。凡作文字。多好正理。又云。了翁氣剛才大。至完道卿不及也。又云。了翁有濟世之才。惜其不及用也。先儒云。明道先生之學。發乎誠敬。了翁先生之學。發乎忠勇。百世之下。聞其風而興起者。其志遠矣。龜山語錄云。了翁乘舟之喻。貶通州過

赦自便謝表。臣久寄食於異縣。常委事於長舅。所營不足以藩身。其出每緣於糊口。去庭闈者三月。聞道路之一言。耳投而輒行。親危而不顧。狐突教子。素存不貳之風。曾參殺人。寧免至三之感。事既匿而難曉。時浸久而益疑。制所深嚴。就逮於重江之外。獄辭平允。閱實於片言之中。尋沐寬恩。移置於近地。海島萬里。不如無子之為憂。淮渚一身。彌覺有生之有患。擢髮不足以數。臣之罪。瀝血不足以寫。臣之心。初心馮先生跋文。嗚呼。此吾忠肅了翁先生之遺墨也。世豈復有斯人乎哉。公一片忠肝血。邪革。正如秋霜烈日可畏。而仰公之孫。以示余。余惟此表。曾為石幟祛篋。而不能壞。劫火洞然。不燼惟玉。是可寶也。想公起草時。天地鬼神臨上質。傍其克有相。懾獨何人哉。而為京卞之所膺。小人亦枉為小人。公每得明道。先生文。必冠帶而讀之。余於公亦然。咸淳己丑。後學馮夢得謹跋。

# 永樂大典卷之三千一百四十三

## 永樂大典卷之三千一百四十四

九真

陳

陳了翁年譜。貶台州謝表。九月二十一日。都省劄子奉。聖旨。陳瓘自撰尊堯集。語言無緒。盡係詆誣。不行毀棄。送與張商英。意要行用。特勒停送台州羈管。今本州當職官常切覺察。不得放出州城。月具存在申尚書省。及大小急遷。臣即時望闕謝恩。發離本家。水陸並行。不敢住滯。今於十一月初十日。已時到台州城內者。言念吠畝之志。一書可通。芻蕘之言。萬里不隔。集羣辭而上達。遭一覽以為榮。竄路雖遙。陳情已畢。中謝伏念。臣材如糞土。身若梗蓬。非敢以著書為能。所陳者戴君之義。知詆誣之不可。志在尊堯。豈行用之敢忘。心惟助舜。語言無緒。議論至迂。獨歸美於先猷。遂大違於國是。不行毀棄。有誤咨詢。虛消十載之光陰。靡恤一門之溝壑。果煩揆路。特建刑章。若非恃庇於九重。安得延齡於再遠。由淮入湖。自通至台。怒濤雖隔。阻於重江。毒瘴素殊於五嶺。尚留項踵。獨賴君親。茲蓋伏遇皇帝陛下。天大并容。日明洞照。以至慈而善貸。推觀過之深仁。憫此顛

擠欲其存在。以身憤怨。螻蟻之命至微。徇國捐生。犬馬之心未替。夢馳丹闕。日想清光。重干擢髮之誅。徒鬱戴盆之望。臣自今夏以來。彈奏蔡京罪惡。更涉寒暑。彈疏累上。伏蒙陛下洞察其情。以章付外。而三省大臣。或陰私交結。或私懷畏避。並不疾速進呈。取旨。謫降國之典刑。幾廢不用。公議安在。伏望聖慈特賜詔問三省。顧望稽逆之意。仍乞以臣前後所奏。并臺諫官彈劾事理。速賜施行。以慰士論。候勅旨。東崗徐先生跋文。忠肅了翁陳先生官諫議日。累疏斥京下姦邪。遂為羣小所深仇。迄以所著尊堯集。語言詆誣。而下石之。乃坐貶天台。於是小人肆行無忌。憚稔成夷狄之禍。吁尚忍言之。今讀公諫垣手藁。及到台謝表。忠義之氣。凜然可與日月爭光於萬世。公之曰。雖不得行於一世。然天經人紀。隱然賴之而存。啓我宋中興之運者。其機在此。忠臣義士讀之。當自見也。咸淳五年。歲在己巳。六月十有七日。後學上饒徐直諫。端拜敬書于三山憲治繡鉢堂。澹庵胡先生跋文。了翁先生嘗跋六一居士帖云。使二十年前見此書。皆如今日。則朋黨之論不起。東坡曰。美哉瑩中之言也。今觀此帖。使三四十年前。人皆知愛敬了翁。如合浦李侯。則豈復有靖康城下之盟哉。至今了翁名節。爛然於殺青之上。子姪登臺省。或為監司郡守。皆有能

名。諸孫亦疊疊逼人。而合浦之子。亦布列仕路。聲稱藉甚。當時謀陷了翁者。無聞焉。乃知身賢。賢也。賢者亦有後。天道豈可誣也。朔齋劉先生跋文。忠肅陳公尊堯集。與介甫日錄。字字對壘。使天下後世知神考之聖明。介甫之誣謗。較然如白黑之不可以貿亂。上以紓在天之憤。下以視無君之戒。猗歟偉哉。方京下得志。諸賢被禍。非公有貫日月。裂金石之忠義。有動山嶽。倒河海之力量。有蹈白刃。甘鼎鑊之氣節。奮此筆。誅此姦。則邪說肆行天下。惟王氏之信。而神考畏天法。祖愛民之本心。亦將闐然莫能暴白。則是書也。直可與尊王一經。並行於千萬世矣。嗚呼。介甫讀書人。非若世之鄙夫患夫者。顧以險狠自用。剛愎好勝。所為一不遂。則忿憤所發。天地易位。所謂天命不足畏。祖宗不足法。人言不足恤。雖小人之無忌憚者。亦不敢出諸口。介甫獨昌言之。而不作食餌之詐。仁祖薄之。則銜恚不忘。而紛更之論起。新法之害。神考廢之。則怨懟不平。而誣謗之史作。二事皆無君之大者。無君之罪。浮於誤國。尊堯之書出。而是非始定。天生斯人。豈偶然哉。震孫蒙恩。使闕行部。過延平。嘗有詩云。川媚山輝寶氣鍾。尊堯而後幾儒宗。往來但指龍津說。不道人中自有龍。蓋以識其景慕之意。一日公之孫宣子。袖此卷相示。歛容肅讀。生氣凜凜。如見公手題。臣



某謹封時。不意垂老有此奇事。乃粗記其梗槩於後。為子孫者。其實藏之。咸淳二年七月己亥。後學渤海劉震孫謹書。龜山楊先生登了翁書。論易始女壯。因及陽城事。曰陽城於裴延齡未壯時。不能力救。及欲以毀白麻。哭殿庭。某謂白麻王言也。不可毀。天子之庭。非哭所也。使時君執而戮之。不為無名。以其處於昏上亂相之間。則免也。幸而已。了齋先生年譜後序。年譜自晉唐來。有詩文傳世者。皆有之。如淵明自書甲子。書義熙即其意。若昌黎浣花詩文。間自有紀年次第。後人惟萃而編之。乾淳諸老尤詳備閩中。與先生同時。如龜山楊公譜亦先成。而了齋先生忠烈如許。彤史美管。固已悉載本末矣。唯年譜最後。自嘉祐丁酉。迨今二百數十年。始卒業於廼孫宣子之手。嘻誠難矣。太史公未畢之。願盡留遺。遷竟就其志。觀於今譜。是或一道也。譜之成。乃孫年六十一。茲七十又五。尤以先公遺文。恐負付託。今年成書。明年成廬。又明年成豐碑。又明年成祠宇。不惟先生年經月緯有攷。而廼孫日曆亦不虛費。余生晚。後得觀成書。某年而責沈。某年而尊堯。某年而彈章。某年而擊蔡。某年而遭石戕之厄。於是余平生無憾矣。史公稱孔子布衣。傳于數世。使其見於今。孔子何止幾數十世。吾於其孫五世而見。如君子之進退。時之治亂。可攷焉。姚宋相則開元。

楊李用而天寶。每上下千數百年為之。可慨者多矣。觀陳忠肅公年譜。得以攷其進退。重為當時流涕也。豈徒紀歲月以見平生梗槩而已。天下有非常之變。造物必生非常之人以儼之。其人之得志。則變消於無形。而天下受其福。而不知其人。設不得志。非常之變。莫不撲滅。不惟禍天下。且貽後世患未已也。何則。造物逆知有紹聖元符之小人。必釀成靖康。不忍言之禍。故生公於嘉祐之四月。至元豐三年。公生已二十三年。即以甲科第。三人顯矣。造物正有諉於公也。以公未壯之年。際功名之善述。然則公於朝廷為忠臣。松澗於陳氏。可以為孝子。象麓後學。廣信未懋子。功父謹書于譜後。大德甲辰十月既望。客七峯冷廡。先祖忠肅公了翁先生年譜序。以事繫日。以日繫月。以月繫時。以時繫年。此古人記事之法也。由唐以來。文人才士。倣而效之。每於先賢文集之首。以紀其人平昔所行所為之事。因其歲月而錄之。名曰年譜。蓋欲尊其人而景其行。其來尚矣。至宋而後。前賢往哲。亦皆有之。吾祖忠肅了翁所著之文。其行於世者不一。有合浦尊堯集易說。及了翁文。初則有龜山南軒晦庵諸先生跋之於其前。近則有初心朔齋東崗諸名公跋之於其後。無非表我公忠謹之忱。而述其景慕之意。况我公自少年登第入仕以來。忠於愛君。忘身殉國。獨立於群。

小之中。一齊衆楚。當時在朝。巨姦不獨京卞。如惇。如布。如何執中。蹇序辰。如鄧洵仁。鄧洵武。薛昂。林自安。惇。蔡蕤。石愷之徒。植朋結黨。專一擠排。傾陷。摧折困辱。而欲寘公於死地。我公一片忠肝義膽。不畏強禦。不避誅殛。惟以愛君憂國之心為心。確然不變封章。抗疏至數萬言。連編累牘。幾成牛腰。言辭直捷。無所回諱。且深為權姦所嫉。群邪所忌。今年貶海陵。明年竄嶺表。羈通州。置天台。移南康。徙山陽。轉徙流移。歲無寧日。我公安之而不為之撓。曲荷聖君存愛。不殺言者。保而全之。不抵于死。亦萬死一生之幸。今文集之外。比諸前賢。獨無年譜。非缺典歟耳。孫宣子。自大元兵革蹂躪之後。收拾殘編。斷簡於煨燼之餘。又得靜得樊君歸由富沙而獲尊堯諸集。遂成其譜云。嗣孫某拜書。重刊尊堯集序。尊君大義也。書曰。爾有嘉謀嘉猷。則入告爾后于內。爾乃順之于外。曰。斯謀斯猷。惟我后之德。王氏日錄。何其與此。惇子。嚮尊其父塔。卞尊其婦翁。臣王安石之不尊君。何也。四明尊堯集。乃陳了翁忠憤。至今猶有生氣。視合浦集異矣。翁九世孫重看。是集。嗚呼。夫子南面之靈。春秋尊王之意。豈君拜於其前。而容其舊臣坐乎其上。豈其旁讀重刊集。又喜孫能尊其祖。故不避其僭。而書乎其端。後至元之。又七年夏奉政大夫。隨州知州。蕪管內勸農事。三山林興祖。

拜手敬書。題了翁先生論賈誼治安策。了翁遺墨。今存者三百三十餘字。論賈誼治安策。自許舜禹而待人何薄。嗚呼。人若不自知。知人亦未易。誼之自許。必其自知也。夫天未欲平治天下。當今之世。舍我其誰也。誼之自知。庶幾孟子之自信。徐師川嘗云。吾於魯直為舅氏。然不免有所竊議。至於了翁心誠服之。范忠宣公多言人材。或問可為今日用者。答曰。陳某。又問其次。曰。陳某自好也。游定夫論人。亦曰。四海人材。不能周知。所知者。了翁其人也。劉器之嘗因公病。勉以醫藥自輔。天下將有賴於公。徐范游。劉皆當時賢士。知人之名。待人之不薄。翁豈不自知。而未嘗自許其論誼也宜哉。三山林興祖敬書。賈生誠有材者也。前後進言上書。勸文帝興禮樂。定制度。易風俗。謂可大息流涕痛哭。縷縷開陳。欲竭心腹。以結主知。卒見謫於長沙。死於梁。使天下後世爭惜其無成也。何故。惟了翁先生論其自處。不在舜禹之下。而待人也何薄。今觀對上所言曰。何不令如臣者熟計之。則曰。何不試臣。臣為屬國。又曰。何不令臣等就數之於前。甚至藐視在廷之臣。曰。猶謂國有人乎。安得絳灌等不共毀之。曰。洛陽年少。專欲擅權。紛亂談事。蓋有不能惜也。舜禹無臯。夔稷契。則無以事堯。孔子非黨三桓者。亦惟曰。以吾從大夫之後。不敢不告。天下正不易治。豈止獨一

君下獨一誼哉。求於誼者亦不再見。誼自謂通曉治體而昧於時。則未通達也。以泗上一亭長為天下主。至文帝時立國。方二十餘年。秦風未變。漢澤未洽。諸呂纒誅。諸劉復異。誼方謀奪室內之戈。請馘邊上之虜。此時可以驟興禮樂。壹定制。度。頓易風俗。則文帝尤聖於文王。絳灌猶賢於周公矣。有材之士。患在自作聰明。自作聰明者必多事。必多事者必多忤。少成無少年。使得其壽。行其術。未必不如晁錯也。王荆公亦好作聰明者也。晚年大吏張元祐之政。豈非溫公幕府之少年耶。先生尊堯集為誰而作。賈生一篇。其有以矣乎。三山黃文仲敬書。題了翁手澤。忠肅公手澤。皆為尊堯發其年月日時。一則政和二年四月初四日。一則政和二年五月十三日申時。是年公在台州。是年四月上宴蔡京內苑。是五月蔡京落致仕赴都堂議事。王蔡翁壻之好。京卞兄弟之情。君臣之義。四明雖欲尊堯。父子之親。政和不能為舜。或曰。公卞薦也。合浦何詆之深。吁。薦有重於君臣之義耶。三山林興祖敬書。書曰。作偽心勞日拙。信哉。夫作偽者。既自知其非矣。又明心人非之。復思以偽掩偽。惟日作之。惟日掩之。不亦勞乎。愈掩愈彰。不亦拙乎。王介甫作日錄是也。介甫多學而好勝者。必立異而爭不勝。必護短而主偏。而後博卞邪黨。諛之以求勝。遂推輓而入於非。既

不能明爭其非於當日。乃圖暗掩其非於後世。私作日記以亂國史。陰諂其上。移罪同列。偷飾已美。自謂無知之者。詎意合浦四明已有尊堯集十卷矣。追之索之。將以滅之。滅之不可。一錄一集。並傳世間。有如兩造而訟。孰是君子。孰是小人。不待分別。非了翁欲施此智。乃介甫作偽之黨。過謀無成。自如此拙也。每思邪黨之人。官穹祿厚。久於柄國。既無伊周大德。又無操懿大姦。惟能設機布弄。悞主嫉賢。卒至身亡國瘁。臭穢九泉。唾罵千古。亦獨何利而為此哉。厥後晦庵先生見先生收拾姦黨之罪太急。乃謂尊堯集只是討閹。為人臣子見有不禮於其君。其能默而不爭邪。若謂介甫心術隱微。處不曾攻得。則此集亦已鬧出什六七矣。三山黃文仲獨愚敬書。上經畧使書。請立了翁書院額。至正十九年十月吉時。十世孫儒學生陳澤。謹齋沐頓首百拜獻書于天使相君大人閣下。竊惟學校乃國朝育材之地。書院為先賢講道之所。凡天下郡邑皆有之。如建康鹿洞鉛山之宗。又邵武之樵溪。建寧之武夷。建安祠之不一。祠之在在皆焉。惟吾沙陽。迺了翁陳忠肅公。仲素羅文質公之鄉。了翁先生道學名節。而兼著其精神心術。見於著書立言。誠師表百世者也。宋咸淳庚午。創立書院。請命未下。迄今百有餘年。了翁先生尊堯有書。嚴春秋之筆。先儒謂直

可與尊王一經並行于世。貴沈有文。以貽兄孫幾叟。而曰。氣質之用狹。道學之力大。南軒張子謂斯文之傳。誠有補於世教。幾叟之師於龜山。楊氏實與呂氏同出程門。詳見中庸或問之篇。斑斑可見。文公先生曰。了翁之學。惟其察而精之也。入毫芒。是以擴而充之也。塞宇宙。又曰。了翁蓋世之才。邁往之氣。包括宇宙。又曰。了翁剛方正直之操。得之天授。其燭理之益精。陳義之益切。其學道之功。有不可誣矣。當時學者師尊之。謂公諫疏婉而有理。似陸宣公剛而不撓。似狄梁公文章淵源。發明正學。則韓文公其人。也。而當時天下指為司馬。文正公劉忠定公之黨。士夫相與言忠賢之臣者。必以三人為稱首。昧者不察其旨。而以道學名節為兩途。歧而二之。孟子曰。我善養吾浩然之氣。夫善養者。道學之力。名節。非浩然能獨存乎。學之不講。良可歎也。孟子替叟底豫章。文公集註載延平李氏之言。昔羅仲素語此云。只為天下無不是底父母。了翁聞而善之。曰。唯如此。而後天下之為父子者定。彼臣弑其君。子弑其父。常始於見其有不是處耳。嗚呼。先生之言。互相發明。以底厥蘊。大有功於名教。今皇元科舉盛行。尊尚文公之學。以四書表章之。普天際海。人誦家傳。夫誰不知有了翁先生者哉。獨其祠祀之未載。豈非闕歟。曩者觀風繡使張周二侯。按行沙邑。下車首

訪先生之祠。大書華扁表而章之。申明于省府。其牒文畧曰。了翁先生。貴沈有文。以述道學之有傳。尊堯有集。以明君臣之大義。文章德行。百世可法。揆諸表章。理宜褒獎。如蒙准言。設立書院。非惟先賢祀典不闕。其於教化不為無補。今天不遺斯文。聖天子嘉惠南邦。廣布玉音。以學校為先朝盛典。先賢圖籍書板。禁治毀壞。首擢閣下以經畧之任。巡行南土。伏惟閣下。當代儒宗。學博而器宏。位尊而德厚。粗之明刑度數之學。精之以性命道德之理。操能致君澤民之術。以濟明時。來可致之時。出而近聖天子之光。愚也。一介寒士。草茅微賤。敢不以聞。見為閣下言歟。借也甚矣。得無留意焉。一經品題。輝映千古。幸垂採擇焉。其了翁先生之道之大明於世。懸於閣下之天也。必矣。行將見煥發德音。炳然宸翰。揮龍鳳之祥文。昭日月之華扁。事光今古。固所願也。又敢所必也。伏惟閣下淵察不備。澤恐懼載拜。上經畧使第二書。至正二十年二月吉日。十世孫儒學生陳澤齋沐百拜復獻書于天使相君大人閣下。天下之事。時然而已矣。時之未至。士君子不敢先時而有為。時之既至。士君子不敢後時而不為也。且了翁豫章二先生之書院。基已久矣。先乎二先生者。則有濂溪二程之書院。同乎二先生者。則有楊龜山之書院。後乎二先生者。則有李延平朱文公之書

院廖槎溪真西山。蔡西山。及我朝魯齋大儒。俱各有書院。七峯蒼蒼。史水  
泱泱。二先生之風之後。在人心未能泯者。獨其祠祀之未立。豈賢侯伯之  
志願於是哉。聖天子臨御。廣布玉音。嘉惠南邦。以學校為先朝盛典。先賢  
圖籍書板。禁治毀壞。擢閣下以經畧之任。代天行化。經理南服。武功文化。  
不宜偏廢。閣下必能興起斯文為已任。二先生之書院。在閣下舉而行之。  
為何如耳。曩者憲使張周二侯。按行延平。下車首訪二先生之書院。大書  
華扁。表而章之。即為封事天府。柰風濤萬里。公文無由上達。幸際閣下。理  
勢兩符。天人參會。愚區區不避鈇鉞之誅。冒以書上。辱蒙採擇。今延平具  
解申聞。愚不辭奔走。往諸郡守。今公文到使府日久。未蒙施行。則愚之進  
退。實為狼狽。敢以書再上。然閣下朝奏而夕行。二先生之道。煥然大明於  
世。懸于閣下之天也。決矣。如其不然。信夫文運之窮。伏惟閣下淵察不備。  
**岳珂程史**。陳了翁始末。陳了翁在徽祖朝。名重一時。為右司員外郎。曾  
文肅敬之。欲引以附已。屢薦于上。使人諭意。以將大用之。了翁謂其子正  
彙曰。吾與丞相議名不合。今乃欲以官相餌。吾有一書將遺之。汝為我書。  
且曰。郊恩不遠。恐夫汝官。柰何。正彙再拜。願得了翁喜。明日持以見文肅。  
于都堂。適與左司朱彥會。待于賓次。朱借讀其書。動色既見。文肅果大怒。

嘻笑謂曰。此書它人得之。必怒。布則不然。雖十書不較也。了翁退。即錄所  
上文肅書。及日錄辨國用須知。以狀申三省。曰。昨詣尚書省投書。蒙中書  
相公面諭其詳。謂瓘所論為元祐淺見。單聞之說。兼言天下未嘗乏財。雖  
有十書。布亦不動。瓘不達大體。觸忤大臣。除具申御史臺。乞賜彈劾外。伏  
乞教奏。早行竄黜。遂出知秦州。鄒道鄉在兩掖。救之不從。上臨朝。謂文肅  
曰。瓘如此報恩地耶。又曰。卿一向引瓘。又欲除左右史。朕道不中。議論偏  
今日如何。文肅愧謝。初議竄徙。韓文定為首台。陸農師在政地。救之曰。瓘  
言誠過。當若責之。則更以此得名。曾布必能容之也。謫乃薄。余謂前輩名  
節之重。身蹈危機。不復小顧。申省公牘。百載而下。讀之凜凜。有生氣。余卅  
角時。先夫人教誦古今奏議。謂足壯它日氣節。此書與焉。今尚憶其全文。  
曰。瓘聞之。古賢未嘗無過。周公孔子。顏淵。皆有過也。子路聞之。則喜。所以  
為聖賢之徒。成湯改過。不吝。所以為百世之師。故曰。過而能改。善莫大焉。  
匹夫改過。善在一身。大臣改過。福及天下。閣下德隆功大。四海之內。所贊  
頌。然謂閣下無過。則不可尊私史。而壓宗廟。緣邊費而壞先政。此二者。閣  
下之過也。違神考之志。壞神考之事。在此二者。天下所共知。而聖主不得  
聞其說。蒙蔽之患。孰大於此。瓘之所撰日錄。辨一篇。已進之於上。閣下試

一讀之。則所謂專私史而歷宗廟者可見矣。璿去年所論陝西河東事。未盡詳悉。近守無為。奉行朝廷詔勅。乃知天下根本之財。皆已運於西邊。比緣都司職事。看詳內降劄子。因述其事。名曰國用須知。亦已進之於上。閣下試讀之。則所謂緣邊費而壞先政者可見矣。主上修繼述之效。閣下乃違志壞事。以為繼述。自今日已往。其效漸見。所以誤吾君者。不亦大乎。効之速者。尤在於邊費。熙寧條例。司之所講。元豐右曹之所守。舉朝公卿。無如閣下。最知其本末。今閣下獨擅政柄。首壞先烈。彌縫壅蔽。人未敢議。它日主上因此兩事。以繼述之事問於閣下。閣下將何以為對。當此之時。閣下雖有腹心之助。恐亦不得高枕而卧也。且邊事之費。外則帥臣。內則宰相。帥臣知一方之事而已。雖竭府庫之財而傾之。不可責也。至於宰相之任。則異乎此矣。豈可知天下匱竭。而恬不恤匱竭。因壞先政。因務蔽蒙。閣下欲辭其過。可乎。璿比緣稟事。聞閣下之言。指尚書省為道揆之地。璿謂閣下此言失矣。三省長官宜守法而已。若夫道揆。天子三公之事。豈太宰之所得預乎。兩平日食之變。皆在正陽之月。此乃臣道大彊之應。亦閣下之所當畏也。宜守而揆。豈抑畏之謂乎。周官曰。居寵思危。今天下旱蝗。方數千里。天變屢作。人心憂懼。邊費壞敗。國用耗竭。而閣下方且以為得道。

揆之體。可謂居寵而不思危矣。閣下於璿有薦進之恩。璿不敢負。是以論吉凶之理。獻先甲之言。冀有補於閣下。若閣下不察其心。拒而不受。則今日之言。謂之負恩。可也。負與不負。在璿。察與不察。在閣下。事君之位。無高下。各行其志。孰得而奪之乎。璿去年九月三日。上封章。皆乞奏知東朝。所以尊人主而抑外家也。欽聖未見察。則璿被貶黜。後來慈意開悟。則璿得率復。人主察孤臣之盡忠。欽主知忠言之有補。毋慈子孝。主聖臣直。此國家兩全之道。廟社無疆之福也。今欽聖納忠之美。未白於天下。而諫官不二之心。得罪於廟堂。脅持之風。甚於去歲。乖離之論。唱自大臣。所以厚欽慈者。果在此乎。璿前日辭都司之命。而閣下未許其去者。閣下必有以處璿矣。此士大夫之所共諭也。主上念欽聖納忠之意。察孤臣不二之心。獎眷之恩。至深至厚。璿欲擇死。所以圖報效。無負於人主。無愧於外家。一身之安危。豈暇恤哉。然則今日之言。安知不見察於閣下也。閣下深恩而已。璿不敢供要職。重取煩言。又不忍嘿嘿而去。惟閣下留聽。幸甚。前書尊堯集表。蓋與此互見。始末。誓諛立懦。不厭屢書也。正彙是似益可嘉。後竟坐罪流削。坎壈不自悔云。宋朝紀事本末。陳璿貶逐。元符三年三月甲戌。承議郎權發遣衛州陳璿為右正言。九月甲戌。左正言陳璿為右司諫。已卯。

右司諫陳瓘言。向宗良兄弟交通賓客。漏泄機密。陛下知之乎。皇太后知之乎。又曰。皇太后不待祔廟。果於選政。事尤前古。名垂後世。陛下所以報國恩。憑藉慈蔭。夸有目前之榮盛。不念倚伏之可畏。所與將者。連及侍從。希寵之士。願出其門。裴彥臣無甚幹才。但能交通內外。漏泄機密。遂使物議籍籍。或者以為萬機之事。黜陟差除。皇太后至今與也。良由中外關通。未有禁戒。故好事之人。得以益傳耳。庚辰上批。陳瓘累言皇太后尚與國事。其言多虛誕。不根。可送吏部與合入差遣。三省請以權為郡。上不可。乃添差監揚州糧料院。瓘初不知被責。復求翌日見上閣門。不許。瓘即具以劄子繳進。其一再論景靈西宮。其二論章惇罷相。制所稱國是。其三。其四。皆指陳蔡京罪惡。甲申。翰林學士曾肇上書皇帝。及皇太后曰。夫以皇太后定策之明。還政之速。著人耳目。可謂盛矣。今陳瓘以一言上及。遂至貶斥。雖非皇太后聖意。然四方萬里之遠。豈能家至戶曉。萬有一人。或謂皇太后有所不容。則於盛德不為無累。此臣惓惓之私。不能無疑也。以臣愚計。皇帝以瓘之所言。狂率而逐之。皇太后以天地之量。隱忍包容。特下手書而留之。則天下之人。必曰。皇帝恭事母儀。不容小臣妄議。其孝如彼。皇太

后功德巍巍。而能含洪光大。雖有狂言。不以為罪。其仁如此。兩誼俱得。豈不美哉。丁亥。詔新添差監揚州糧料院陳瓘。知無為軍。時瓘已出國門。即於門外露章辭免。曰。臣昨者自聞隔對已後。曾將上殿劄子具狀繳進。為言蔡京在紹聖中。親寫奏劄。乞誅滅劉摯等事。上件劄子所言。在監揚州糧料院以前。陛下若以臣言為是。則當如臣所請。按京之罪。明正典刑。然後改臣差遣。以示聽納。若以臣言為非。則是臣事發更為其罪益大。重加貶竄。乃得允當。今京桀驁自肆。無所畏憚。而臣章屢上。未蒙降出。則是陛下不以臣言為信矣。不信其言。而輕於改命。傳之天下。人必駭惑。又實封奏曰。京在朝廷。則家國未安。臣雖移得差遣。有何安乎。臣之不敢受命者。其說如是。臣露章所言。未甚子細。復以此章干瀆聖聽。所以盡惓惓之誠也。所有知無為軍勅。不敢祇受。迺遷前去。揚州聽候指揮。詔不許辭免。十月丙寅。上曰。瓘言事極不可得。覈貶亦不久。前日遣人送黃金百兩。瓘受賜泣下。布曰。陛下待遇如此。宜其感泣也。建中靖國元年。三月戊寅。承議郎知無為軍。陳瓘為著作佐郎。實錄院檢討官。七月丁卯。著作郎陳瓘為右司負外郎。瓘乃辭實錄。檢討官從之。八月壬子。先是右司負外郎陳瓘進國用須知。其言曰。臣聞神宗有為之叙。始於修政事。政事立而財用足。

財用足而根本固。此國家萬世之利。而今日所當繼述者也。臣近緣都司職事。看詳內降劄子。裁減吏員冗費。以防加賦之漸。為民遠慮。天下幸甚。然今日朝廷之計。正以乏財為患。西邊雖已罷兵。費用不可卒補。遂至於耗根本之財。壞神考之政。加賦之漸。兆於此矣。臣昨守無為。奉行詔令。竊見一年之內。連下五勅。而天下諸路三十年蓄藏之物。皆已運之于西邊。隳先政於罷兵之後。資國計於冗費之餘。譬如決江河之大防。蓄溝澮之小潤。非曰無涓涓之助。何以補湯湯之流。大違神考之心。殊乖繼述之義。臣職事所及。理不可嘿。今撰到國用須知一本奏聞。又進日錄辨。日。臣璿去年五月十八日。對紫宸殿。奏劄子云。臣聞王安石日錄七十餘卷。具載熙寧中。奏對議論之語。此乃人臣私錄之書。非朝廷之典也。自紹聖再修神考實錄。史官請以此書降付史院。凡日蒙蔽之患。孰大於此。又日熙寧條例司之所講。元豐右曹之所守。舉朝公卿。無如閣下最知其本末。今閣下獨擅政柄。首壞先烈。彌縫壅蔽。人未敢議。他日主上因此兩事。以繼述之事。問於閣下。將何以為對。當此之時。閣下雖有腹心之助。恐亦不得高枕而卧也。又日閣下於璿有薦進之恩。璿不敢負。是以論吉凶之理。獻先甲之言。冀有補於閣下。若閣下不察其心。拒而不受。則今日之言。謂之負

恩可也。布讀璿書大怒。已而咲謂璿曰。此書他人得之。必怒。布則不然。雖十書亦不較。璿又以日錄辨。及國用須知。納布而出。癸丑。璿又錄所上布書。及日錄辨。國用須知。具狀申三省。日昨詣尚書省投書。蒙中書相公面諭其詳。謂璿所論。為元祐單見淺聞之說。兼言天下未嘗乏財。雖有十書。布亦不動。璿不達大體。觸忤大臣。除具中御史臺乞賜彈劾外。伏乞敷奏。早得竄黜。甲寅。三省進呈。上顧曾布曰。如此報恩地邪。布曰。本不欲喋喋。然理有當陳者。不敢已。臣紹聖初在史院。不及兩月。以元祐所修實錄。凡司馬光日記雜錄。或得之傳聞。或得之賓客。所記之事。鮮不徧載。而王安石有日錄。皆當日。君臣面對。反復之語。乞取付史院。照對編修。此乃至公之論。其後紹聖重修實錄。數年乃成書。臣蓋未嘗見。當日修書。乃章惇蔡京。今日提舉史院。乃韓忠彥。而璿以謂臣專私史。歷宗廟。不審何謂也。神宗理財。雖累歲用兵。而所至府庫充積。元祐中。非理耗散。又有出無入。故倉庫為之一空。乃以臣壞三十年根本之計。恐未公也。上日。卿一向引璿。又欲除左右史。朕道不中。議論偏。今日如何。布愧謝。而韓忠彥等皆言。璿必欲去。當與一郡。布曰。臣本不與之校。朝廷優容。無所不可。遂以璿知秦州。上命責璿。忠彥及陸佃皆曰。璿之言誠過當。若責璿。則璿更以此得名。



曾布必能容瓘。乃以瓘知秦州。布始欲瓘附已。使人諭意。將大用之。瓘語其子正彙曰。吾與丞相議多不合。今乃欲以官相餌。吾有一書將遺之。汝為我書。且曰。郊恩不逮。恐失汝官。奈何。正彙再拜。願得書。瓘喜。明日持以見布。果大怒。遂有海陵之命。先是瓘以都司權給事。何執中為禮部侍郎。一日以簡抵瓘曰。早見貴人。公即真矣。故瓘語正彙云爾。中書舍人鄒浩奏瓘素以聲聞。推重一時。今到都司。曾未逾月。遽令出外。恐非所以示天下而慰公議也。伏望收還新命。以全朝廷待士之體。所有錄黃。未敢簽書。行下不從。右諫議大夫陳次升言。陳瓘首蒙進擢。搢紳之間。咸以為賀。今聞瓘以宰屬議論不合。因此罷去。審如所傳。不惟有遺人材。亦慮有失人望。伏望聖慈。更賜詳酌。施行。崇寧元年五月乙亥。陳瓘管勾冲祐觀。餘見治元祐黨人。大觀四年十一月戊寅。詔通州安置人陳瓘與自便。此據丁未錄。大觀四年十一月戊寅。詔通州安置人陳瓘與自便。初瓘自合浦放還。居四明。而其子正彙因幹至。餘抗適聞蔡崇盛訛蔡京。有動搖東宮之語。正彙即日自陳于抗。即蔡疑。疑時方結蔡京為死黨。遂執正彙送京師。而飛書告京。俾預為計。事下開封。制獄知開封李孝稱酷吏也。乃并下明州捕瓘。士民哭送之。瓘不為動。既就獄。顧其子笑曰。不肖子煩吾一行。孝

稱瓘使證正彙之妄。瓘曰。正彙聞京將不利於社稷。傳於道路。遽自陳告。瓘以所不知。棄子之恩。而指其為妄。則情所不忍。挾私情以符合其說。又義所不為。况不欺不貳。平昔所以事君教子。豈於利害之際有所貪畏。自違其言乎。蔡京姦邪。必為國禍。瓘固嘗論於諫省。亦不待今日語言聞也。時內侍黃絰。臣監勸。聞所對失聲。歎息謂瓘曰。主上正欲知實狀。右司第依此置對。其後獄具竟坐。正彙以所言過寬。流竄海島。而瓘亦有通州安置之命。瓘之謝表曰。脫死幽縲。置身善地。上恩曲逮。孤涕橫流。伏念臣投竄之餘。年齡已暮。皆有自詒之戚。天實謹之。災非無妄。而米人誰矜者。議律難逃。於常憲原情。獨賴於清衷。積愆彌深。論報無所。此蓋伏遇皇帝陛下則堯之大。用舜之中。宥罪每發於深慈。施刑寧夫於過厚。不遺踈遠。咸與并包。臣敢不上體寬仁。靜思愆咎。終於屏跡。益堅愛主之誠。死而有知。尚圖結草之報。瓘留通久之。至是方許其自便。瓘謝表曰。恩由獨斷。澤被孤忠。刑部之執守雖堅。天子之福威無壅。乃公朝之盛事。豈小己之私榮。恭叙感悚。仰黷高聽。伏念臣昨蒙善貸。賜以生還。萍跡孤蹤。久寄食於異縣。華門幹蠱。常委事於長男。所營不足以藩身。其出每緣於餬口。去庭聞者累月。聞道路之一言。耳受而輒行。親危而不顧。緣帥司深病其生事。

故傳者多指為病狂。萬口嗷嗷。兩路洶洶。狐突教子。素存不二之風。曾參殺人。寧免至三之感。事既匿而難曉。時浸久而益疑。制所深嚴。就逮於重江之外。獄辭平允。閱實於片言之中。矜其無事之可書。許以還家而自便。出園扉而涕感。瞻魏闕而神留。尋沐寬恩。移置近地。海島萬里。不如無子之無憂。淮孺一身。彌覺有身之有患。擢髮不足以數臣之罪。瀝血不足以寫臣之心。羔羊之性自公。犬馬之情愛主。忘身殉國。初無悔吝之私。抱疾呼天。惟恃精誠之格。忽因詔諭。特免拘准。此蓋伏遇皇帝陛下。堯大并容。舜明洞照。人人皆使之得所。事事唯恐其太偏。繼志用神考之心。應天以格王之實。舊弊若水之將釋。新慶如川之方流。家國平康。內外交泰。遂使赦無留令。且阻隔而今行。士有宿愆。始棄置而終宥。全家荷德。無路酬恩。螻蟻之力至微。但知恭順。蒲柳之身已老。尚可廉捐。望天雖隔於戴盆。向日敢忘於傾藿。正采吉變。已見三月十一日。更須考詳。存一去一。璿坐正彙事。通州安置。在大觀四年三月。其放自便。在十月。附傳乃於羈管台州後云。尋放自便。歸江州。誤也。政和元年十月。責台州。復官自便。蓋在五年後。既復官自便。乃還寓通州。六年秋。始至江州。七年除太平觀。尋令居住南康軍。移楚州。卒。璿南憲頌云。自崇寧壬午流竄。丙申閏月至九。江始有

南憲。政和元年正月。詔明州取陳璿尊堯集。送編修政典局。從張商英建請也。五月再下通州。取陳璿尊堯集。送編修政典局。九月辛巳。詔陳璿自撰尊堯集。語言無緒。並係詆誣。合行毀棄。送與張商英。要行用。特勒停送台州羈管。令本州當職官。常切覺察。不得放出州城。月具存在申尚書省。公謫台州。朝旨不下。司行移峻急。所過州縣。皆令兵甲防送。不得稽留。至台州久之。人莫敢以居屋借賃者。暫館僧舍。而郡守以十日之法。每遣廂巡起遣。故十日必為之遷一寺。時未有郡守。通判朱興宗攝郡事。朱與公有先世之契。觀望持甚。人為公不平。公處之澹然。不以介意。公到台數月。朝廷起遷人石。憾知州事。二十五日。憾知台州。且令赴闕之官。士論訕訕。咸謂將有處分于公也。憾至。果揚言怖公。視事次日。即遣兵官突來約束。不得令出入。取責隣人防守狀。又置邏卒數鋪。前後巡察。抄錄賓客書問之往還者。雖親戚家書。殆至隔絕。未幾。復令兵官突入所居。搜檢行李。攝公至郡庭。垂簾如制獄。其實祇是朝旨取索公尊堯副本。憾於首外施行。意在迫脅。繼又出公於僧舍。使小吏監守對榻。坐卧窘辱百端。人情憂怖。慮有不測。公誓以死報國。而義不為兒女態。故安之。不以為撓。憾亦不敢犯。技術寢窮。終不能為公害。公謫台州。於法合進謝表。台州不為發迎。

表未得達。而石幟之來。聲勢甚異。料其必受蔡疑。風旨意在得其所秘書。必將搜索及行李。於是為封事繳進謝表。封緘於篋。題以臣名。幟至。果如所料。而以緘題之。故不敢輒開。遂以奏御。疑與何執中皆怒之。未幾。罷幟台州。而公自此始免他虞。或問公何以審其如此。公曰。吾於疑初無他故。疑懷遺書之愧。而其黨未必知。結黨相据。實自為計。今顯其迹。則脅使之術不行也。石幟攝公至郡也。欲以刑獄怖公。公見州廷獄具羅列。知其意。遽發問曰。合日之事。豈被旨邪。幟非所料。夫指而應曰。有尚書省劄子。卷簾出示公。劄子所行。蓋取尊堯集副本。以為係詆誣之書。合申繳毀棄也。公曰。然則朝廷指揮取尊堯集耳。追某至此。復欲何為。因問之曰。君知尊堯所以立名乎。蓋以神考為堯。而以主上為舜也。助舜尊堯。何謂詆誣。何相學術淺短。名分之義。未甚講求。故為人所劫使。請治尊堯之罪。將以結黨固寵也。君所得於彼者幾何。乃亦不畏公議。干犯名分乎。謀具申某此語。某將顯就誅戮。不必以刑獄相恐。幟不待公言畢。屢揖。公退。尋語人曰。不敢引其說。尚自如此。良可畏也。幟表及封事具十二月十七日。十二月乙卯。臣寮上言。陳瓘所撰尊堯集十卷。大綱取日錄中事。解釋成文。有論及王安石事。臣雖不見尊堯集全文。但瓘在建中靖國間。嘗以安石日曆

為不然。昨來大臣領政典局。知瓘素有異論。欲助成非謀。故下瓘家取索。欲望聖慈。特降旨。嚴賜禁約。不得傳習。如有已曾傳錄之家。並乞立限繳納。仍乞下瓘家取索藁本。一切焚毀。詔依奏。其尊堯集。仍令知台州石幟於陳瓘。衢州於張商英處取。及元降付張商英御批真本。並繳連同奏。五年八月丙寅。陳瓘特叙承事郎。許自便。瓘自政和元年九月。送台州羈管。凡五年。始降旨叙官自便。蓋緣立太子赦。五年三月十七日。指揮丁未。錄云。以郊霽霑恩。誤也。瓘初以宣德郎被謫。而叙官乃得承事郎。實鑄降也。被命之後。忽得州牒。備坐省劄。云奉御批叙復。數內陳瓘叙復未當。合於見存官外叙一官。仍取旨與差遣符州告示本官知委。瓘既供知委。還寓通州數月。又有省劄下通州。令瓘具家狀陳乞。差遣人皆賀。瓘以為起廢。有漸。瓘曰。此廟堂欺君玩世之術耳。若與差遣。豈應見問。上聞吾叙官不當見錄。時政記神宗御集之所不載者。往往專據此書。追議刑賞。奪宗廟之美。以歸臣下。故臣願詔史官。別行刪修。以成一代不刊之典。其日蒙批付三省。後不聞施行。蓋紹聖史官請以日錄降付史院者。今為宰相故也。臣位下人。微。輕議大典。誠以宗廟至重。義不敢嘿。恭惟神宗皇帝體道用極。憲天有為。自得師臣。授以政柄。雖尹豎湯。咸有一德。無以復異。而嘉

謀嘉猷實出我后。以言乎經術則微言與義皆自得之。以言乎政事則改法就功取成於心。是則神考之獨志而安石之所以歸美者也。用事之臣聞於此理。託奉宗廟。獨尊安石。假紹述於詔令。寓好惡於刑賞。至於纂記私言。如嗣考事。遂使密贊之語。宣揚于外。而一朝大典。祖述故事。但專美於人臣。不歸德于我后。凌壓宗廟。以植其私。事之乖繆無大於此。望惟負神考在天之靈。抑亦失安石事君之意。臣所以惓惓而不能已也。因以所見撰成日錄辨一篇。具狀奏聞。是日。瓘與左司員外郎朱彥周。謁左僕射曾布于都堂。以書責布曰。閣下德隆功大。四海之內。所贊頌也。然謂閣下無過。則不可尊私史而壓宗廟。緣邊費而壞先政。此二者。閣下之過也。違神考之志。壞神考之事。在此二者。天下所共知。而聖主不得聞其說。於御批諸公不敢。但已為此遷延之說。以塞上旨。家狀雖當。供差遣其可乞邪。彼謂吾不堪貧困。必乞憐耳。乃報以家狀。昨因削籍毀棄。無憑供具事。果不行。瓘既寓通州。而盛章與石憾有隙。取密旨。偏置通州。揚言為瓘報仇。瓘聞而歎曰。此豈盛世所宜有邪。因謀徙避。遂挈家至九江。卜居焉。六年。閏月。乃至江州。今因石憾編置通州。在五年八月十四日。即附著此。七年十二月。宣德郎管勾太平觀陳瓘。自江州移南康軍居住。瓘始自

通州。徙江州。杜門不出謁。而來者不拒。踰年。忽有旨不許出城。月中存在。又更易守臣。日降不下司文移。以俟新守之到。人俱巨測。為之震懼。交遊間至有索平時往還書問者。有碎瓘所書碑刻者。瓘亦自期以死。劉安世聞之。以書抵瓘曰。此乃鶴相。恐脅濮上之策。技止此爾。閱數日。方知王宋得罪。而讒者以謂瓘未居王宋之鄉。因以危言陷瓘。賴上察之。止令於南康居住云。宣和二年十二月丙申。是歲南康軍居住。宣德郎管勾太平觀陳瓘。移居楚州。始王宋得罪。瓘自江州移南康。及方寇作。或又為飛語云。瓘女婿。已為寇所劫。欲加中傷。然上訖保全。故卞京黨人。莫能害也。六年二月辛丑。承事郎管勾太平觀陳瓘卒。朱晦庵大全集讀兩陳諫議遺墨。天下有自然不易之公論。而言之者或不免於有所避就。故多失之。若諸公熙寧日錄之辨。是也。嘗記頃年。獲侍坐於故端殿。上饒汪公縱言及於日錄。熹因妄謂日錄。固為邪說。然諸賢攻之。亦未得其要領。是以言者瀆。而聽者疑。用力多而見功寡也。蓋嘗即其書而考之。則凡安石之所以惑亂神祖之聰明。而變移其心術。使不得遂其大有為之志。而反為一世禍敗之原者。其隱微深切。皆聚此書。而其詞鋒筆勢。縱橫捭闔。焯焯譎誑。又非安石之口不能言。非安石之手不能書也。以為蔡卞撰造之言。固

無是理。况其見諸行事深切著明者。又已相為表裏。亦不待晚年懟筆有所增加。而後為可罪也。然使當時用其垂絕之智。舉而焚之。則後來載筆之士。於其唯慳之間。深謀密計。雖欲畢力搜訪。極意形容。勢必不能得之如此之悉。而傳聞異詞。虛實相半。亦不能使人無溢惡之疑。且如勿令上知之語。世所共傳。終以手筆不存。故使陸佃得為隱諱。雖以元祐眾賢之力。爭辨之苦。而不能有以正也。此見陸佃供答史院取問狀。何幸其徒。自為失計。出此真跡。以暴其惡於天下。便當撫其肆情反理之實。正其迷國誤朝之罪。而直以安石為誅首。是乃所謂自然不易之公論。不唯可以訂已往之謬。而又足以開後來之惑。奈何乃以畏避嫌疑之故。反為迂曲回互之言。指為撰造。增加誣偽。謗詆之書。而欲加刊削以滅其迹乎。汪公歎息深。以愚言為然。今觀閑樂陳公遺帖。了齋陳公表藁。追憶前語。自愧學之不進。所知不能。有以甚異於往時。又歎汪公之不可復見也。為之掩卷太息。而書其後。抑又嘗惟了翁晚歲之論。多出此帖之餘。然其自訟改過之書。曾無一言以及此。而獨謂龜山楊氏寔發其機。語見賁洗。其所贈兄孫漸者。即幾更少卿。後改名淵者也。幾更楊公之婿。嘗以楊公之語告翁。曰。史留那老子做甚底。公初亦駭其言。幾更復為反復申言之。翁乃悔悟。

故其語曰。余之自訟改過。頓其一言而漸。於是時。亦以所聞警余之謬云。是則論者亦頗疑之。而以今考之。此書之作。寔在建中崇寧之間。書云。吾友遷謫。猶居善地。疑居袁州時也。且其言猶以目錄為蔡卞之所託。而其後了翁合浦尊堯之書。亦未直攻安石也。至於大觀初年。而後四明之論始作。進未雖在政和元年。然公居明州。實大觀初年也。則其推言所自。獨歸功於楊氏。而不及閑樂。有不可証者矣。顧其後書。雖謂天使安石自寫誣悖之心。然猶有懟筆增加歸過神考之云。則終未免於所謂有所回互避就而失之者也。又觀閑樂此書之指。所以罪狀安石者。至深切矣。然考其事不過數條。若曰改祖宗之法。而行三代之政也。廢春秋而謂人主有北面之禮也。學本出於刑名度數。而不足於性命道德也。釋經與義多出先儒。而旁引釋氏也。是數條者。安石信無所逃其罪矣。然其所以受病之源。遺禍之本。則閑樂之言有所未及。而其所指以為說者。亦自不能使人無可恨也。今亦無論其它。而姑以安石之素行與目錄之首章言之。則安石行已立朝之大節。在當世為如何。而其始見神宗也。直以漢文帝唐太宗之不足法者為言。復以諸葛亮魏元成之不足為者自任。此其志識之卓然。又皆秦漢以來。諸儒所未聞者。而豈一時諸賢之所及哉。然其為人。

質雖清介而器本偏狹。志雖高遠而學實凡近。其所論說。蓋特見聞億度之近似耳。顧乃挾以為高。足已自聖。不復知以格物致知。克己復禮為事。而勉求其所未至。以增益其所不能。是以其於天下之事。每以躁率任意。而失之於前。又以狠愎徇私。而敗之於後。此其所以為受病之原。而閑樂未之言也。若其所以遺禍之本。則自其得君之初而已。有以中之。使之悅其高。駭其奇。而意斯人之不可無矣。及其任之以事。而日聽其言。則又有以信夫。斯人之果不可無也。於是為之力拒群言。而一聽其所為。唯恐其一旦去我。而無與成吾事也。及其訂謨既久。漸涵透澈。則遂心融神會。而與之為一。以至於能掣其柄。而自操之。則其運動弛張。又已在我。而彼之用舍去留。不足為吾重輕矣。於是安石卒去。而天下之政。始盡出於宸衷。了翁所謂萬機獨運於元豐。閑樂所謂屏棄金陵。十年不召者。蓋皆指此。然了翁知其獨運。而不知其所運者。乃安石之機。閑樂見安石之身。若不用。而不知其心之未嘗不用也。是以凡安石之所為。卒之得以附於陵廟之尊。託於謨訓之重。而天下之人。愈不敢議。以至於魚爛河決。而後已焉。此則安石所以遺禍之本。而閑樂亦未之言也。若閑樂之論祖宗法度。但當謹守而不可變。尤為痛切。是固然矣。然祖宗之所以為法。蓋亦因事制。

宜。以趨一時之便。而其仰循前代。俯徇流俗者。尚多有之。未必皆其竭心思法。聖智以遺子孫。而欲其萬世守之者也。是以行之既久。而不能無弊。則變而通之。是乃後人之責。故慶曆之初。杜范韓富諸公。變之不遂。而論者至今以為恨。况其後此。又數十年。其弊固當益甚於前。而當時議者。亦多以為當變。如呂正獻公父子家傳。及河南程氏眉山蘇氏之書。蓋皆可考。雖閑樂此論。若有不同。而不免亦有仁皇之未適當因革之時之說。則是安石之變法。固不可謂非其時。而其設心亦未為失其正也。但以其躁率任意。而不能熟講精思。以為百全無弊可久之計。是以天下之民。不以為便。而一時元臣故老。賢士大夫。群起而力爭之者。乃或未能究其利病之實。至其所以為說。又多出於安石規模之下。由是安石之心愈益自信。以為天下之人。真莫已若。而陰幸其言之不足為已病。因遂肆其狠愎。倒行逆施。固不復可望其能勝已私。以其利病之實。而克其平日所以自任之本心矣。此新法之禍。所以卒至於橫流而不可救。閑樂雖能深斥其非。而未察其所以為非者。乃由於此。此其為說。所以不能使人無所恨者一也。至謂安石遠取三代。渺茫不可稽考之事。而力行之。此又不知三代之政。布在方冊。雖時有先後。而道無古今。舉而行之。正不能無望於後之君。

子。但其名實之辨。本末之序。緩急之宜。則有不可以毫釐差者。苟能於此察焉。而無所悖。則其遺法雖若渺茫不可稽考。然神而明之。在我而已。何不可行之有。彼安石之所謂周禮。乃姑取其附於己意者。而借其名高以服衆口耳。豈真有意於古者哉。若真有意於古。則格君之本。親賢之務。養民之政。善俗之方。凡古之所謂當先而宜急者。曷為不少留意。而獨於財利兵刑為汲汲耶。大本不正。名是實非。先後之宜。又皆倒置。以是稽古。徒益亂耳。豈專渺茫不可稽考之罪哉。閑樂不察乎此。而斷然自盡。直以三代之法為不可行。又獨指其渺茫不可稽考者而譏之。此又使人不能無恨者。二也。若安石之廢春秋。語北面。則亦其志識過高。而不能窮理勝私之弊。是以厭三傳。凡例條目之煩。惡諸儒臆度附致之巧。有太過者。而不思其大倫大法。固有炳如日星而不可誣者也。因前聖尊師重道之意。以推武王太公之事。有太過者。而所以考其禮之文者。有未詳也。是其闕於審重而輕為論說。直廢大典。固為可罪。然謂其因此而亂君臣之名分。又并與孟子迭為賓主之說而非之。則亦峻文深詆而矯枉過直矣。此又其使人不能無恨者。三也。若夫道德性命之與刑名度数。則其精粗本末。雖若有間。然其相為表裏。如影隨形。則又不可得而分別也。今謂安石之學

獨有得於刑名度数。而道德性命。則為有所不足。是知其於此。既有不足。則於彼也。亦將何自而得其正耶。夫以佛老之言為妙道。而謂禮法事變為粗迹。此正王氏之深蔽。今欲譏之。而不免反墮其說之中。則已誤矣。又况其於粗迹之繆。可指而言者。蓋亦不可勝數。政恐夫可輕以有得許之也。今姑舉其一二而言之。若其實有得於刑名度数也。則其所以修於身者。豈至於與僧卧地。而顧容褫衣。如錢景諶之所叙乎。所以著于篇者。豈至於分文析字以為學。而又不能辨乎六書之法。如字說之書乎。了翁以為安石之造字說。蓋欲布之海內。神考雖好其書。玩味不忘。而不以布於海內者。以教化之本不在是也。此亦非是。夫周禮六藝之教。所謂書者。不過使人以六書之法。分別天下之書文。而知此字之聲形為如何。欲其遠近齊同而不亂耳。非有真空無相無作之說也。安石既廢其五法。而專以會意為言。有所不通。則遂旁取後來書傳。一時偶然之語以為證。至其甚也。則又遠引老佛之言。前世中國所未嘗有者而說合之。其穿鑿舛繆顯然之迹如此。豈但不知性命道德之本。而亦豈可謂其有得於刑名度数之末哉。不唯以此自誤。又以其說上惑人主。使其玩味於此而不忘。其罪為大。了翁之言。蓋亦疎矣。所以施於家者。豈至於使其妻窮奢極侈。斥

逐娣如。而詬叱官吏。如林希魏秦之所書。豈至於使其子囚首跣足。箕踞於前。而干預國政。如邵伯溫之所說乎。所以施於政者。豈至於事理。拂民情。而於當世禮樂文章教化之本。或有失其道理者。乃不能一有所正。至其小者。如鷓鴣公事。按問條法。亦皆繆戾煩碎。而不即於人心乎。以此等而推之。則如閑樂之所云。亦恐其未免於過乎。而其所以不能使人無可恨者。四也。若其釋經之病。則亦以自處太高。而不能明理勝私之故。故於聖賢之言。既不能虛心靜慮。以求其立言之本意。於諸儒之同異。又不能反復詳密。以辨其為說之是非。但以己意穿鑿附麗。極其力之所通。而肆為支蔓浮虛之說。至於天命人心。日用事物之所以然。既已不能反求諸身。以驗其實。則一切舉而歸之於佛老。及論先王之政。則又騁私意。飾姦言。以為違衆自用。剝民興利。斥逐忠賢。杜塞公論之地。唯其意有所忽。而不以為事者。則或苟因舊說。而不暇擇其是非也。閑樂於此。乃不責其為本旨棄舊說。惑異教文。姦言之罪。而徒譏其與義多出。鄭孔意。若反病其不能盡黜先儒之說。以自為一家之言者。則又不能使人無恨者。五也。夫安石以其學術之誤。敗國殄民。至於如此。而起自熙豐。訖于宣靖。六十年間。誦說推明。按為國是。鄙儒俗生。隨風而靡者。既無足道。有識以上。則

孰有不寒心者。顧以姦賊蔽蒙。禁網嚴密。是以飲氣吞聲。莫敢指議。獨兩陳公。乃能出死力以排之。其於平居書疏還往。講論切磨。唯恐其言之不盡。斯亦可謂賢矣。然其所以為說者。不過如此。豈其所以為學者。亦自未得聖賢之門戶。所以觀理制事者。猶未免於有蔽而然耶。故嘗歷考一時諸賢之論。以求至當。則唯龜山楊氏。指其離內外。判心迹。使道常無用於天下。而經世之務。皆私智之鑿者。最為近之。其論紹述。而以為當師其意。不當泥其迹者。亦能曲盡其理之當。而無回互之失。見龜山語錄。因辨道辨之論。而後者。雖元成劉公所謂只宗神考者。有所不逮。劉公語。見韓耀談解。不但兩陳公而已也。然及其請罷廟學配食之章。則又不能如其平日之言。以正其罪。顧乃屑屑焉。偏指鳧鷖一義。以為寔啓奢汰之原。此為獲殺人于貨之盜。而議其竊鈎之罪。對放飯流歎之容。而議其齒決之非。視兩陳公之言。乃反有不能及者。是以至今又幾百年。而其是非之原。終未明白。往者雖不足論。而未者之監。亦學者之所不可不知也。故竊并著其說。以俟同志講而擇焉。已未八月。因為精舍諸生說。偶記莊生語云。其所謂道非道。則所言之。肆不免於非。此正王氏之謂也。後兩日有語。予曰。荆公正坐為一道德所誤耳。予謂之曰。一道德者。先王之政。非王氏之



私說也。子何病焉。若道此語於荆公之前。彼不過相視一笑而言曰。正為公不識道德耳。吾恐子之將無詞以對也。兩轉語。偶與前說相似。故筆其後云。朱子語類。陳了翁氣剛才大。惜其不及用也。陳了翁在貶竄中。與蔡京輩爭辨不已。亦是他有智數。蓋不如此。則必為京輩所殺矣。人傑又曰。了翁有濟時之才。道知此弊。才不及也。使了翁得志。必有可觀。伯豐問四明尊堯集曰。只似討鬪。却不於道理上理會。蓋它止是於利害上見得。於義理全疎。如介甫心術隱微處。都不曾攻得。却只是把持。如云謂太祖濫殺有罪。謂真宗矯誣上天。皆把持語也。龜山集中有攻日錄數段。却好。蓋龜山長於攻王氏。然三經義辨。中亦有不辨者。却有當辨而不曾辨者。呂東萊雜說。陳瑩中持論。以為天下事無時不可為。無時不可進。顧已所存與歲終何如耳。鬪止叔高秀實以為瑩中得聖人之任。然當時論者。以為惟瑩中則可。它人不可。如有伊尹之志則可。無伊尹之志則廢者也。瑩中嘗言鬪止叔。崇寧中召至京師。一日與數人見蔡京。留坐甚久。及出。同見者猶相候。止叔見之。面微發赤。瑩中以為止叔見蔡元長。必無傾附之意。其論必能有益於時。何必面發赤。是止叔自信猶有未盡也。瑩中嘗言尋常學者。雖知得王介甫一分不是。即是一分好人。知得王介甫十分不

是即是十分好人。呂東萊辨志錄。陳瑩中嘗作責沈文。送其姪孫幾叟云。予元豐乙丑夏。為禮部貢院點檢官。適與校書郎范公淳夫同舍。公嘗論顏子之不遷不貳。惟伯淳能之。余問公曰。伯淳誰也。公默然久之。曰。不知有伯淳邪。予謝曰。生長東南。寔未知也。時予年二十九矣。自是以來。嘗以寡陋自愧。得其傳者如楊中立先生。亦未知識也。所謂責沈者。葉公。沈諸梁也。葉公問孔子於子路。子路不對。葉公當時賢者。魯有仲尼而不知。宜乎子路之不對也。瑩中以謂世有伯淳而已。不知宜自責者也。今世之人。聞已所不知。其不愠而發謗罵者。幾希矣。况能自責。日夜以為愧乎。史遺事。了翁之子正由云。了翁自是每得明道先生之文。必冠帶然後讀之。舍人雜說。又曰。陳公瑩中尊敬前輩。皆可為後生法。晚年過揚州。見榮陽公。請公坐受六拜。又拜祖母河南夫人。請必無答拜。然後拜。其與他人語。必曰。呂公。或曰。呂侍講。其對前輩說後進。必斥姓名。未嘗少改。趙善璫自警編。徐師川以才氣自負。少肯降志於人。常言吾於魯直為舅氏。然不免有所切議。至於了翁。心誠服之。每見公。或經旬月。必設拜禮。忠宣范公晚年益以天下自任。尤留意人材。或問其所儲蓄。人材可為今日用者。答曰。陳瓘。又問其次。曰。陳瓘自好也。蓋言公可以獨當天下之重也。宣和之

未。人憂大厦之將顛。或問游定夫察院。以當今可以濟世之人。定夫曰。四海人材。不能周知。以所知識。陳了翁其人也。劉器之。亦嘗因公病。使人勸公以醫藥自輔云。天下將有賴於公。當力加保養。以待時用也。其為賢士大夫。所欽屬如此。陶朱新錄。初蔡卞薦太學博士。陳瓘上殿。既對。上問蔡卞何如。王安石瓘對曰。安石以經術為學者師。蔡卞何人。可比安石。上首肯之。瓘中退語。朱深景曰。我今日甚有功于天下。未問之曰。既欲主張紹述。若用蔡卞。殘忍狡險。天下善類必盡。而蔡京朝殿。見之目光與日爭輝。此貴人相也。卞若不用。必相京。然京未必忍于卞。但須變更殆盡。天下遂壞。而善類猶有存者。爾深景漏其語于林自。乃以語卞。卞必欲殺瓘中。為此。陳伯嚮說又云。政和間。任樂清縣尉。差往嘉興試貢士。回過台州。見陳瑩中。瑩中曰。天下有事。必自浙中起。浙中了。番人入。吾屬未知死所。伯嚮驚曰。莫未至。是否。曰。浙中禽蟲草木。不安其性。人安得不思亂。太祖太宗。乘定天下之威。不敢輕議。燕山富弼。以八十萬緡買靜至今。而今乃議取之。度今諸人能與虜為敵乎。又曰。蔡京父子頭必斷。既而往往如其言。伯嚮舊字君嚮。福唐人名。蔡黃定等上書。十八人之一也。與僕在權貨務同官。親見其說。聞見錄。瑩中撰尊堯集。以辨王安石所作日錄。以詆祖宗。詆

神考者。今行于世。靖康初。不及大用以死。特贈諫議大夫。瑩中晚喜康節先生之學。嘗從伯溫求遺書曰。吾於康節。若有得也。樂庵語錄。陳了翁一日往某處。或言此間有一得道者可就見之。了翁曰。他自得道。于我甚事。此便是了翁過人一著處。這段事。須是自家自去理會。何倚靠得人。黃氏日抄。陳忠肅公紹聖革元祐之政。公力陳其不可。建中革紹聖之弊。公又戒其欲速。嘗主別試前名。盡取王氏之學。曰。順時所以救時。不必求快目前也。其後從容遠慮。若此。首辨蔡京姦邪。蔡氏黨欲殺公者百計。公終不懾。非剛柔適中者能爾乎。大厦之顛。雖非一木能支。而著日錄辨。著尊堯集。又著四明尊堯集。章蔡誣謗。卒賴以一洗之。有功我宋多矣。朱子經濟大術論。元城了翁之剛。同上。此段謂元城得中。了翁後來太過。個嘗問元城了翁之剛。孰為得中。曰。元城得中。了翁後來有太過。元城只是居其位。便極言無隱。罪之即順受。了翁後來做得都不從容了。所以元城嘗論其尊堯集所言之過。而戒之曰。古君行已。苟心無憾。而今而後。可以忘言矣。宋李忠定公梁谿集。跋了翁祭陳奉議文尾。余昔邂逅見了翁於姑蘇。觀其容貌。渥然而不枯。察其志氣。浩然而不挫。聽其辯論。毅然而不屈。竊謂近世以來。善處患難。未有如了翁者。今於沙陽。見了翁祭其兄奉議公

文辭意之高潔。筆力之道健。與昔見其容貌志氣。辯論無少異焉。信乎養之完。守之固。而文章字畫。似其為人也。宣和庚子秋。梁谿居士跋李壁雁湖集跋陳了翁融善文。瑩中自言五十六歲。始看華嚴經。得箇醒處。故屢舉經中語以誨人云。依教修行。八十卷中。惟此一語。最為省要。今帖所謂離教之禪者。可見公意已。其他言句。闡明心要。匪拘匪誕。釋氏稱真際實相者。公得之為多。而予猶愛其與曾丞相子宣書云。人以眇然之身。處乎世間。猶大海之一漚耳。計一漚之起滅。而忘天下之安危者。必見笑於大方之家。曾覽書拂然怒。遂奏逐公。其疾豈可矜哉。時屬親郊。寧失補官。毅然代文。寫此書者。帖所名。正由之元。正彙也。正彙仕高廟朝。為名侍從。雖食舊德。亦忠孝之報云。嘉定丙子春。李某書。國朝宋濂集題陳忠肅公疏文跋語後。七峯居士諫議陳公。因上書論日錄事。有忤曾布。出守海陵。尋謫武夷祠宮。未幾。除名勒停。編管宜春。崇寧二年正月。移合浦。三月五日。過長沙興化寺。遇神宗忌日。於是依浮屠法。運轉經藏。造疏六千言。以薦嚴事。疏文用駢儷體。恐不足以盡意。仍以散辭分注其下。首序請改實錄。言蔡卞者九事。非國是者七章。其餘卞布之姦。凡所以尊私史而壓宗廟者。無不縷列。既燔告神皇在天之靈。是月十五日。復以別本綴于

元豐中。王安石所貽手帖之後。又假設臣布引欲之辭。作跋語繫之。且手書二通。一遺其姪正裕。一寄其甥李進祖。俾秘藏之。身死之後。出示親戚朋友。冀幸有知之者。蓋公嘗自謂家覆身止。如浮漚起滅。不足深計。唯神考十九年。駿烈茂功。受誣群小。為臣子者。不得不辨。故其所著之書。曰日錄。不合神道論。曰辨誣。論曰尊堯集。曰自撰墓志。墓志述因日錄殺身之由。其言至一萬八千有奇。而語尤哀切。然而諸書大抵皆疏文并跋語中意也。嗚呼。公之愛君。尊主之誠。耿耿弗忘如此。真所謂忠精貫日月者矣。烏傷王君禕。其八世祖永年。今仙居時。而公之冢于正彙。實為尉交契之深。遂以其女歸仙居之子。嚴州司法儔。今王君家藏跋文。正假托臣布引咎之辭。豈或正彙所秘藏者。而正彙出示於親戚歟。今去公造此文時。已歷二百四十二年。中更水火兵革。靡所不有。區區一紙之微。初非所謂金相石質。乃能傲兀無窮。世變手澤如新。殆造化者使神物護持。昭示未裔。以遂公忠憤之志。而永曾蔡之惡於弗磨也。吁。可畏哉。王君與濂為同門友。而義若弟昆。間以相示。因忘其孤陋。而借書之。若夫君子小人。進退有繫於家國安危者。史臣褒貶。已有定論。茲不復勸說云。宋王梅溪家政集。陳了翁賢哉瑩中。鶚立兩朝。凜乎清風。二蔡嘯函。飾姦為忠。黨

與雷同。牢不可攻。公獨仇之。折其姦鋒。孤立不容。身以謹終。公乎不止。名  
等。孤崧。楊龜山集。祭陳瑩中文。嗚呼。天生我公。為時元龜。精貫白日。而無  
以自表。氣包宇宙。而不容於時。止或厄之。非人能為。嗟一跌而不振。卒困  
死於流離。賴遺言之未泯。導源委而東之。念生死之永訣。悵南北之羞池。徒  
反袂以長號。淚淋浪而沾衣。公乎不忘。其知我悲。文鑑。游酢祭陳了翁文。  
嗚呼。陳公萬夫之傑。大虛無塵。心凝知徹。經綸大猷。如挈裘領。灼知幾先。  
眇綿作晒。慮遠而知者疑。言危而弱者警。著龜有稽。可觀而省。嗚呼。陳公。  
知事道而已。不知鼎鑊之臨其顛也。知狗國而已。不知陷穽之橫其前也。  
阨之白首而氣愈和。感之死地而志愈堅。處約彌久。妻孥裕然。畎畝念忠。  
頂踵利物。人疑其為墨。平生極飢。任重一身。吾知其為稷。行道之人。聞者  
心惻。意者天將降之大任。而望之其身耶。意者吾君將追念其篤誠。發獨  
斷而收之以澤斯民耶。嗚呼。孰謂流離川途。遭迴萬狀。而淪於淮楚之濱。  
耶。嗚呼。孰謂謀可以託心膂。力可以任股肱。而志願卒不伸耶。浩浩元精。  
慘不知其因耶。歲首之書。後計而達。執書一慟。骨驚心折。嗚呼。陳公。蓋將  
有哲人能盡知而賔之。有志士能慷慨而言之。有仁人能經紀其家而存  
之。有良史能具載其實而傳之。區區鄙詞。曷足以涉其流而游其源乎。寓

奠一觴。聊薦悃悃。東望傷懷。淚落橫臆。李忠定公梁谿集。祭陳瑩中左司  
文。維年月日。具位李某。謹以清酌庶羞之奠。致祭于故左司陳公之靈。  
惟公擢秀甲科。實自妙齡。浸階臚仕。藹然休聲。以節義為防範。而行不苟  
合。以公忠為鑒裁。而物無遜情。其在言責。抗章論辯。不可勝紀。而言之最  
著者。有先知獨見之明。其在譴逐。險阻艱難。無不備嘗。而心不以懈者。唯  
愛君憂國之誠。一斥不復。踰二十年。而志氣不衰。容貌不枯者。蓋其所養  
之厚。脫去世累。怡然委化。而了無芥蒂。恬無疾苦者。蓋其所造之精。嗚呼。  
哀哉。天之生賢。千載比肩。而在理有不可知者。既克生之。而不使之有成  
人之云止。士夫是悼。而在公無可憾者。身雖沒。而有不朽之令名。惟公胃  
中素所蘊蓄。雖設施之未嘗。然推原其心。夷攷其行。合海內之公言。古之  
所謂自任天下之重。特立獨行。而不顧者。諒非公而誰稱。嗚呼。哀哉。我與  
先子平生故人。今石之交。情均天倫。我初識公。浙江之濱。忌德與齒。襟期自  
親。迨謫沙陽。遺問慙慙。許與之厚。銘心書紳。我歸自南。遽遭閔凶。孤苦杜  
門。公亦北徙。一水相望。慰誨諄諄。何翰墨之未乾。而死生之永分。悵蒼生  
之失望。痛故老之凋淪。瞻淮楚而殞涕。嗟往弔之無因。寓哀情於一奠。奠靈  
爽之或聞。嗚呼。哀哉。高饗。鄧肅集。奉安陳諫議祭文。維建炎三年。歲次

戊申二月乙卯朔二十日甲戌。恭謹以清酌庶羞之奠。昭告故諫議大夫  
了齋先生陳公之靈。曰。靖康之難。貽於崇寧。相彼元惡。治亂已分。人皆見  
於已著。公獨察乎未形。正色立朝。上嬰逆鱗。雖菽粟之奉。不給於朝暮。而  
正直之氣。蓋充塞乎乾坤。若上皇能用公於三黜之後。則必無宣和之末。  
若淵聖能作公於九泉之下。則必無沙漠之征。嗚呼已矣乎。公道興衰。繫  
國休戚。故公之死生存亡。不繫於公。而繫乎造物。昔公南遷。義不枉尺。斯  
民企踵。猶冀萬一。一旦夢奠於兩楹之間。四海為之失色。善類無師。吾道  
將絕。小人無畏。爭臣新室。此有志之士。所以為天下慟。而不獨為邦人惜  
也。聖人念公。恩錫日隆。平生事業。已勒鼎鍾。鄉曲儒生。慕公高風。參乎倚  
衡。若接音容。貌公之像。血食學宮。先聖之道。與公無窮。尚饗。麗則遺音。吊  
陳了翁賦。評云。自三良至此。凡六篇。據義正而立語精。皆寓史斷於騷  
人之詞者也。學者熟此。可以識古賦之則矣。彼紹聖其何以時兮。推黨  
人之救滋。邪與正不兩立兮。君子常屈乎其時。執往論而為國是兮。熙豐  
荆黨。彼以不孝之偽名。元祐溫黨。博身服乎徂險兮。申二蔡以為朋。何夫  
子之弗黨兮。日在彼為舉知。固知蹇蹇之為予患兮。甘茹毒其如飴。嗟夫。  
子之寡師兮。將以殲其渠魁。仗尊堯以為義兮。帖余身於觚摧。尊堯集以

十為罪魁觀秦陵徽宗之英識兮。亦聽聽之易寤也。何操舟之倒榜兮。謂  
長梁其不可渡也。遭余道夫九江兮。旦又濟夫南康。顧窮飛其昌逝兮。紛  
網羅之高張。嗟公道之不立兮。今之人又數化。指蔡薺輩初既要予以陸  
狄兮。又何倒戈以前御。誓嫉邪以死直兮。雖顛越其非所辱。審取舍以乾  
乾兮。生有重夫所欲。南北裂其有萌兮。知夫人之禍世。三十年之來徵兮。  
卒符言於前筮。吾嘗愛元城劉器之為剛兮。夫子又李杜之齊名。慕危  
節以感激兮。些  
千秋其若生。

永樂大典卷之三十一百四十四



--	--	--	--	--	--	--	--	--	--	--	--	--	--	--	--	--	--	--	--

重 錄 總 校 官 付 郎 臣 高 拱

學 士 臣 瞿 景 淳

分 校 官 編 修 臣 陶 大 臨

書 寫 儒 士 臣 劉 大 壽

圖 照 監 生 臣 義 仲 楫

臣 徐 浩

